

OLe Liahona

**O Le a le Tulaga
Faatonuina a le Alii mo
le Ola Mama? i. 32, 50**

**Taiala Paia mo Fanau
Faalogogata, i. 16**

**Faamaloloina i le maea ai
o le Sauaina, i. 12, 46**

**Mo Mataupu Aoaoina a le
Autalavou: la Malamalama
i le Alofa Tunoa o
le Faaola, i. 54**





*"O le tulaga
faatina e le o se
mea e te faia e
fai ma mea e te
fifia i ai, ae o se
valaauga. . . E
le o se mea e te
faia pe a fetaui
ma mea ua e
faatulagaina. O
le mea lea na tuu
atu ai e le Atua
ia te oe le taimi."*

Rachel Jankovic, i le
Neil L. Andersen,
"Tamaiki," *Liahona*,
Nov. 2011, 28.



O SAVALI

- 4** **Savali a le Au Peresitene Sili: Auaunaga ma le Ola e Faavavau**
Saunia e Peresitene Henry B. Eyring
- 7** **Savali a Faiaoga Asiasi: O Le Misiona Paia a Iesu Keriso: Malamalama o le Lalolagi**

TALA FAAALIA

- 16** **Matua Faamaoni ma Fanau Faalogogata: Fa'atumauna o le Fa'amoemoe Ao Faatoilolina le Malamalama Sese**
Saunia e Elder Davdi A. Bednar
Ua fesoasoani Elder Bednar i matua ia manua se malamalamaaga faaleaoaoga faavae sa'o o upumoni e faataatau i fanau faalogogata.

I LE FAAVAA

Luma: Ata Pue o le Malumalu a Tegucigalpa Honduras na saunia e Cody Bell. I totonu o le faavaa pito i luma: Ata na tusia e Bradley Slade.

- 22** **O Paionia i Atunuuma: Zimbabwe—Laueleele o le Matagofie, Tagata o le Faatuatua**

E mafai ona tutu atu nei paionia malolosi i Zimbabwe o ni faataitaiga mo tagata o le Ekalesia i atunuuma uma.

- 28** **Lē Maluelueina**

Saunia e Reid Tateoka

I le lotolotoi o le tuanai ai o le mafui'e ma le galulolo i le 2011 i Iapani, na manatua ai e nei faifeautalai e liliu atu i le Alii.

- 32** **O Le Tulaga Faatonuina o le ola Mama a le Alii**

Saunia e Elder Tad R. Callister

E manaomia na o le faatasi ona fetalai mai le Tama Faalelagi e uiga i Lana tulaga faatonuina o le ola mama, ma o Lona siufosoga e toilalo ai isi leo uma e mafai ona tuufaatasia i lenei lalolagi.

MATAGALUEGA

- 8** **Tusigāmanatu o le Konafesi o Oketopa 2013**
- 10** **O Perofeta o le Feagaiga Tuai: Aperaamo**
- 11** **Aoao Atu Mo Le Malosi o le Autalavou: Mama Atoatoa i Tulaga Feusua'i**
- 12** **Tatou te Talanoa ia Keriso: Sa Aveesea le Avega**
Taofia le igoa
- 14** **Auaunaga i le Ekalesia: Auauna Atu i se Tagata Ese**
Saunia e Yong Gil Park
- 38** **O Leo o le Au Paia o Aso e Gata Ai**
- 80** **Seia Tatou Toe Feiloai: Faatalitali i le Vaega i Luma**
Saunia e Lori Fuller



42

42 Valaaulia Le Manua

Saunia e Richard Romney

E mafai ona e mauaina avanoa e faasoa ai le talalelei i le olaga i aso uma, e pei ona faia e nei talavou matutua

**46 Faamaloloina o Maila Matuia o le Faatautala**

Saunia e Elder Richard G. Scott

E ono afua mai filifiliga amioleaga a isi le tiga ma le atuatuvala, ae e le mafai ona latou faaumatia ou avanoa e faavavau.

50 Mo Le Malosi o le Autalavou: O Loto Mama ma Tino Mama

Saunia e Neill F. Marriott

52 Tumau i le Mataala

Taofia le igoa

Sa manaoamia le tasi ma le afa tausaga ou te talanoa atu ai i lo'u epikopo e uiga i lo'u faafitauli i ponokalafi. Aua nei faapena le umi mo oe.

53 Pe Faapefea ona Filifili ni Uo Lelei

Saunia e Peresitene

Thomas S. Monson

54 Alofa Tunoa ma le Togiola a Iesu Keriso

Saunia e Joshua J. Perkey

57 Pepa Lautele o loo I Ai se Savali: O Se Fesoasoani Maoae**58 Pe lelei le . . . ?****E mafai ona ou . . . ?**

Saunia e Heidi McConkie

Aua e te taumafai e faafetaui le talalelei i lou olaga. Ae, ia tau-mafai e faafetaui lou olaga i le talalelei.

61 Tuusao i le Mataupu**62 Uo i Luga o le Initoneti**

Saunia e Stephanie Acerson

E mafai ona e faaaogaina le Facebook ma isi ala o faasala-lauga e avea ai ma se faifeautalai i le taimi nei.

64 Aua nei Misia le Valaau mai le Telefoni

Saunia e David Dickson

O le a le mea o le a mafai ona e misia pe afai e te le faalogo i lauga o le konafesi aoao a sau?



66

66 O Lagona Mai Au e se Tasi?

Saunia e Lucas F. ma Susan Barrett

E mafai faapefea ona ou faasoa atu la'u molimau i le tatalo pe a ou le mautinoa pe o faafofoga le Tama Faalelagi i au tatalo?

68 Manatu Atamai**69 O La Tatou Itulau****70 O Uo mai le salafa o le Lalolagi: O Au o Tendai mai Zimbabwe**

Saunia e Amie Jane Leavitt

72 Gaoioiga o Ata Pepa: Mudiwa mai Zimbabwe**73 Na Ou Lagonaina le Agaga**

Saunia e Linda K. Burton

O se faamanuiaga faaleperisitua ma se pese Peraimeri na fesoasoani ou te lagonaina ai le Agaga Paia.

74 Aumaia o le Peraimeri i le Fale: O Iesu Keriso O Lo Tatou Faaola**76 Mo Tamaiti Laiti: O Se Togalaau e Tumu i Faamanuiaga**

Saunia e Linda Pratt

81 Atatosi o le Perofeta: Ezra Taft Benson

Susuga a le Au Peresitene Sili: Thomas S. Monson,
Henry B. Eyring, Dieter F. Uchtdorf

O Le Korama a Aposteto e Toasefululuua:

Boyd K. Packer, L. Tom Perry, Russell M. Nelson,
Dallin H. Oaks, M. Russell Ballard, Richard G. Scott,
Robert D. Hales, Jeffrey R. Holland, David A. Bednar,
Quentin L. Cook, D. Todd Christofferson, Neil L. Andersen

Faatonu: Craig A. Cardon

Fautua: Jose L. Alonso, Mervyn B. Arnold, Shayne M.
Bowen, Stanley G. Ellis, Christoffel Golden

Pule Faatonusili: David T. Warner

Faatonusili o le Lagolago mo Aiga ma

Tagata o le Ekalesia: Vincent A. Vaughn

Faatonusili o Mekasini a le Ekalesia: Allan R. Loyborg

Pule o Mea Tau Pisinisi: Garff Cannon

Pule Faatonutonu: R. Val Johnson

Pule Faatonutonu Lagolago: Ryan Carr

Au Tusitusi ma Faatonutonu: Susan Barrett, Brittany Beattie, David Dickson, David A. Edwards, Matthew D. Flitton, Mindy Raye Friedman, Lori Fuller, Garrett H. Garff, LaRene Porter Gaunt, Jennifer Grace Jones, Michael R. Morris, Sally Johnson Odekirk, Joshua J. Perkey, Jan Pinborough, Richard M. Romney, Paul VanDenBerghe, Marissa Widdison

Pule Faatonusili Tusiata: J. Scott Knudsen

Faatonusili Tusiata: Tadd R. Peterson

Au Mamanu: Jeanette Andrews, Fay P. Andrus, C. Kimball Bott, Tom Child, Nate Gines, Colleen Hinckley, Eric P. Johnsen, Susan Lofgren, Scott M. Mooy, Mark W. Robison, Brad Teare, K. Nicole Walkenhorst

Faatonu o le Puletaofia ma Fatufatuga:

Collette Nebeker Aune

Pule i le Gaosiga: Jane Ann Peters

Au Gaosi: Kevin C. Banks, Connie Bowthorpe Bridge, Julie Burdett, Bryan W. Gygi, Denise Kirby, Ginny J. Nilson, Gayle Tate Rafferty

Taiolomi: Jeff L. Martin

Faatonusili Lolumiga: Craig K. Sedgwick

Faatonusili o le Tufutufaga: Stephen R. Christiansen

Mo le okaina o mekasini, alu i le store.lds.org po o le Falefutsi Titutonu i Pesega, Telefoni 64127. Totogi o le Mekasini: \$0.55 (Samoa) i le kopi. Totogi mo le Tausaga Atoa \$6.60 (Samoa).

Auina atu tusitisiga ma faafesili i luga o le initoneti i le liahona. Ids.org: pe meli mai i le Liahona, Rm. 2420, 50 E. North Temple, Salt Lake City, UT 84150-0024, USA; po o le i-meli: liahona@ldschurch.org.

O Le Liahona (o lona uiga i le Tusi a Mamona o le "tapasa" po o se "faatonuala") e lomia i le faa-Alepania, Aminia (Sasae), Pisilama, Palekeria, Kemupotia, Sepuanu, Saina, Kalaoitia, Siekislovakia, Tenimaka, Take, Igilisi, Estonia, Fiti, Finelani, Farani, Siamani, Eleni, Hanikeri, Initu, Iselani, Initonlesia, Italia, Iapani, Kiripati, Korea, Latvia, Lituna, Malakasa, Maselala, Monokolia, Nouei, Polani, Potukale, Romania, Rusia, Samoa, Saina (ua faafagofineira), Silovenia, Sipaniolo, Suetena, Swahili Tagaloka, Tahiti, Tai, Toga, Lukureini, Urutu, ma Viatename. (E eseese lava gagana.)

© 2014 Puletaofia e le Intellectual Reserve, Inc. Ua taofia aia tatau uma. Lomia i le lunatea Setete o Amerika.

E mafai ona kopi tala ma ata o le Liahona mo le toe faaaogaina i lotu po o le aiga ae ia le faia ai ni pisinisi. E le tatau ona kopi ni tala po o ni ata pe afai o faasa mai i le laina o loo ta'ua ai le e ona lea faatufugaga. Auina atu feisili e uiga i le puletaofia e le Intellectual Property Office, 50 East North Temple Street, Salt Lake City, UT 84150, USA; i-meli: cor-intellectualproperty@ldschurch.org.


For Readers in the United States and Canada:

March 2014 Vol. 38 No. 3, O LE LIAHONA (USPS 311) Samoan (ISSN 1045-0947) is published monthly by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address must be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Poste Information: Publication Agreement #40017431)

POSTMASTER: Send all UAA to CFS (see DMM 707.4.12.5). NONPOSTAL AND MILITARY FACILITIES: Send address changes to Distribution Services, Church Magazines, P.O. Box 26368, Salt Lake City, UT 84126-0368, USA.

Manatu mo Afiafi Faaleaiga

O lenei lomiga o loo i ai tusiga ma gaoioiga e mafai ona faaaoga mo afiafi faaleaiga. O ni manatu nei e lua.



ATA NA TUSI E CRAIG DIMOND

"Pe Faapefea ona Filifili ni Uo Lelei,"

itulau 53: Tipi ese mai mekasini nai ata o alii ma tamaitai talavou ma fatuina se talaaga puupuu mo ata taitasi. Mo se faataitaiga, e mafai ona e uuina i luga se ata o se alii talavou ma faapea atu, "O Arona lenei. O ia e le o se tagata o le Ekalesia, ae e alu e le aunoa i faalapotopotoga faalelotu ma lona aiga. E fiafia o ia e taalo i taaloga ma faaaoga gagana mama." Fatu se talaaga faapena mo ata taitasi. Fesili atu i lau fanau poo o fea o nei tagata o le a avea ma uo lelei. Faitau faatasi mai latou le lakopo 2:23 ma talanoaina auala e mafai ai ona tatou avea ma uo ma le Tama Faalelagi.

"O Iesu Keriso o lo Tatou Faaola,"

itulau e 74: Ua oo mai le Eseta! Atonu e te manao e fai se mea faapitoa i lenei vaitau e iloa ai faamanuiaga mai la lesu Keriso. O aso taitasi i le taimi o le 'aiga o le afiafi, e mafai e tagata taitoatasi o le aiga ona auauai e faasoaa mai ni faamanuia na ia mauaina i lena aso. E mafai ona outou manatua nei faamanuiaga e ala i le faaputuina o ni mapu i se fagu—e tasi le maa mo faamanuiaga taitasi. Atonu e te manao e faailoa atu lenei manatu i le taimi o le afiafi faaleaiga e ala i le faitauina o se mau e uiga i le soifuga o lesu Keriso; ona fai atu lea i lau fanau e tusi se ata o le mea o loo tupu i le mau. Usu le pese "O Loo Ou Taumafai e Avea e Pei o lesu" (*Tusipesa a Tamaiti*, 40) po o se isi pese e uiga i le Faaola.

I LAU GAGANA

O loo maua le Liahona ma isi tusi a le Ekalesia i le tele o gagana i le languages.lds.org.

Ina ia fesootai ma le Liahona i le Facebook ma maua savali musuia, asiiasi i le facebook.com/liahona.magazine

AUTU I LENEI LOMIGA

E ta'u mai e numera le itulau muamua o le tusiga.

Aiga, 16

Agaga Paia, 73

Ala o faasalalauga, 32, 52

Alofa tunoa, 54

Aperaamo, 10

Auauna atu, 14, 41, 57

Benson, Ezra Taft, 81

Faamagaloga, 46, 50, 52

Faamanatuga, 28

Faatautala, 12, 32, 46

Faaugoa, 53, 62

Faigata, 12, 28, 46

Galuega faafaifeautalai,

22, 28, 42, 62

Iesu Keriso, 12, 54, 74

Konafesi aoao, 8, 64

Loto faafetai, 28, 76

Malumalu, 80

Molimau, 66

Ola mama, 11, 32, 50, 52

Paionia, 22

Perofeta, 64

Ponokalafi, 32, 52

Salamo, 32, 46, 50, 52

Tatalo, 58, 66

Tauagafau, 32

Togiola, 12, 16, 46, 54

Tulaga faatonuina, 32, 58



**Saunia e Peresitene
Henry B. Eyring**

Fesoasoani Muamua
i le Au Peresitene Sili

Auaunaga

MA LE OLA E FAAVAVAU

Ole Faaola o lo tatou faataitaiga o le auaunaga lē manatu faapito. Sa tuuto atu Lona soifuaga atoatoa e auauna atu i le Tama Faalelagi ma fanau uma a Lona Tama. O le faamoemoega autasi a le Tama ma le Alo o le tuuina mai lea ia i tatou uma o le meaalofa o le tino ola pea ma le faamanuiaga o le ola e faavavau (tagai i le Mose 1:39).

Ina ia agavaa mo le ola e faavavau, e tatau ona suia i tatou e ala i le Togiola a Iesu Keriso — toe fanauina ma faamamaina mai le agasala. O fanau laiti i lalo o le valu tausaga, e ui i lea, e leai se agasala ma ua togolaina e ala i le Togiola (tagai i le Mosaea 3:16, 21; Moronae 8: 10–12).

Mo i tatou uma e oo atu i le tausaga o le tali atu, o loo i ai se fuafuaga matagofie e mafai ai ona tatou faamamaina mai le agasala ma saunia ai mo le ola e faavavau. O lena sauniuniga e amata i le papatisoga e ala i le pule o le perisitua ma le mauaina o le Agaga Paia. Ona tatau lea ona tatou manatuaina pea le Faaola ma tausi i poloaiga ua Ia tuuina mai ia i tatou.

Na ta'u atu e le Tupu o Peniamina i lona nuu i le Tusi a Mamona e uiga i le olioli lea e oo mai ai le lagonaina o le faamagaloina mai le agasala e ala i le Togiola a Iesu Keriso. Ona ia aoaoina lea o i latou faapea, ina ia faatumauina se faamagaloga o a latou agasala, e tatau ona latou aoaoina a latou fanau e auauna atu le tasi i le isi ma e tatau ona latou agalelei i le mea sili latou te mafaia e taulimaina ai manaoga faaletino ma faaleagaga o i latou o siomia i latou. (Tagai Mosaea 4:11–16.)

Na ia aoao mai foi, “Ma faauta, ua ou ta'u atu nei mea ia te outou ina ia mafai ona outou aoaoina le poto; ina ia mafai ona outou aoaoina, pe a outou auauna atu i o outou uso- a-tagata, ua nao lo outou auauna atu lava lea i lo outou Atua” (Mosaea 2:17).

Sa femaliuai Iesu ao aoaoina atu Lana talalelei ma faia mea lelei (tagai i le Galuega 10:38). Sa ia faamaloloina ē mama'i. Sa ia faatuina e ua otí. Faatasi ai ma Lona mana na Ia fafagaina le faitau afe o tagata ina ua latou fia aai, ma leai ni meaai (tagai i le Mataio 14:14–21; Ioane 6:2–13). Ina ua mavae Lona Toetu na Ia tuuina atu ni meaai i nisi o Ana Apostetolo ina ua latou tuvae i le matafaga o le Sami o Kalilaia (tagai i le Ioane 21:12–13). I le laueelele o Amerika, sa Ia faamaloloina ē mama'i ma faamanua taitoatasi i fanau (tagai i le 3 Nifae 17: 7–9, 21).

Na aoaoina i tatou e Iakopo le Apostetolo pe faapefea ona oo mai ia i tatou le manao e auauna atu i isi ona o lo tatou agaga faafetai mo mea ua faia e le Alii mo i tatou:

“A o le na te matamata i le tulafono o le saolotoga ua aotoatoa ona lelei ma ua tumau i ai o ia, e le se faalogologo ma le faagalogalo lena tagata, a o le anaana i le galuega, e manuia o ia i lona lava anaana. . . .

“O lenei lava le amio Atua ma le faamaoni i luma o le Atua o le Tama lea, ina ia tauasiasi atu i e matua otí ma fafine ua otí a latou tane i o latou tiga, ia leoleo foi o ia ia te ia, ina nei pisia mai o ia i le lalolagi” (Iakopo 1:25, 27).

O se tasi o faamautinoaga o le faamamaina o oe o le faateleina lea o le naunau e auauna atu i isi mo le Faaola. O faiaoga o aiga ma faiaoga asiiasi e avea ma se fiafiaga sili nai lo o se galuega. O le a atili ona e volenitia i le tele o taimi i se aoga i le lotoifale po o le fesoasoani e tausia e matitiva i lou nuu. E ui lava atonu e i ai sau tupe itiiti e tuu atu ia i latou e itiiti ifo mea latou te maua, e te moomoo maimau pe ana sili atu au mea ina ia sili atu mea e mafai ona e tuuina atu (tagai i le Mosaea 4:24). O le a e naunau e



auauna atu i lau fanau ma faaali atu ia te i latou le auala e auauna atu ai i isi.

A o suia ai lau amio, o le a e lagonaina se manao e tuuina atu se auau-naga sili atu e aunoa ma le faafetaia. Ou te iloa soo o le Faaola o ē ua tuuina atu ni meaalofa o le tele o tupe ma le auaunaga ma se naunautaiga ina ia leai se tasi e iloa sei vagana ai le Atua ma a latou fanau. Ua taliaina e le Atua la latou auaunaga e ala i le faamanuiaina o i latou i lenei olaga, ma o le a Ia faamanuiaina i latou i le ola e faavavau o le a oo mai (tagai i le Mataio 6: 1–4; 3 Nifae 13:1–4).

A o e tausia le poloaiga e auauna atu i isi (tagai i le Mataio 22:39), na e lagonaina se suiga i ou lagona o le faama-ualuga. Na faasa'oina e le Faaola Ana Apostolo ina ua latou fefinaui pe o ai o le a sili ia te i latou. Na Ia fetalai:

“Aua foi nei taua outou o aoao: aua e toatasi la outou aoao.”

“A o le sili i a te outou e fai lea ma a outou auauna” (Mataio 23:10–11).

Ua aoaoina i tatou e le Faaola pe faapefea ona mafai ona tatou aoao e auauna atu i isi. Sa ia auauna atu i le atoatoa, ma e tatau ona tatou aoao e auauna atu e pei ona Ia aoaoina—lea alofa tunoa ma lea alofa tunoa (tagai i le MF&F 93:12–13). E ala mai i le auaunaga tatou te tuuina atu, e mafai ona avea atili ai i tatou e faapei o Ia. O le a tatou tatalo ma le malosi uma o o

tatou loto ina ia tatou alolofa i o tatou fili e pei ona Ia alofa ia i latou (tagai i le Mataio 5:43–44; Moronae 7:48). Ona tatou mafai ai lea mulimuli ane ona agavaa mo le ola e faavavau faatasi ma Ia ma lo tatou Tama Faalelagi.

Ou te folafola atu e mafai ona tatou o mai e auauna atu ma le atoatoa e sili atu pe afai tatou te mulimuli i aoaoga ma faataitaiga a le Faaola. ■

AOAO ATU MAI LENEI SAVALI

Ua uunaia i tatou e Elder M. Russell Ballard o le Korama a Apostolo e Toasefululua ina ia tatou tatalo mo avanoa e auauna atu ai: “I a outou tatalo i aso fou taitasi, ole atu i le Tama Faalelagi e taiala oe ia iloa se avanoa e auauna atu ai i se tasi o Ana fanau faapelepele. Ona e faagasolo lea o le aso... saili mo se tasi e fesoasoani i ai” (“Ia Auai ma le Naunautai,” *Liahona*, Nov. 2012, 31). Mafaufau e valaaulia i latou o loo e aoaoina e faatu se sini e tatalo i taeao taitasi mo avanoa e auauna atu ai ma saili i latou i le aso atoa.

O Se Tali i Lana Tatalo

Saunia e Siphilile Khumalo

I se tasi po na asiasi mai ai se uo o se isi lotu ia te au. E masani lava ona ou suesue i a'u tusitusiga paia na o au, ma sa ou aveina i fafo e suesue ai i lena po. Sa uunaia au e valaaulia o ia e auai i lau suesuega o tusitusiga paia, ae sa ou fefe ma amata loa ona ou suesue na o au. Sa ou iloa ou te lei amanaiaina se uunaiga a le Agaga. Ina ua mavae ni nai minute sa ou fesili atu ma le faateete lava, "E te manao ta te suesue faatasi i tusitusiga paia?" E aunoa ma le toe faatali na tali mai la'u uo, "loe."

Ona ma faitau lea mai le Tusi a Mamona. Sa ia fai mai ni fesili ia te au, ma na ou lagonaina le Agaga o taialaina au ao ou tali atu. Na ou tuuina atu la'u molimau i le moni o le Tusi a Mamona. Ina ua uma ona ou faia lenei mea, sa fai mai o ia, "Sa ou tagi ma le fefe i le aso atoa. Faatoa uma ona ou tatalo i le Atua mo se fesoasoani ae e fesili mai loa ia te au ta te faitau faatasi i tusitusiga paia. Ua matuai sili atu nei lau faalogona. Faafetai lava."

Na faaaogaina e le Alii au e fai ma meafaigaluega e tali ai se tatalo ma auauna atu i se tasi o Ana fanau o loo manaomia le fesoasoani. Ou te iloa o uunaiga o ni faatonuga paia ia mai se Tama poto, ma mamalu. Pe a tatou tuu ese lo tatou fefefe, ua tatou faatagaina o la e faaali mai Lona mana e ala i lo tatou usiusitai.

E alala le tusitala i Gauteng, Aferika i Saute.



Vaavaai mo Auala e Auauna Atu Ai

Emafai e fanau ona filifili e auauna atu i isi. Lio ata o loo filifili ai le tamaitiiti e mulimuli ia lesu Keriso e ala i le fesoasoani atu i se isi tagata.



Ia suesue ma le agaga tatalo i lenei mataupu ma saili ia iloa le mea e faasoa atu. E faapefea e le malamalama i le soifiuaga ma le misiona a le Faaola ona faateleina ai lou faatuatua ia te Ia ma faamanuia ai isi e te leoleoina e ala i faiaoga asiasi? Mo nisi faamatalaga, alu i le reliefsoociety.lds.org.

O Le Misiona Paia a lesu Keriso: Malamalama o le Lalolagi

O le vaega lenei o se faasologa o Savali a Faiaoga Asiasi e faaautu i vaega o le misiona a le Faaola.

Ao tatou faasolo ina malamalama o Iesu Keriso o le Malamalama o le Lalolagi, o le a tatou faateleina lo tatou faatuatua ia te Ia ma avea ma se malamalama i isi. Na molimau mai Keriso i Lana matafaioi o le “malamalama moni e faamalamalamaina alii uma [ma tamaitai] e o mai i le lalolagi” (MF&F 93:2) ma fetalai mai ia tatou “tuu i luga [Lona] malamalama ina ia susulu atu i le lalolagi” (3 Nifae 18:24).

Ua molimau mai foi o tatou perofeta i le Malamalama o Keriso. Fai mai Peresitene Henry B. Eyring, Fesoasoani Muamua i le Au Peresitene Sili: “O taimi uma lava e te filifili ai e tau-mafai e ola atili e faapei o le Faaola, e tatau ona faamalosia lau molimau. O le a e iloaina mo oe lava o Ia o le Malamalama o le Lalolagi. . . . O le a e faasusulu atu i isi le Malamalama o Keriso i lou olaga.”¹

Fai mai Elder Quentin L. Cook o le Korama a Apostolo e Toasefululua i le avea ai o i tatou o se malamalama i le lalolagi: “E tatau ona tatou puipua



o tatou aiga ma ia taulamua faatasi ma tagata uma o faamoemoega lelei i le faia o mea uma e mafai ona tatou faia e faasaoina le malamalama ina ia puipua, faamoemoe, ma le ola mama i o tatou nuu.”²

Mai Tusitusiga Paia

Ioane 8:12; Mataupu Faavae ma Feagaiga 50:24; 115:5

FAAMATALAGA

1. Henry B. Eyring, “O Se Molimau Ola,” *Liahona*, Me 2011, 128.
2. Quentin L. Cook, “Ia I Ai le Malamalama!” *Liahona*, Nov. 2010, 30.
3. Tagai O Afafine i Lo'u Malo: *O Le Talafasolopito ma le Galuega a le Aualofa* (2011), 175–176.
4. Tagai O Afafine i Lo'u Malo, 175.

O Le A se Mea e Mafai Ona Ou Faia?

1. Talanoa po o le a le uiga o le avea ma malamalama i le lalolagi i lenei vaitaimi.
2. Mafaufau loloto pe faapefea e le mulimuli i le malamalama o Keriso ona fesoasoani ia te oe e onosaia tofotofoga.

Faatuatua,
Aiga, Toomaga



Mai Io Tatou Talafasolopito

O loo faaauau e tamaitai o le Au Paia o Aso e Gata Ai i le taimi nei ona uu i luga lo latou malamalama.

I le fogafale lona 80 o se fale maualuga i Hong Kong, i Saina, sa fatuina ai e se tamaitai nofo-fua e i ai manaoga faapitoa o le tino—e na o ia lava le Au Paia o Aso e Gata Ai i lona aiga—se fale na avea ma se sulufaiga e lagona ai e ia ma tagata asiasi mai le uunaiga a le Agaga. Sa ia tuuina faalatalata ia te ia ana tusitusiga paia, lana tusi lesona o le Aualofa, ma lana tusi pese. Sa ia malaga i le malumalu e faatino ia sauniga mo ona tuaa.³

Sa tausia e se tina amiontonu i Pasila lana fanau i le malamalama o le talalelei. O pese o le peraimeri e faatumuina ai le siosiomaga o lona fale piliki mumu, ma o ata mai le *Liahona* o malumalu, perofeta a le Atua, ma le Faaola na ufitia ai le puipui. Sa ositaulaga i laua ma lona toalua ina ia faamauina i le malumalu ina ia mafai ona fananau mai le la fanau i totonu o le feagaiga. O lana tatalo faifai pea, ia fesoasoani le Alii ia te ia e aumaia le malamalama, upumoni, ma le malosi o le talalelei i lana fanau.⁴

TUSIGĀMANATU O LE KONAFESI O OKETOPA 2013

“O le mea ua fai atu ai A’u o le Alii, ua ‘Ou fai atu ai; . . . pe i lo’u lava leo po o i le leo o a’u auauna, ua tutusa lava” (MF&F 1:38).

A o e suesueina le konafesi aoao ia Oketopa 2013, e mafai ona e faaaogaina nei itulau (ma Tusigāmanatu o le Konafesi i lomiga i le lumanai) e fesoasoani ia te oe e suesue ma faaaaoga aoaoga talu ai nei a perofeta soifua ma aposetolo ma isi taitai o le Ekalesia.



Upu Faaperofeta e uiga i Faaipoipoga

“O le faaipoipoga i le va o se alii ma se tamaitai o le vaega autu lea o le aoaoga faavae a le Alii ma e taua i le fuafuaga e faavavau a le Atua. O le faaipoipoga i le va o se alii ma se tamaitai o le mamanu lea a le Atua mo le atoatoaga o le olaga i le lalolagi ma i le lagi. O le mamanu a le Atua mo le faaipoipoga e le mafai ona tafili saunoa i ai, malamalamama sese i ai, pe faaseseina [tagai Mataio

19:4–6]. E le mafai pe afai e te manao i le fiafia moni. O le mamanu a le Atua mo le faaipoipoga e puipuia ai le mana paia o le foafoaga ma le olioli o le alofa faamamai moni faaleulugalii. Ua tatou iloa o Atamu ma Eva sa faaipoipoina e le Atua a o le’i oo i laua i le olioli o le tuufatasia o se tane ma se ava.”

Elder Russell M. Nelson o le Korama a Aposetolo e Toasefululu, “O Filifilia mo le Faavavau,” *Liahona*, Nov. 2013, 108.

O Tali mo Oe

O konafesi taitasi, ua tuuina mai ai e perofeta ma aposetolo ni tali musuia i fesili atonu e i ai i tagata o le Ekalesia. Faaaoga lau lomiga o Novema 2013 pe asiasi conference.lds.org e sue ai tali i fesili nei:

- O le a se mea e mafai ona ou faia pe afai ua sē ese se tagata o le aiga mai le talalelei? Tagai Henry B. Eyring, “I Fanau a La’u Fanau.”
- O i ai se nofoaga saogalemu e tausi ai a tatou fanau? Tagai Boyd K. Packer, “O Le Ki i le Puipuiga Faaleagaga.”
- Aisea e taua ai uunaiga a tamaitai? Tagai D. Todd Christofferson, “O Le Malosiaga Amiotonu o Tamaitai.”

Ina ia faitau, matamata, pe faalogologo foi i lauga o le konafesi aoao, asiasi ane i le **conference.lds.org**.

MAUAINA O FAATUSATUSAGA : ALOFA O LE ATUA

Onisi o autu e sili ona taua ua laugaina e failauga e silia ma le toataso o le konafesi aoao. O le mea lenei na saunoa i ai failauga e toatolu e uiga i le alofa o le Atua mo i tatou:

- “E alofa lo outou Tama Faalelagi ia te outou—outou taitoatasi. E le sua lava lena alofa. . . . Ua i ai lava iina.”¹—Peresitene Thomas S. Monson
- “[O le Faaola] e latalata mai i taimi uma, aemaise lava i nofoaga paia ma i taimi o mafatiaga; ma o nisi taimi, pe a ou tau le mafaufau i ai, ou te lagona toetoe lava e pei e pa’i mai o la i lou tauau e tau mai ia te au e alofa o la ia te au.”²—Elder Terence M. Vinson o le Fitugafulu
- “Ou te molimau atu e leai ni tagata ese i lo tatou Tama Faalelagi. E leai se tagata e le taua lona agaga ia te la.”³—Bishop Gérald Caussé, Fesoasoani Muamua i le Au Epikopo Pulefaamalumalu

FAAMATALAGA

1. Thomas S. Monson, “E Le Tuua Lava Na o i Tatou,” *Liahona*, Nov. 2013, 123, 124.
2. Terence M. Vinson, “Faalatalata Atili i le Atua,” *Liahona*, Nov. 2013, 106.
3. Gérald Caussé, “E Le O Toe Tagata Ese Outou,” *Liahona*, Nov. 2013, 51.

TUPE MO FAIFEAUTALAI LAUTELE MA UAROTA

“Ou te faafetai atu ia te outou mo a outou sao lotofoa. E manaomia pea le fesoasoani, ina ia mafai ona faaauau pea ona tatou fesoasoani atu ia i latou o loo i ai se manao tele e auauna atu ae ua latou le mafaia e i latou lava ona maua ni auala e faia ai.”

Peresitene Thomas S. Monson, “Susu Maia i le Konafesi,” *Liahona*, Nov. 2013, 4–5.



Folafolaga Faaperofeta

“O se mea masani le i ai o fesili—o sina fatu itiiti o le fesili faamaoni ua tele ina tupu ae ma avea ma se laau mafalā o le malamalamā. O loo i ai ni nai tagata o le Ekalesia o e, po o le a lava le taimi, e lei tauivi lava ma ni fesili matuia pe maaleale. O se tasi o faamoemoega o le Ekalesia o le faafalele lea ma atiae

le fatu o le faatuatua—e oo lava i nisi o taimi i eleele matutu o le masalosalo ma le le mautonu. O le faatuatua o le faamoemoe lea mo mea e le vaaia ae ua moni [tagai Eperu 11:1].

“O le mea lea, ou uso e ma tuafafine pele—au uo pele—faamolemole, ia muamua e masalosalo i ou masalosaloga

ae e te lei masalosalo i lou faatuatua. Ia le tatau lava ona tatou faatagaina le masalosalo e faapagotaina i tatou ma taofia ai i tatou mai le alofa paia, filemu, ma meaalofo ia e oo mai e ala i le faatuatua i le Alii o lesu Keriso.”

Peresitene Dieter F. Uchtdorf, Fesoasoani Lua i le Au Peresitene Sili, “Sau, Auai faatasi ma i Matou,” *Liahona*, Nov. 2013, 23.

APERAAAMO

*"A o tatou mulimuli i le faataitaiga a Aperaamo, . . . o le a tatou maua le fiafia sili atu ma le filemu ma le malologa, [ma] o le a tatou maua ai le fiafia o le Atua ma tagata ia i tatou"*⁷—Peresitene Spencer W. Kimball (1895–1985)

O lou aiga muamua sa i le lauelele vaivaia o Uro i Kaletaia. Sa tapuai tagata o Kaletaia, e aofia ai lo'u tama, i tupua ma ofoina atu taulaga i tagata. Ae na ou talitonu i le Atua moni ma soifua e tasi ma saunia mo le aso e mafai ai ona ou maua le perisitua, e pei ona i ai i ou tuaa.²

I se tasi aso na saisai a'u e tagata Kaletaia e osi ai le taulaga i luga o le fatafaitaulaga o le atua o Elekana. A o latou sauni e fasioti au, sa ou tatalo i le Atua mo le laveaiga ma sa vave ona tatalaina o'u noataga. Ona fetalai mai lea o le Alii ia te au: "Ma ua Ou faalogoina oe, ma ua Ou sau i lalo e laveai oe, ma aveese oe . . . i se lauelele ese."³

Na amata e le Alii ona matuai faamanuiaina au: na ou mauaina le perisitua mai ia Mekisateko,⁴ ma na

ma osifeagaiga ma le Alii faapea o le a avea au ma le tama o atunu e tele, ma o le talalelei o le a faamanuiaina tagata uma e ala mai i a'u fanau. Sa Ia suia lo'u igoa mai ia Aperamo ia Aperamo, o lona uiga "tama o le vao nuu."⁵

Na ou aumai lo'u aiga i Kanana, o le lauelele na saunia e le Alii mo i matou.⁶ Na folafola mai e le Alii ia te au o Lana feagaiga e faatatau i la'u fanau o le a faataunuina e ala i se atalii e fanau mai i lo'u toalua o Sara. Sa le mafai ona maua se ma fanau ma Sara. Ma te le iloa pe faapefea ona mafai ona maua se fanau aua ua ma matuai matutua uma lava—sa 100 ou tausaga ao Sara ua 90.⁷ Ae e pei ona folafola mai e le Alii, sa maua se ma atalii, o Isaako.⁸

I ni nai tausaga mulimuli ane, sa oo mai se tasi tofotofoga sili ona

faigata o lo'u olaga. E ui lava ina sa ou molimauina le tiga o le taulaga e fai i tagata, na finagalo le Alii ia ou ofoina atu lou atalii o Isaako o se taulaga. Sa faanoanoa lou loto, ae sa ou faatuatua i le Alii. Ina ua ou aapa atu e fasioti Isaako, na valaau mai se agelu ia te au, ua faapea mai, "Soia le oo lou lima i le tama, . . . aua ua ou iloa nei ua e mata'u i le Atua, ina ua e le taofia . . . o lou atalii e toatasi."⁹ Na saunia e le Alii se mamoe poa e osi ai le taulaga e sui ia Isaako, lea na ma ofoina atu ma Isaako i le Alii.¹⁰

Ona o lo'u usiusitai, na toe faa-mautinoa mai ai e le Alii Lana feagaiga: "Ou te matua faatoateleina lava lau fanau e pei o fetu o le lagi, . . . o lau fanau e manuia ai atunu uma o le lalolagi; aua ua e usiusitai i lau upu."¹¹ ■

FAAMATALAGA

1. Spencer W. Kimball, "The Example of Abraham," *Ensign*, Juni 1975, 7.
2. Tagai i le Aperamo 1: 1–8.
3. Tagai Aperamo 1:12, 15–16.
4. Tagai i le Mataupu Faavae ma Feagaiga 84:14.
5. Tagai Kenese 17:1–9; Aperamo 2:8–11; Taiala i Tusitusiga Paia, "Aperamo."
6. Tagai Aperamo 2:4, 18–19.
7. Tagai Kenese 17:15–21.
8. Tagai Kenese 21:1–3.
9. Kenese 22:12.
10. Tagai Kenese 22:1–13.
11. Kenese 22:17–18.



MAMA ATOATOA I TULAGA FEUSUA'I

Onisi taimi e lagona e Matua le le mautinoa pe a tulai mai ni avanoa mo i latou e aoao atu ai a latou fanau e uiga i le mama i feusuaiga. Ae ui i lea, o lesona e uiga i lenei autu e mafai ona valaaulia ai le Agaga ma fesoasoani e saunia ai fanau e osia ma tausia feagaiga paia.

I itulau 50–51 o lenei lomiga, ua tusia ai e Neill F. Marriott, fesoasoani lua i le au peresitene aoao o Tamaitai Talavou faapea, “Na saunia e le Tama Faalelagi mana o le foafoaga i totonu o le faaipoipoga e mo na o faamoe-moega faaleatua lava.” Ua tatou aoao mai le *Tusitalima 2: Taitaiina o le Ekalesia* o na faamemoega e aofia ai le “faaali atu ai le alofa ma faamolosia ai sootaga o lagona ma le faaleagaga i le va o le tane ma le ava.” ([2010], 21.4.4). E mafai ona fesoasoani fautuaga nei ia te oe e aoao ai lau fanau e uiga i le mama atoatoa i feusuaiga. E mafai foi ona e tagai i le “Aoaoina Atu o le Ola Mama ma le Amio Mama” i le *Liahona* Oketopa 2012 mo nisi manatu i le auala e aoao atu ai lenei autu.

Fautuaga mo le Aoaoina o le Autalavou

- Mafaufau e faitau faatasi ma lau fanau talavou “Matou te Talitonu i le Nofomama” saunia e Elder David A. Bednar o le Korama a Apostolo e Toasfululua i le *Liahona* o Me 2013. Valaaulia i latou e fai atu fesili e uiga i le mama i feusuaiga. E mafai foi
- Atonu e te manao e fai se afiafaaleaiga lea e te faaaogaina ai ata o le malumalu e talanoaina ai le taua ma le paia o le malumalu. Ona mafai lea ona e faamatala atu o o tatou tino o ni malumalu paia foi.
- Faitau faatasi ma lau fanau le mataupu faavae lona sefulutolu o le faatuata ma talanoa e uiga i le taua o le tausia o tatou mafau-faugia ia mama. Fai se lisi o ni tusi, ata tifaga, ma pese o le a faatumulia ai lou mafaufau i mea lelei. Atonu e te manao e faitau, matamata, pe pepese faatasi ma i latou. ■

ona e faaaogaina “O Le Mama o le Tagata Lava Ia” saunia e Elder Jeffrey R. Holland o le Korama a Apostolo e Toasfululua i le *Liahona* Oketopa 2000 e fesoasoani e tali ai a latou fesili.

- O le autu o le mataupu aoaoina a le autalavou mo lesona i Aso Sa o lenei masina o le Togiola a Iesu Keriso. Mafaufau e faaaoga mataupu aoaoina e aoao ai lau autalavou e uiga i le salamo e manaomia mo le agasala o feusuaiga (tagai i le lds.org/youth/learn). E mafai foi ona outou faitau ma talanoaina le “Aisea ae o a Foi Mea e Tatau Ona Tautau atu i Lo’u Epikopo?” Saunia e Elder C. Scott Grow o le Fitugafulu i le *Liahona* Oketopa 2013.

- Afai e lata ane se malumalu, mafaufau e asiati i lotoa o le malumalu faatasi ma lou aiga ma talanoaina pe aisea e tatau ona tatou tumau ai i le mamā ina ia ulu atu i le malumalu. E mafai ona e faasoa faatasi ma i latou faamanuiaga ua e maua mai le tapuai i le malumalu. Atonu foi e te manao e fuafua se taimi mo lou aiga e fai ai papatisoga mo e ua maliliu.
- Atonu e te manao e faitau faatasi ma la outou talavou le “Mama i Feusuaiga” i le *Mo le Malosi o le Autalavou* ([tamaitusi, 2001], 35–37) ma faamamafa atu ai faamanuiaga tatou te maua mo



MAU E UIGA I LENEI AUTU

Salamo 24:3–4

Mataio 5:27–28

1 Korinito 6:18–20

Iakopo 2:27–28

Alema 38:12

Mataupu Faavae ma Feagaiga

46:33; 121:45

le tumau ai i le mama. E mafai ona e uunaia lau fanau e tusi i lalo ni sini e faatatau i le mama i feusuaiga.

Fautuaga mo le Aoaoina o Tamaiti

- Atonu e te manao e fai se afiafaaleaiga lea e te faaaogaina ai ata o le malumalu e talanoaina ai le taua ma le paia o le malumalu. Ona mafai lea ona e faamatala atu o o tatou tino o ni malumalu paia foi.
- Faitau faatasi ma lau fanau le mataupu faavae lona sefulutolu o le faatuata ma talanoa e uiga i le taua o le tausia o tatou mafau-faugia ia mama. Fai se lisi o ni tusi, ata tifaga, ma pese o le a faatumulia ai lou mafaufau i mea lelei. Atonu e te manao e faitau, matamata, pe pepese faatasi ma i latou. ■

SA AVEESEA LE AVEGA

Taofia le igoa

*I le avea ai ma se tamaitiiti na sauaina, sa ou tauivi mo ni tausaga
a o lei filifili e ta'u atu i se tasi e uiga i lena mea.*

Talu ai nei sa ou nofo ai i se lesona a le Aualofa lea na faitau ai e se uso se upusii e uiga i aafiaga o le faatautala faaletino ma faalefeusuai i fanau. O lou manatu muamua lava, "Matua faanoanoa." Ona faatumulia lea o a'u i le Agaga, o le na molimau mai ia te au i le vavega o le Faaola. Sa ou afaina i le faatautala i feusuaigna a o i ai i tausaga talavou. I le taimi o lena lesona o Le Aualofa, sa ou iloaina ai sa ou le toe lagonaina se tiga ma le fefe lea e fesootai i se mea na faleagaina ma faafefeina ai au mo le tele o tausaga. O se vavega lava. I lo'u loto sa ou faafetai atu i le Faaola mo le faamaloloina o au.

A o laititi, sa ou tauivi ma lagona le maasiasi mo le tele o tausaga a o lei filifili e ta'u atu i se tasi o au na sauaina. Ina ua 13 ou tausaga, sa ou lagonaina se uunaiga o le taimi lea e talanoa loa i ai. Ina ua uma se gaoioiga auauna atu i le Mutuale, sa ou alu loa i se taitai faatuatuaaina, o le na talanoa mai ia te au ma le agamalu, ma ave au e vaai le epikopo i le afiafi lava lea e tasi. Sa ou lagona le fafia e ala i le foliga mafanafana o le

epikopo a o ia valaaulia au i totonu o lona ofisa. Ou te manatua lou lagonaina o le mamafa o le tele o tausaga o mealilo ua tafiese a o faalogologo lo'u epikopo. Ou te manatua ona loimata mama a o ia faalogo i la'u tala. Sa ou lagonaina le alofa o le

Tama Faalelagi, ma sa ou lagonaina le faamautinoaga, o le sauaina e le o so'u sese ma o loo tumau pea lou mama ma le amio mama. O le amataga lenei o lo'u ala i le faamalologa, o se ala o le a faaauau pea mo le tele o tausaga.





MAUAINA O LE FESOA- SOANI

"O le faamaloloa e mafai ona amata i se epikopo

faautauta po o se peresitene o le siteki, po o se faufautua faapolofesa atamai. Afaia e gau lou vae, o le a e le filifili e fofo lava e oe. O le faautatala po o le sauaina matuia, e mafai foi ona manuia mai se fesoasoani faapolofesa. E tele auala e amata ai le faamalologa, ae ia e manatua o se fofo atoa lava e maua mai i le Faaola, le Alii o lesu Keriso, lo tatou Matai ma le Togiola. Ia faatuatua, faatasi ai ma galuega o le a mafai ai e Lana Togiola atoatoa, faavavau, ma le le iu ona faamalolo lou mafatia mai taunuuga o le faautatala po o le sauaina."

Elder Richard G. Scott o le Korama a Apostolo e Toasefululu, "O Le Faamaloloa o Taunuuga Faataumaoi o le Sauaina po o le Faautatala, *Liahona*, Me 2008, 42; tagai foi i le itulau e 46 o lenei lomiga.

E le na o se tasi le taimi o le faamaloloina—o se faagasologa o le filemu, malamalama, ma tali e oo mai a o ou suesue i a'u tusitusiga paia, tatalo i aso uma, ma faamasani atili ai ma Iesu Keriso. A o ou suesueina le soifuaga o le Faaola, sa ou lagonaina le alofa faateleina mo Ia. Na molimau mai e le Agaga upumoni ia te au, e aofia ai la'u lava taua o se afafine o le Atua. A o ou tuuina atu lo'u loto i le Alii, usiusitai i Ana poloaiga, ma saili i Lona finagalo, na faatumulia au i le mafanafana ma le toafilemu. A o faasolo ina ou iloa o Ia, sa amata

ona ou iloa o au lava ia. Na iu lava, ina le toe tiga lo'u olaga ua tuanai. Sa aveesea le avega. Sa faamaloloina e le Faaola au.

Ua i ai nei sou aiga e faavavau ma se tane lelei ma ni afafine lalelei e toatolu. Ua faamanuiaina a'u e galulue faatasi ma le autalavou, ma molimau atu o le Togiola a Iesu Keriso e mafai ona faamaloloina ai i tatou mai le agasala, o tiga faaletino, ma loto momomo. Ou te iloa lenei mea ona o le alofa mutimutivale lea na tuuina mai ia te au—aua sa "siosiomia au e faavavau i aao o lona alofa" (2 Nifae 1:15). ■

E FAAPEFEA ONA TATOU AUMAIA LE FAAMALOLOGA A LE ALII I O TATOU OLAGA?

Na fesoasoani Peresitene Dieter F. Uchtdorf, Fesoasoani Lua i le Au Peresitene Sili, e tali lenei fesili i lana saunoaga i le konafesi aoao ia Aperila 2013 "O Le Faamoemoe o le Malamalama o le Atua":

"Muamua, amata i le mea o e i ai.

.... Tatou te le tau faatali sei taunuu i le tini ona faatoa maua lea o faamanuiaga a le Atua. O le mea moni, e amata ona matai mai le lagi ma amata ona liligi mai faamanuiaga o le lagi i o tatou luga i la tatou laa muamua lava e agai atu i le malamalama.

"Lona lua, liliu atu lou loto i le Alii.

"Ia sii ae lou agaga i le tatalo, ma faamatala atu i

lou Tama Faalelagi mea o loo e lagonaina. Faailoa i ai ou faaletonu. Sasaa atu i ai lou loto ma faailoa atu lou lotofaafetai. Faailoa ia te la ia tofotofoga o loo e fetai. Aioi atu ia te la i le suafa o Keriso mo le malosi ma le tausiga.

"Lona tolu, savavali i le malamalama.

.... [Tama Faalelagi] sa auina mai ai Lona Alo i lenei lalolagi e faamalamalama le ala ma faaali mai ia i tatou le auala e sopoia ai ma le saogalemu ia maa tu'ia ua taatitia i lo tatou ala. Ua la aumai ia i tatou le talalelei, lea o loo aoao mai ai le ala o le soo. Ua aoao ai i tatou i mea e tatau ona tatou iloa, faia, ma ia savavali ai i Lona malamalama, i le mulimuli ai i tulagaaao o Lona Alo Pele" (*Liahona*, Me 2013, 75–76).

AUAUNA ATU I SE TAGATA ESE

Saunia e Yong Gil Paka

*Ina ua latalata ona ou tuua Korea, sa ou popole. O ai o le a tauseia le uso
o lo'u tina pe a ou alu?*

Lei taliaina lava e lo'u tina le talalelei a o soifua, e ui lava sa ou tatalomo ia ma lagonaina o le a ia talia i se aso. O ia o se tamaitai malosi ma na ositaulaga i lona olaga atoa e lagolago lo matou aiga ina ua mavae le Taua a Korea. I le atoa ai o le tasi le tausaga talu ona maliu lo'u tina, na ma o ma lo'u toalua i le Malumalu o Los Angeles Kalefonia e faatino ai lona papatisoga ma le faamauga. Sa faamaonia mai e le malosi o le Agaga i le potu ia te au o lo'u tina ua taliaina ma le fiafia le talalelei ma sauniga.

Ina ua latalata ona maliu lo'u tina, sa ia fai mai ia te au e tausei lona uso laitiiti, o le sa i ai i se falemai i Korea. Matou te nonofo ma lou aiga i Kalefonia, ISA, o le mea lea e faanoanoa ai aua sa foliga mai ua leai se auala e faataunu ai moomooga alofa mulimuli o lo'u tina. Ona faafuasei lea ona toe siitia la'u galuega i Korea i Saute, ma e tatau ona ou aluese mai lo'u aiga mo se tausaga. E ui ina sa ou popole e uiga i le nofo mamao ese mai lo'u aiga, sa ou naunau foi e asiiasi atu i le uso o lo'u tina ma lo'u tama, o le sa i ai i se falemai Korea e mafatia i le mai o le Galonimo o mea.

Sa ou tatalo atu i le Tama Faalelagi mo le fesoasoani faalelagi i le nofoesei ai mai lo'u aiga. A o ou mafaufau e uiga i le taimi o le a ou faaaluina i Korea, sa tonu ai ia te au e asiiasi atu i lo'u tama, uso o lo'u tina, ma le malumalu i vaiaso taitasi faapea foi ma le tatalo mo lo'u aiga i aso taitasi.

Ina ua ou i ai Korea, na valaauiina au e le epikopo o lau uarota fou e avea ma peresitene o Alii Talavou ma le faiaoga o Mataupu Faavae o le Talalelei. O la'u uarota ma falemai e nonofo ai lo'u tama ma le uso o lou tina e mamao ese mai le tasi i le isi, ma o lau galuega e matuai tele taimi e alu foi; ae sa faamanuiaina au e le Tama Faalelagi i le malosi ma le tumau e faalautele ai ou valaauga ma tausi i a'u filifiliga.

Na vave ona ou iloaina ina ua amata ona ou asiiasi atu i le uso o lo'u tina, sa seasea i ai ni tagata e asiiasi mai. Sa ou filifili e pikina o ia ma ma nonofo i le faaiuga o vaiaso i lo'u faletalimalo, lea sa i ai se potu faaopoopo. Ae peitai, sa i ai sou faafitauli: pe tatau ona ou aveina o ia i le lotu i le aso Sa? Sa ou manatu o le a le fiafia o ia pe malamalamo foi i sauniga, ma o le a ia faatali mo au mo ni itula pe a uma le lotu ma sauniga ma isi tiute. Ae mo se mafuaaga sa ou lagona ai e tatau ona ou aveina o ia.

O lena Aso Sa sa ou aveina o ia faatasi ma au, ma, e pei ona faamoe-moeina, sa tatau ona ia faatali mo a'u mulimuli ane. Ina ua uma a'u fonotaga, sa ou aveina o ia i le faletalimalo e ai ai. Sa ou matauina sa ia uuina se ato. Sa ou fesili ia te ia e uiga i ai, ma sa ia fai mai na tuuina mai e se tuafafine ia te ia ni meaai mama.

Soo se taimi sa ou faataunuina ai tiute i le tuua o le lotu, o lenei tuafafine—sa le'i iloa le uso o lo'u tina—na ofoina mai meaai mama mo le uso o lo'u tina. I se tasi vaiaso i le taimi o

la'u lesona o le Aoga Sa, na ofo mai ai se leo masani e faitau se mau. Ou te lei mafaufauina o le a volenitia le uso o lo'u tina, ae sa uunaia e se tuafafine na nofo i autafa o le uso o lo'u tina o ia e faitau mo le vasega. E ui lava o le uso o lo'u tina sa le lelei i fegalegale-aiga ona o lona taimi na faaesea ai i le falemai, na faafeiloai ma le agalelei ma talatalanoa tagata lotu uma ia te ia.

O afiafi o Aso Sa uma ou te toe ave ai o ia i le falemai ma folafola atu e piki o ia i luga i le faaiuga o le vaiaso na sosoo ai, lea e aumaia i taimi uma se ataata fiafia i ona foliga.

I se tasi aso na faasoa mai e sa'u uo se popoleg atomu o le a faigata i le uso o lo'u tina pe a faafuasei lava ona taofi au asiasiga pe a ou tuua Korea. Ina ua latalata lou taimi faatulagaina e tuua ai Korea, sa ou mauaina se lagona le mautonu—fiafia o le a vave ona toe faatasia ma lo'u aiga ae faanoanoa i le tuua toataso i le uso o lo'u tina.

Mulimuli ane, sa ou faamalamalama atu i le uso o lo'u tina o le a le mafai ona ou toe asiiasi soo i a te ia. Sa tu o ia mo se taimi, e mautinoa lava lona le fiafia. Ona ia taumafai lea e faatulaga ia lava ma fesili mai pe mafai ona ou asiasia o ia i le isi tausaga. Sa ou tagi ma tatalo faatauanau atu i le Tama Faalelagi e fesoasoani i lenei tamaitai.

I lo'u aso Sa mulimuli i Korea, na fesili mai le epikopo pe mafai e tagata o le uarota ona piki le uso o lo'u tina i aso Sa e aumai o ia i le lotu. Sa ia fai mai o se vaega o tagata lotu na naunautai e asia o ia i taimi uma—



e matuai toatele naua o le a latou manaomia e faatulaga ma feauauai. Sa ou le talitonu i lana ofo! O le tali lenei e le'i faamoemoeina i au tatalo faatauanau.

Talu ai o tagata o le ekalesia e nonofo mamaao ese mai le falemai o le uso o lo'u tina, sa ou ofoina atu e tuua se tupe mo i latou e totogi ai le femalagaagaiga, ae na mumusu tagata lotu e ave a'u tupe. Sa latou fai mai o le a latou feauaua'i e asiiasi faatasi i le masina, ae na ou iloa i se taimi mulimuli ane na latou asia moni lava o ia i vайасо taitasi. O se tasi o tuafafine faamaoni e pikiina le uso o lo'u tina i aso Faraile uma ina ia auai i le inisitituti ma fai le taumafataga o le aoauli. Sa ia aveina foi o ia i le fale faaaulelei mo le otiiina o lona lauulu. Sa ofofua atu se isi tamaitai, o se tina nofofua o ni tamaiti talavou se toalua, e piki o ia i taeao o Aso Sa uma. Sa ia kuka

mo le uso o lo'u tina, ave o ia mo se savalivaliga, ma faalogologo i musika ma ia. O le mea e aupito sili ona taua, sa ia taumafai e avea ma se uo, ma na iu lava ina talanoa fiafia atu i ai le uso o lo'u tina ia te ia ma isi tagata lotu. I afiafi o Aso Sa uma e piki ai le uso o lo'u tina mai le fale o se tagata lotu e le epikopo pe a mavae se aso umi o fonotaga a le Ekalesia ma isi tiute e toe ave o ia i le falemai. O Aso Tofi uma na te auina mai ai se imeli ia te au e lipoti mai ai la latou auaunaga faalelagi mo le uso o lo'u tina.

Ou te talitonu na vaai lo'u tina i faatinoga a le Au Paia faamaoni o Aso e Gata ai o loo auauna atu i lona uso laitiiti. Ma o lenei ua ou iloa, sili atu ona manino nai lo se isi lava taimi, pe aisea tatou te valauina ai o tatou uso a tagata o le Ekalesia "uso" ma "tuafafine." ■

E alala le tusitala i Kalefonia, ISA.



FA'AFEILOAI TAGATA UMA

"Aapa atu i soo se tasi ua oo mai faitotoa o o outou faletatalo o le Ekalesia. Talia i latou ma le agaga faafetai ma ia aunoa ma se faailogalanu. Afai e savavali atu ni tagata i totonu o a outou sauniga, ia faafeiloai ma le alofa i latou ma valaulia i latou e tou te nonofo faatasi. Faamolemole ia muamua ona e faia se faatinoga e fesoasoani ai ia i latou ia lagona le taliaina ma le alofaina nai lo le faatalitali mo i latou e o mai ia te oe.

"A maea lau faafeiloaiga muamua, mafaufau i ni auala e mafai ai ona faaauau lau auaunaga ia i latou."

Bishop Gérald Caussé, Fesoasoani Muamua i le Au Epikopo Pulefaamalumalu, "E Le O Toe Tagata Ese Outou," *Liahona*, Nov. 2013, 51.



Saunia e Elder
David A. Bednar
O Le Korama a Apo-
setolo e Toasefululu

Matua Faamaoni Fanau ^{MA} Faalogogata

Faatumauina o le Faamoemoe
Ao Faatoilaloina le
Malamalama Sese

O se tasi o mafatiaga sili e mafai ona mafatia ai se matua lototoa i Siona o se tamaitiiti lea e se ese mai ala o le talalelei. O Fesili o le "Aisea?" po o le "O le a sau mea sese na fai?" ma le "E mafai faapefea ona tuuina atu se fesoasoani i lenei tamaitiiti i le taimi nei?" o loo manatunatu ai pea ia mafaufau ma loto o ia matua. O nei alii ma tamaitai o loo tatalo faatauanau, suesue ma le maelega i tusitusiga paia, ma faalogo lelei i le fautuaga a taitai perisitua ma ausilali ao latou liliu atu i le talalelei a Iesu Keriso mo le taitaiga, malosi, ma le toofilemu.

O Faamatalaga mai le Au Pulega Aoao a le Ekalesia o loo faamatalaina ai le faatosinaga a matua faamaoni o fanau faalogogata o loo faaaauau pea ona avea o se punavai o le mafanafana sili i aiga.¹ E tulai mai le

faamafanafanaga mai le faamoemoe lea e foliga mai o loo tau mai e nei savali e faapea o matua o loo faamamaluina feagaiga o le talalelei, usitai i poloaiga a le Alii, ma auauna atu ma le faamaoni e mafai ona uunaia le faaolataga o o latou atalii ma afafine o e ua se ese. Ae peitai, o le faauigaga o nei faamatalaga e nisi o tagata o le Ekalesia ua saofaga atu i se fuataga o le malamalama sese i aoaoga faavae. O le fenumiai e pogai mai le le tutusa o nei faauigaga ma le aoaoga faavae o le Togiola a Iesu Keriso ma mataupu faavae o le faitalia ma le tali atu o le tagata lava ia mo agasala ma soligatulafono.

O se iloiloga o upumoni o loo faamamafaina soo i tusitusiga faavae, iloiloga o aoaoga manino mai apisetolo ma perofeta o ona po nei, ma faamaoniga talafeagai mai faamaumauga o talafaasolopito



o le Eklesia e mafai ona faatumauina ai le faamoemoe a o talanoaina mea o loo malamalama sese ai.

Folafolaga Faaperofeta e uiga i Fanau

Na faaali mai le upusii lenei i *Aoaoga a le Perofeta o Iosefa Samita*, tuufaatasia e le Perofeta o Iosefa Filitia Samita i le taimi o lana auaunaga o se tusitalafaamaumau ma tusitalafaasolipo o le Eklesia: “Pe a tuu i luga o le tama ma le tina se faamaufaailoga, na te malupuipua a la fanau, ina ia le mafai ona leiloloa i latou, ae o le a faasaoina ona o le feagaiga a lo latou tama ma le tina.”²

O se aoaoga talitutusa, na faataau lava i le faamatatalaga a le Perofeta o Iosefa, na faia e Elder Orson F. Whitney (1855–1931) o le Korama a Aposetolo e Toasefululu i le 1929: “Sa tautino mai e le Perofeta o Iosefa Samita—ma na te le i aoaoina mai se aoaoga faavae e sili atu ona faamafanafana loto i lo lenei—o le faamauga e faavavau o matua faamaoni ma folafolaga paia ua tuuina atu ia i laua mo auaunaga lototoa i le Galuega o le Upumoni, e le gata ina faasaoina ai i laua, ae faapena foi a laua fanau. E ui lava atonu o le a se ese nisi o mamoe, ae o loo silasila mai pe a fofoga o le Leo-leo Mamoe ia te i latou, ma o le a i ai se taimi, latou te lagona ai le aapa atu o aao alofa o le Atua ia te i latou ma aumaia i latou i le lafu. Po o le olaga nei po o le olaga a sau, o le a latou foi mai lava. E tatau ona latou totogiina a latou aitalafu i le faamasinoga tonu; o le a latou mafatia mo a latou agasala; ma atonu foi latou te ui atu i se ala matuitui; ae afai e taitaiina mulimuli ane ai i latou, e pei o le atalii Faamaumau Oa na salamo, i se tama alofa ma le loto faamagalo ma le aiga, ona aoga ai lea o mea tiga na oo i ai. Tatalo mo a outou fanau faatamala ma lē usiusitai; uumau ia i latou ma lou faatuatua. Faamoemoe i ai, talitonu i ai, seia e vaai i le faaolataga a le Atua.”³

O faamatatalaga mai ia Iosefa Samita ma Orson F. Whitney ua faauigaina e nisi o tagata o le Eklesia e faapea o fanau faalogogata e maua atoa ia faamanuiaga o le faaolataga ona o le faamaoni ma e auala atu i le faamaoni o matua. Peitai, na suia lenei faauigaga e le mea moni e faapea o le tala aupito sili ona atoatoa o le lauga a le Perofeta sa lei mauaina e tusi talafaasolipo o le Eklesia i le taimi sa latou tuufaatasia ai se

lomiga tuufaatasi o ana aoaoga mai faamatatalaga a Willard Richards ma William Clayton. I se seti e sili atu ona atoatoa o faamatatalaga na tusia e Howard ma Martha Coray, o loo faaalia ai le faamaoniaina e Iosefa Samita o lana saunoaga e faalagolago le mauaina o faamanuiaga folafolaina i le usiusitai o le fanau:

“Pe a [faamauina] se tama ma se tina o se aiga, o le la fanau *e lei solitulafono* ua malupuipua i le faamaufaailoga lea na faamauina ai Matua. Ma o le Tautoga lenei a le Atua i lo tatou Tama o Aperaamo ma o le a tumau e faavavau lenei aoaoga faavae.”⁴

O lenei faamalamalamaga e sili atu lona tumau faaleaoaoga faavae. Sei vagana ai le faamatatalaga faaopoopo o loo i ai i faamaumauga a Coray, o le a feteenai ia manatu faavae o le le faatuaoia o le faaolataga mo fanau le usiusitai ma le tele o aoaoga faavae autu a le Perofeta o Iosefa Samita, e aofia ai le mataupu faavae lona lua o le faatuatua faapea “o le a faasalaina tagata ona o a latou lava agasala” (Mataupu Faavae o le Faatuatua 1:2).

E tusa foi lenei malamalama ma le tele o ni faataitaiga i tusitusiga faavae. Mo se faataitaiga, na faamalamalamata atu e Alema i lona atalii o Korianetona:

“*Ae faauta, e le mafai ona e natia au solitulafono mai le Atua, ma e vagana ai ua e salamo, o le a tutu o se molimau e faasaga ia te oe i le aso gataaga.*

“O lenei, lou atalii e, ou te manao ia e salamo ma lafoai au agasala, ma aua e te toe alu e tusa ma tuinanau o ou mata, ae ia e faafiti oe lava i nei mea uma; *ona e vagana ai ua e faia lenei mea, e le mafai lava ona e mautofi i le malo o le Atua.* E, ia e manatua, ma ia e ave i ou luga, ma faafiti oe lava i nei mea” (Alema 39:8–9; faaopoopo le faamamafa).

Na folafola atu e Samuelu le sa Lamana ia sa Nifae:

“*Ma ua faia nei mea i le faamoemoe ia mafai ai ona faaolaina o soo se tasi e talitonu, ma ina ia mafai ai ona oo mai i luga o soo se tasi o i latou e le talitonu se faamasinoga amiontonu; o lenei foi afai e tausalaina i latou ua latou aumai i o latou lava luga lo latou lava tausalaga.*

“*Ma o lenei ia outou manatua, ia outou manatua, ou uso e, o soo se tasi e fano, e fano ia te ia lava;* ma o soo se tasi na te faia le amioletonu, *e faia e ia ia te ia lava;* aua faauta, ua outou saoloto; ua faatagaina outou tou te fai mo outou lava; aua faauta, ua tuuina mai e le Atua

E mafai ona manatu i le Tausiga
Faalelagi o se ituaiga o mana faa-
leagaga, o se toso po o se uunaiga
faalelagi lea e faatosinaina ai se
tamaitiiti ua se ese ia toefoi atu
i le lafu.



ia te outou se malamalama ma ua ia faia outou ia outou saoloto.

“Ua ia tuuina mai ia te outou ia mafai ona outou iloa o le lelei mai le leaga, ma ua ia tuuina mai ia te outou ia mafai ona outou filifili le ola po o le otí; ma e mafai ona outou faia le lelei ma toefuataia outou i le mea ua lelei, pe toefuatai mai le mea lelei ia te outou; pe mafai foi ona outou faia le leaga, ma toefuatai mai le mea ua leaga ia te outou” (Helaman 14:29–31; faaopoopo le faamamafa).

E faapena foi ona faamaoniaina e le tele o tusitusiga paia faaopoopo ia mataupu faavae o loo fai ai alii ma tamaitai ma sui ua faamanuiaina i le filifiliga saoloto ma e tali atu mo a latou lava manatu, upu, ma galuega.⁵

O Aao o le Tausiga Faalelagi

E leai ni faamaumauga a le Eklesia e uiga i soo se ao-
aoga faaopoopo i lenei autu patino mai le Perofeta o Iosefa
Samita. E ui ina tele isi taitai o le Eklesia ua se ese lo latou

faamamafaina o itu eseese o faamatalaga a Iosefa Samita, o Orson F. Whitney, ma isi, sa latou malilie i luga o le mea moni e faapea o matua o e faamamaluina feagaiga o le malumalu ua i ai i se tulaga e faaaoga ia aafiaga faaleagaga i le aluga o taimi i a latou fanau. E mafai ona maua e tagata faamaoni o le Eklesia le mafanafana i le iloaina faapea e mafai ona latou maua ia folafolaga o le taitaiga ma le mana faalelagi, e ala i le musumusuga a le Agaga Paia ma faamaniuaga o le perisitua, i a latou taumafaiga e fesoasoani ai i tagata o le aiga ina ia maua faamanuiga o le faaolataga ma le faaeaga.

Na faamatalaina e Elder Whitney e faapea, e mafai ona manatu i “Aao o le Tausiga Faalelagi” o se ituaiga o mana faaleagaga, o se toso po o se uunaiga faalelagi lea e faatosinaina ai se tamaitiiti ua se ese ia toefoi atu i le lafu i se taimi mulimuli. E le mafai e sea ituaiga aafiaga ona faaleaogaina le fitalia o se tamaitiiti ae e mafai ona valaaulia ma faailo atu i ai. I le faaiuga, e tatau i se tamaitiiti ona faaaoga lana fitalia ma tali atu i le faatuatua, salamo ma le faamoemoega atoa o le loto, ma galulue e tusa ma aoaoga a Keriso.

Sa tuuina mai e Peresitene James E. Faust (1920–2007), lea sa avea muamua ma Fesoasoani Lua i le Au Peresitene Sili, le faamalamalamaga aupito sili ona atoatoa o lenei manatu faavae taua e faavavau:

“Ou te talitonu ma talia le saunoaga faamafanafana a Elder Orson F. Whitney:

“Sa tautino mai e le Perofeta o Iosefa Samita—ma na te le i aaooina mai se aoaoga faavae e sili atu ona faamafanafana loto i lo lenei—o le faamauga e faavavau o matua faamaoni ma folafolaga paia ua tuuina atu ia i laua mo auauanga lototoa i le Galuega o le Upumoni, e le gata ina faasaoina ai i laua, ae faapena foi a laua fanau. E ui lava atonu o le a se ese nisi o mamoe, ae o loo silasila mai pea fofoga o le Leoleo Mamoe ia te i latou, ma o le a i ai se taimi, latou te lagona ai le aapa atu o aao alofa o le Atua ia te i latou ma aumaia i latou i le lafu. Po o le olaga nei po o le olaga a sau, o le a latou foi mai lava. O le a latou totogia la latou aitalafu i le faamasinoga tonu; o le a latou mafatia mo a latou agasala, ma atonu foi latou te ui atu i se ala matuitui; ae afai e taitaiina mulimuli ane ai i latou, e pei o le atalii faamaumau oa na salamo, i se tama alofa ma le loto faamagalo ma le aiga, ona aoga ai lea o mea

Atonu e maua e matua faamaoni le malosi e tumau ai a o latou mulimuli i faataitaiga a isi matua amiontu o i ai fanau le usiusitai. I le Tusi a Mamona, na fautuaina pea lava pea e le Tama o Liae ona atalii faalogogata ia liliu atu i le Alii.

tiga na oo i ai. Ia tatalo mo a outou fanau faalogogata ma le le usiusitai; ia tausia pea i latou ma le faatuatua. Ia tumau i le faamoemoe ma le faatuatua, seia outou vaaia le faaolataga a le Atua.⁶


“O se mataupu faavae i lenei saunoaga e masani ona le amanaiaina, o le tatau lea i fanau le usiusitai ona salamo atoatoa ma ‘pagatia mo a latou lava agasala’ ma ‘totogi la latou aitalafu i le faamasinoga tonu.’ Ua ou iloa o le taimi nei ‘e saunia ai e feiloai ma le Atua’ [Alema 34:32]. Afai e le salamo fanau faalogogata i lenei olaga, mata e lava le malosi o maea tuaiti o le faamauga mo i latou e galueaiina ai lo latou salamo? I le Mataupu Faavae ma Feagaiga ua tau mai ai ia i tatou, ‘O e e salamo o e ua oti o le a togiolaina, e ala i le usiusitai i sauniga o le maota o le Atua,

“Ma a uma ona latou totogi o le sala o a latou solitu-lafono, ma mulumulu mama, o le a latou maua se taui e tusa ma a latou galuega, aua o i latou o ni suli o le olataga’ [MF&F 138:58–59].

“Tatou te manatuaina na faamaumaina e le atalii faamaumau oa lona tofi, ma ina ua uma sa ia toe foi i le fale o lona tama. O iina sa talia ai ma le fiafia o ia e lona aiga, ae ua uma ona faamaumau lona tofi. [Tagai Luka 15:11–32.] E le faoa e le alofa mutimutivale le faamasinoga tonu, ma o le mana o le faamauga o matua faamaoni, e na o tuutuuga lava o le salamo o a latou fanau faalogogata ma le Togiola a Keriso, e toe maua mai ai. O le a olioli fanau faalogogata ua salamo i le faaolataga ma faamanuiaga uma e aumai faatasi ai, ae o le faaeaga e matua sili atu. E tatau ona maua atoatoa. O le fesili po o ai o le a faaeaina e tatau ona tuu atu i le Alii i Lona alofa mutimutivale.

“O loo i ai lava nai tagata o lo latou fouvele ma amioaga faatiapolo e matua tele naua ua latou ‘aveesea ai le mana e salamo ai.’⁷ O lena faamasinoga e tatau foi ona tuu atu i le Alii. Na Ia fetalai mai ia i tatou, ‘O A’u, o le Alii, Ou te faamagalo i le o le a Ou faamagaloina, ae o outou ua poloaiina ia faamagalo atu i tagata uma’ [MF&F 64:10].

“Atonu e le o tuuina mai ia i tatou i lenei olaga ia malamalama atoatoa i le auala e tumau ai noataga o faamauga o matua amiontu i a latou fanau. Atonu o loo tele atu ni punavai aoga i le galuega nai lo le mea ua tatou iloa.⁸ Ou



FAAMATLAGĀ, AIUILLI MAIA UA TAUNUUA
MA LONA NULI LE NULI O LE POLOALAGĀ,
SAUNIA E ARNOLD FRIBERG

te talitonu o loo i ai se uunaiga malosi faaleaiga a o faa- auau pea le faatosinaga a tuaa faapelepele mo i tatou mai le isi itu o le veli.”⁹

O aoaoga a Peresitene Faust ua aotele ai ma le mautu mea tatou te iloa ma lē iloa e uiga i matua amiontu ma fanau faalogogata. O le faatosinaga a matua o e faamamaluina feagaiga ma usiusitai i poloaiga o le mea moni e mafai ona maua se aafiaga faaleagaga taua tele i luga o fanau o e ua se ese e ala i le faagaoioia o aao o le Tausiga faalelagi—i auala e lei faaalia atoatoa ma e le o malamalama atoatoa i ai. Ae peitai, o faatosinaga amiontu a matua (1) e le suitulaga i le olaga o se tagata le manaomia o le togiola ma le mana faamalosiau o le Togiola a Iesu Keriso, (2) e le puleaina ia taunuuga o le faaaogaina ma le le amiontu o le faitalia, ma le (3) e le aveesea le tiutetauave o se tagata i le avea ai ma se sui “e fai . . . ae le faamalosia” (2 Nifae 2:26).

Atonu e maua e matua faamaoni le malosi e tumau ai a o latou mulimuli i faataitaiga a isi matua amiontu o i ai fanau le usiusitai. I le Tusi a Mamona, na fautuaina pea lava

pea e le Tama o Liae ona atalii faalogogata ia liliu atu i le Alii. Na “tautala atu [Liae] ia Lamana, ua faapea atu: E mau-mau e pe a na mafai ona pei oe o lenei vaitafe, e tafe atu pea i le punavai o le amiotonu!

“Ma sa tautala atu foi o ia ia Lemuelu: E, ma’umau e pe a na mafai ona pei oe o lenei vanu, e tumau ma mausali, ma lē maluelue i le tausiga o poloaiga a le Alii!

“O lenei sa tautala atu o ia i nei mea ona o le ua maaa o Lamana ma Lemuelu; ua faauta sa muimui i laua i lo laua tama i mea e tele” (1 Nifae 2:9–11).

Mulimuli ane, ina ua latalata ona tuua e Liae lenei lalo-lagi, sa ia valaaulia pea ma uunaia ona atalii faalogogata ina ia “faalogologo [atu i ana] upu” (2 Nifae 1:12):

“Ala mai ia! Ma tutulai mai i le efuefu, ma faalogo mai i upu a se matua tetete, o le ua lata ona outou faataatia i lalo lona tino i totolu o le tuugamau malulu ma ligoligoa. . . .

“Ma ou te manao ia outou manatua e tausi i tulafono ma faamasinoga a le Alii; faauta, o le mea lenei sa sili ona popole i ai lo’u agaga mai le amataga.

“Sa mamafa tele lo’u loto i le faanoanoa mai lea taimi i lea taimi, ona sa ou fefe, ne’i afio mai le Alii lo outou Atua i o outou luga i le atoatoa o lona toasa ona o le maaa o o outou loto, ina ia vavae ese outou ma faaumatia e faavavau; . . .

“E, ou atalii e, pe a na le mafai ona oo mai o nei mea i o outou luga, ae ia mafai ona avea o outou ma tagata sili ona lelei ma faapitoa o le Alii. Ae faauta, ia faia lona finagalo; ona o ona ala e amiotonu e faavavau” (2 Nifae 1:14, 16–17, 19).

Sa faaali atu le agelu a le Alii ia Alema le Itiiti ma tau atu:

“Ua faafogaina e le Alii talosaga a lona nuu, ma talosaga foi a lana auauna, o Alema, o lē o lou tamā; ona sa tatalo atu o ia ma le faatuatua tele e uiga ia te oe, ina ia mafai ona aumai o oe i le malamalama o le upumoni; o lea, o le pogai lenei ua ou sau ai, e faatalitonu oe i le mana ma le pule a le Atua, ina ia talia talosaga a ana auauna, e tusa ma lo latou faatuatua” (Mosaea 27:14).

O lenei aafiaga ofoofogia na oo mai o se vaega o tatalo a Alema—lea na faalua ona iloaina e le agelu o se auauna a le Atua. O le mea lea, e mafai e matua faamaoni ona valaaulia le mana o le lagi e uunaia a latou fanau. E ui i lea, e tumau pea ona pulea e na fanau i latou lava, ma o le filifiliga ia salamo pe leai o la latou lava. Na salamo Alema le Itiiti mai ana agasala ma fanauina i la le Agaga (tagai Mosaea 27:24), o le taunuuga lea o loo moomoo i ai ia matua uma o fanau faalogogata ma o latou loto atoa.

Ao onosai ma faapalepale pea matua i le alolofa ia latou fanau ma avea ma faataitaiga ola o soo o Iesu Keriso, o loo latou aoao atu ma le mataalia tele le fuafuaga o le fiafia a le Tama. O le tumau mausali o ia matua o le a tuuina atu ai se molimau mamana e uiga i mana togiola ma faamalosiau o le Togiola a le Faaola ma valaaulia ia fanau faalogogata ia vaavaai atu i mata fou ma faalogo i taliga fou (tagai Mataio 13:43).

O le galue e tusa ai ma aoaoga a le Faaola e valaaulia ai le mana faaleagaga i totolu o o tatou olaga—mana e faalogo ma gauai atu ai, mana e iloatino ai, ma le mana e tumau ai. O le avea ma soo tuuto ua na o le pau lea o le tali sili i soo se fesili ma luitau. ■

FAAMATALAGA

- Tagai Iosefa Samita, *Aoaoga a le Perofeta o Iosefa Samita*, tuuf. Joseph Fielding Smith (1938), 321; Iosefa Samita i *History of the Church*, 5:530; Brigham Young, i *Journal of Discourses*, 11:215; Lorenzo Snow, in Brian H. Stuy, comp., *Collected Discourses*, 5 volu. (1987–92), 3:364; Joseph Fielding Smith, i le *Doctrines of Salvation: Sermons and Writings of Joseph Fielding Smith*, tuuf. Bruce R. McConkie, 3 volu. (1954–56), 2:90–91, 179, 182–83; Bruce R. McConkie, *Mormon Doctrine*, 2nd ed. (1979), 685; Spencer W. Kimball, “Ocean Currents and Family Influences,” *Ensign*, Nov. 1974, 111–12; Howard W. Hunter, “Parents’ Concern for Children,” *Ensign*, Nov. 1983, 63; Boyd K. Packer, “Our Moral Environment,” *Ensign*,

- May 1992, 68; Russell M. Nelson, “Doors of Death,” *Ensign*, May 1992, 73; Gordon B. Hinckley, in “Prophet Returns to ‘Beloved England,’” *Church News*, Sept. 2, 1995, 4; Boyd K. Packer, “Aua le Fefe,” *Liahona*, Me 2004, 77; Robert D. Hales, “Ma Le Alofa Mutimutivale o se Matua Agamalu: O Se Savali o le Faamoemoe i Aiga,” *Liahona*, Me 2004, 88.
- Iosefa Samita, *Aoaoga a le Perofeta o Iosefa Samita*, tuuf. Iosefa Filitia Samita (1938), 321.
- Orson F. Whitney, i le Conference Report, Ape. 1929, 110.
- Joseph Smith, *The Words of Joseph Smith*, tuuf. Andrew F. Ehat and Lyndon W. Cook (1980), 241; faaopoopo le faamamafa. Tagai foi i le itulau 300.
- E faaalia e nei tususiga paia le mataupu

- faavae faapea o alii ma tamaitai o ni sui o e ua faamanuiaina ma e mafai ona faaaogaina le filifiliga saoloto ma tali atu i le Atua mo a latou amioga. E le o i ai se faamoemoega ia atoatoa le lisi: 2 Korinito 5:9–10; Kalatia 6:7–9; Mosaea 4:30; 7:30–33; Alema 12:12–14; 33–35; 34:13–17; 42:24–30; Mataupu Faavae ma Feagaiga 6:33–34; 101:78; Mose 7:32–33.
- Orson F. Whitney, i le Conference Report, Ape. 1929, 110.
- Alonzo A. Hinckley, i le Conference Report, Oke. 1919, 161.
- Tagai John K. Carmack, “Pe a Se Ese a Tatou Fanau ma Aoaoga o le Talalelei,” *Liahona*, Feb. 1997, 7; *Liahona*, Mat. 1999, 28.
- James E. Faust, “E Pele Mamoe Ua Taase,” *Liahona*, Me 2003, 68.



Zimbabwe

LAUELEELE O LE MATAGOFIE, TAGATA O LE FAATUATUA

*O loo maua i Zimbabwe se nuu faamanuiaina
o le Au Paia o Aso e Gata Ai.*

O Le Matagofie o Zimbabwe

Mafaufau i se tasi o mea Ofoofogia Faanatura e Fitu o le Lalolagi, o Victoria Falls i le tuaoi o Zimbabwe e le o le afu e sili ona lautele po o le sili ona loloto i le lalolagi—ae o le toatele ua manatu o le vai lea e sili ona tele le aofai o le vai. E sili atu nai lo se maila (1.6 km) le lautele, e palasi atu avega o vai i le faitau selau o futu (108 m) e pasasa i luga o papa o i lalo ifo. O le oolo o le palasi o le vai e oso ae ai i luga se pisi malosi lena e matuai le mafai ai ona e vaai ai i le pito i lalo o le afu i le taimi o le vaitau o le susu.


O le Victoria Falls ua na o se tasi o le tele o vaaiga ofoofogia i Zimbabwe. O loo i Aferika sautesasae, o Zimbabwe (na ta'ua muamua o Saute Rhodesia) e faatosina-mai tagata malaga mai le lalolagi atoa e malaga mai i ona paka lautele, faasao, matagofie, ma le aganuu.

Pe e te manao ai e malaga faatasi ma se malaga taamilo o le faasao pe faataitai lou lima i le folauga i vaapau i le vai aave i lalo o le Vaitafe malosi o Zambezi, e tele mea e ofoina mai e Zimbabwe—e aofia ai se nuu ua faamanuiaina o le Au Paia o Aso e Gata Ai.

O Le Ekalesia i Zimbabwe

E sili atu nai lo le 23,000 tagata o le Ekalesia e nonofo i Zimbabwe. Ua vave le faatupulaia o tagata faamaumauina i le 35 tausaga ua mavae. A o lei oo atu i le 1980 mo se faataitaiga, faatoa silia ma le 1,000 tagata o le ekalesia.

O le folafolaga faaperofeta na tuuina mai e Peresitene Spencer W. Kimball (1895–1985) i le aso 8 o Iuni, 1978, e faapea “e mafai e alii agavaa uma o le Ekalesia ona faauuina i le perisitua e aunoa ma le manatu i le ituaiga o tagata po o lanu” (Tauti-noga Aloaia 2) na i ai se aafiaga lelei i le tuputupu ae o le Ekalesia i Zimbabwe.



*O tamaiti Peraimeri
i Kwekwe, 1965.*

O le toatele o le Au Paia o Aso e Gata Ai na fesoasoani e faamalosia le Ekalesia i Zimbabwe. O se vaaiga puupuu lenei i nisi o na paionia.

Paionia o Aso Nei i Zimbabwe

Hubert Henry Hodgkiss

Na auina atu faifeautalai i Rhodesia i Saute mo se taimi faatapulaa i le amataga o le 1930. Ae e oo atu i le 1935 na aveesea mai faifeautalai uma mai Rhodesia i Saute (sa avea ma se vaega o le Misiona a Aferika i Saute) ma sa tapunia le eria ona o le le lava o faifeautalai ma le mamao o le fale o le misiona i Cape Town, Aferika i Saute.

*1927: Atalii e toalua
o se tagata na
malaga mai Aferika
i Saute o tagata muau-
mua na papatisoina
i Rhodesia i Saute.*

*1930: Ua auina atu
e Peresitene Don M.
Dalton le Misiona a
Aferika i Saute uluai
faifeautalai e galulue
i le Itu fou o Rhodesia.*

*1935: Ua taofia e
Peresitene Don M.
Dalton le auina
atu o faifeautalai i
Rhodesia i Saute.*

Ia Setema o le 1950, na auina atu faifeautalai e toa valu ina ia toe tatala Rhodesia i Saute. I le lima masina mulimuli ane, na papatisoina ai le uluai tagata na liliu mai i le eria.

Na fanau i Egelani i le 1926, na siitia atu Hubert Henry Hodgkiss i Salisbury, Rhodesia i Saute, i le 1949. Sa ia muai aoaoina e uiga i le Ekalesia mai se uo lea na sailiili i le talalelei. Na i ai ni masalosaloga o Hugh e uiga i le talalelei toefuataiina, ma sa alu atu e faamaonia i lana uo faapea o le Ekalesia e le moni. Nai lo lena, ina ua mavae se saililiga ma le totoa e uiga i le talalelei, na atinaeina e Hugh se molimau e uiga i lona moni ma filifili ai e papatiso. “Sa ou



*1950: Ia Setema, ua
taofia e Peresitene
Evan P. Wright faife-
autalai e toavalu e toe
tatala Rhodesia
i Saute.*

*1951: Hugh
Hodgkiss o le
tagata liliu
mai muamua
e papatisoina
i Rhodesia
i Saute.*

*Ua o mai le Au Paia o Aso e Gata Ai i Harare, Zimbabwe, e molimauna
le faamanuiaga o se pepe i le 1985.*



sese,” na ia ta’u atu i lana uo. “O le a ou auai i le Ekalesia.”¹

Na papatiso Hugh i le aso 1 o Fepuari, 1951, ma faailogaina ai le uluai papatisoga o se tagata liliu mai i Rhodesia i Saute. Sa ia fiafia i le i ai faatasi ma tagata ma faia ni uo i soo se mea sa alu i ai o ia. O lona natura faauo na mafai ai ona ia faia se saofaga tele i le tuputupu ae o le Ekalesia i le eria.

I le 1959 na avea ai Hugh ma peresitene o le Paranesi i Salisbury. O ona fesoasoani o ni tagata foi o le ekalesia o le lotoifale. O le taimi muamua lenei ua i ai i le au peresitene o le paranesi ni tagata o le ekalesia o le lotoifale. I le taimi muamua, o faifeautalai sa faatumuina i taimi uma ia tiutetauave o le au peresitene o le paranesi.

Ernest Sibanda

Na feiloai Ernest Sibanda i ni faifeautalai se toalua Mamona o loo tietie i ni uila—Elder



O se gaoioiga a alii talavou a le siteki o Gweru i le taumalulu o le 2012.

Ua seleseleina e alii talavou ma o latou taitai le saito, ona aai ai lea ma le fiafia o meaai ma taaalo soka.


1959: O le fai-
feautalai muau-
mua na iloa ua
auauna atu mai
Rhodesia i Saute,
o Jean Wood,
na auauna atu
i le Misiona a
Aferika i Saute.



1964: Ua avea
Rhodesia i matu
ma Zambia, ma
ua avea Rhodesia
i Saute ma
Rhodesia.

1978: Ua faatu-
laga e Peresitene
E. Dale LeBaron
le uluai Au Pere-
sitene o le Itu o
Rhodesia.

1980: Ua faa-
laiviloaina e
Peretania Tele
le tutoatasi o
Rhodesia; ua
suia le igoa o
le atunu ia
Zimbabwe.



1985: Ia Aokuso
24–25 ua
faapaiaina le
Malumalu o
Johannesburg
Aferika i Saute.

Black ma Elder Kaelin—i a Tesema i le 1978. Na la tuua ai se Tusi a Mamona ia te ia. A o lei oo i le la asiasiga, ua uma ona faaaluina e Ernest le tele o tausaga i le suesueina o matapu faalelotu. O le mea moni, sa avea o ia ma se faiaoga mo lana ekalesia mo le iva tausaga, ma se faifeau mo le tolu tausaga.

O le po na maua ai e Ernest lana kopi o le Tusi a Mamona na ala ai o ia seia oo i le 2:00 i le taeao i le fai-tauina ma le naunautai o lana tusi. Sa le mafai ona faatali e feiloai i faifeautalai i le aso na sosoo ai. Na ta'u atu e Ernest ia i laua sa tele atu mea ua ia aoaoina mai ia Iosefa Samita e uiga ia Iesu Keriso nai lo faifeau uma sa ia masani ai. Na vave lava ona papatiso Ernest mulimuli ane, sosoo ai lea ma lona toalua ma lana fanau i ni nai vайaso mulimuli ane.

O le aso o lona papatisoga, sa ia tusia, "sa ou lagonaina lava le saoloto. Sa ou lagonaina le faamaloloina mai mea leaga taitasi. Na ou iloa o loo i ai le alofa ia te au mo lo'u aiga. Sa ou iloa sa i ai le alofa i totonus ia te au mo le Ekalesia."²

Na faamaonia o Ernest Sibanda na avea ma se malosiaga tele i le Ekalesia. Sa auauna atu o ia o se peresitene o le

Aoga Sa, failautusi o le paranesi, ma le fesoasoani lua i le au peresitene o le paranesi. Na ia faataunuina foi se tofiga mai le peresitene o misiona a Aferika i Saute e faaliliu viiga mai le Igilisi i le faaShona.

Edward Dube

I le konafesi aoao ia Aperila 2013, na valaaulia ai Edward Dube e avea ma se sui o le Korama Muamua a Fitugafulu, ua avea ai o ia ma tagata muamua mai Zimbabwe i le Pulega Aoao o le Ekalesia. O lenei mea ua na o se tasi o mea e aupito lata mai o le tele o mea muamua mo Elder Dube. Sa avea foi o ia ma uluai tagatanuu e peresitene i le siteki, tagatanuu muamua e peresitene i le misiona, tagatanuu muamua e fitugafulu o le eria mai Zimbabwe. O Elder Dube ua avea ma se paonia moni o le taitaiga amiontonu.

A o lumanai na mea uma, e ui i lea, sa i ai se isi muamua mo Elder Dube: lona aso muamua na auai i le lotu. Toe lua tausaga alu o ia i le lotu mo le taimi muamua, na tuuina atu ia te ia se Tusi a Mamona e se tagata o le au Paia o Aso e Gata na faigaluega ai o ia. Na faitau e Elder Dube le Tusi a Mamona ma lagonaina lana uunaiga ma le mana.




1987: Ua faatulagaina le Misiona a Zimbabwe Harare mai le Misiona a Johannesburg Aferika i Saute.



Ia Fepuari i le 1984, na talaina ai e Elder Dube se valaaulia e auai i se sauniga anapogi ma molimau i se paranesi i le lotoifale. Sa ia lagonaina le matuai popole lava ina ua ulufale atu i le falesa na toeitiiti lava faliu i tua ma savali i fafo.

Ae ui i lea, e lei umi, ae amata ona sua lagona o Elder Dube i le taimi lava na tulai ai le peresitene o le paranesi ma molimau atu i le Tusi a Mamona. O se molimau o le Tusi a Mamona o se tasi o vaega na lagonaina e Elder Dube ua laugatasia ai. Sa ia tulai ma faasoa atu ona lava manatu ma lagona o le Tusi a Mamona, ina ua uma ona tuuina mai e isi tagata ni molimau.

1991: I le aso 25 o Oketopa ua faapaiaina e Elder James E. Faust (1920–2007) o le Korama a Apostolo e Toasefululu a Zimbabwe mo le talaiga o le talalelei.



I le 1994 na savали ai Peresitene Beloved Mundera faatasi ma lona aiga i le silia ma le tasi le maila (1.6 km) i le lotu i Aso Sa uma, ma ave i lana uilipaelo mea uma e manaomia e lana paranesi mo sauniga.

1994: Ua faafaigaluega e le Ofisa o Aoga a le Eklesia Edward Dube e avea ma faatonu o le atunuu. Sa ia faatuina seminar ma inisitituti i Zimbabwe atoa.

1998: Ua asiasi atu Peresitene Gordon B. Hinckley (1910–2008) i Zimbabwe, ma lauga atu i le pe tusa ma le 1,500 o le Au Paia o Aso e Gata Ai. Na auai i ai le tele o taitai o le malo.

O le taimi lava na maea ai lena uluai sauniga faamanatuga, na amata loa e Elder Dube ona sailiili i le Eklesia i le punouai. Sa papatisoina o ia i ni nai masina mulimuli ane. Ona auauna atu ai lea o ia o se faifeautalai faamisiona i le Misiona a Zimbabwe Harare. Na faaipoipo atu Elder Dube ia Naume Keresia Salizani i le aso 9 o Tesema, 1989. E toafa le la fanau.

Ua vaaia e Elder Dube le tele o lugā ma lalō mo le au Paia i Zimbabwe ona o faalavelave faaupufai. I nei mea uma, sa faalagolago o ia i le Alii mo le malosi ma le taitaiga. “Ou te toe tepa i tua i lo’u olaga ma ou te matuai lagona le loto faafetai,” o lana tala lea. “O le talalelei ua avea ma mea uma i lo’u olaga”³

“Ia te au, o Elder Dube o se Polika Iaga po o se Uilifoti Utilafi o Zimbabwe,” o le tala lea a Peresitene Keith R. Edwards, o se tasi sa avea muamua ma Fitugafulu o loo avea nei ma peresitene o le Nofoaga Tutotonu mo le Aoaoga o


Faafaifeautalai i Egelani. O Peresitene Edwards sa avea ma peresitene o le misiona i le Misiona a Zimbabwe Harare mai le 2000 i le 2003 ma sa galulue mo se taimi umi ma Elder Dube, o lē sa avea ma peresitene o le siteki i le taimi lea. “Ua na ona i ai ia Elder Dube se vaaiga mamao o le mea e mafai e le talalelei ona fai ma le auala e tatau ona fai ai.”⁴

Taumafaiga Faafaifeautalai i Zimbabwe

I lona taimi i Zimbabwe, na molimauina patino e Peresitene Edwards le tuputupu ae o le Eklesia i se lauelele ua faateleina ma faateleina le opoina mai o le talalelei. “O tagata o Zimbabwe e olioli i le olaga,” o le tala lea a Peresitene Edwards. “E fiafia i latou ma, o lo latou natura, e matuai faaleagaga lava. E matuai faigofie lava ona aoao i latou.”

Na faamalamalama mai e Peresitene Edwards o le pine a faifeautalai—ona o loo

TUPUTUPU AE O TAGATA O LE EKALESIA I ZIMBABWE




1999: Ua faatulagaina le uluai siteki a Zimbabwe i Harare. Ua lolomiina le lomiga muamua atoatoa o le Tusi a Mamona i le faaShona, o se gagana masani a Zimbabwe.



2007: Ua lolominaina le fusitolu (Tusi a Mamona, Mataupu Faavae ma Feagaiga, ma le Penina Tau Tele) i le faaShona.

2009: Ua avea Edward Dube ma uluai tagatannuu e peresitene i le misiona e auauana atu i Zimbabwe.



2013: Ua valaauna Edward Dube i le Korama Muamua a Fitugafulu, ua avea ai o ia ma Pulega Aoao muamua mai Zimbabwe.

i ai le igoa o le Faaola i luga—o se tasi o au-
ala aupito faigofie mo faifeatalai e amata ai
talanoaga o le talalelei ma tagata o Zimbabwe.
E masani ona faitau e tagata o le lotofiale le
igoa o le Eklesia ma amata ona fiafia i le lotu.
“Latou te fai mai, ‘O i matou foi o uo a Iesu
Keriso.’ O se sootaga vave,” le tala a Peresitene Edwards.

O loo i ai pea le tele o taitai o le lumanaia ma
paionia o loo taliaina le Eklesia i taimi uma
i Zimbabwe. “E pisi faifeatalai i taimi uma,”
o le tala lea a Peresitene Edwards. ■

FAAMATALAGA

1. Mai ia Greg Hodgkiss, otootoga o le olaga o Hubert Henry Hodgkiss, 26 Iuni, 2012, faila o le tulaga o le atunu o Zimbabwe, Faletusi o Talafaasolopito o le Eklesia, Aai o Sate Leki.
2. *All are alike unto God*, ed. E. Dale LeBaron (1990), 129.
3. Edward Dube, i R. Scott Lloyd, “New General Authority: Elder Edward Dube,” *Church News*, 20, Ape. 2013, ldschurchnews.com.
4. Mai se faatalanoaga ma Keith R. Edwards, 24, Ape. 2013.

FAITAU FAAFUAINUMERA O LE EKALESIA I ZIMBABWE*

Aofai o tagata: 23,727

Misiona: 1


Uarota ma paranesi: 60

Nofoaga autu o talafaasolopito o aiga: 4

*Ia Iuni 2013

Taitai o le Uarota a Kwekwe ma faifeatalai, i le 2011.





Lē Maluelueina

A o matou liliu atu i le Alii i le tuanai ai o le mafuie, na faamanatu mai ai ia i matou le taua o le manatua pea o Ia.

Saunia e Reid Tateoka

Sa avea muamua ma peresitene o le misiona a Sendai i Iapani

A so Faraile, 11 o Mati, 2011, 2:46 p.m.;
Kōriyama, Iapani; falesa o Kōriyama, fogafale
lona lua.

O faifeatalai e sefululima i le ogatotonu o le fonotaga faaleaoaoga a taitai ua amata ona faataitai le aoao atu e uiga ia Iosefa Samita. A o faatumulia le potu e le savali o le faamoemoe ma le toafilemu, ua amata ona galulu faamalama. Ua faateleina le pisapisao. O le mea na amata o nigarette laiti ae ua faateleina i le gapa leotole.

Na matua lue le fale mai lea itu i lea itu, ma na faateleina le saoasaoa ma le malosi o le lue fale seia oo ina avea o se faataamilosaga faaaauau pea se tasi o le galulu. O le tu i luga ma le savali e toetoe lava a le mafai. O nisi faifeatalai ua taumafai e lalafi i lalo o le laulau—seia oo ina lafoina laulau i le isi itu o le potu. O le fale, le aai, e oo lava i le

itumalo atoa na faataamilomilo le aluga e pei o le a pa ma matala le lalolagi. Ua manumalo se manatu se tasi: “Ia aveese faifeatalai mai iineil!”

O Lo Matou Faasaoga Faavavega

I le avea ai ma peresitene o le misiona o le Misiona a Sendai i Iapani, sa ou aoaoina faifeatalai ma tagata o le ekalesia mo le tele o masina e “liliu atu i le Alii” (Mosaea 7:33). O le taimi lenei, a o ou liliu atu ia te Ia mo le taitaiga faalelagi, na vave oo mai le musumusuga: “Tatala le faitotoa—fatu ai se ala e sosola ese ai.” Sa ou iloaina e tatau ona ou tatalaina le faitotoa a o lei solo i lalo le faalo, ma lokaina ai i matou i totonu. O lea na ou faanatinati atu ai i le faitotoa ma tatala. “O i fafo mai iineil!” Sa ou alaga atu ai.



Na faataumaoia e le mafuie ia Mati 2011 ma le taunuuga o le galulolo aai e tele i lapani i matu (e pei o le Aai o Miyako, i luga), na fasiotia le afe o tagata ma e faitau selau o afe na leai ni aiga.

Sa tautevateva atu faifeatalai i le fola o loo fealuai, maluelue, ma papatutui agai atu i le faitotoa o loo matale; ona latou agai atu lea i lalo o le faasitepu ma o ai i fafo o le falesa. O le taimi lava na oo ai i fafo, na matou lagonaina ua sili atu le saogalemu, e ui lava matou te lei saogalemu lava mai le mala. Na suia le tau i le matuai maatiati le malulu, ma na sasa o matou mata e le kiona.

I le isi itu mai le falesa, na palalasi i lalo maa faamanatu i le fanua maliu o se lotu Puta; na nuti lilii le puipui o le fanua maliu. Na foa se tae tele agai i luga o fogafale uma e 12 o se fale mautotogi i tua atu o le falesa. Na solo i lalo mai le puipui ni poloka sima tetele o luma o se aoga tulagalua i le isi itu. Na lelea ese faamalama, ma na otāotā le eleele i tioata taei. I le isi itu o le auala, na fola ua nuti ninii se taualuga lanumoana maa. Na ou faapotopotoina faifeatalai e 15 i le paka o le eklesia, ma na matou tuuina atu le faafetai i lo tatou Tama Faalelagi mo lo matou puipuiga ma ole atu mo Lana fesoasoani faifai pea.

O A Matou Tatalo Faafetai

Na i ai le popolevale i le aai atoa. Sa fefefe i latou nei aunoa i latou ma ni meaai, na amata e tagata ona faatauina

mea uma latou te vaia. Na vave ona taulia uma falaoa ma le susu, ma i totolu o ni nai itula na le toe maua se falaoa i le aai atoa. Na iu ina tai maila le uumi o laina i pamu kesi.

E ese mai le atuatuvalo o tagata i luga o alatele, sa matua toafilemu lava faifeatalai. Na matou ofoina atu tatalo o le faafetai, ma sa matou lagonaina se faamautinoaga toafimale o le a lelei mea uma.

Na le mafai ona matou tuua le aai—sa faaleagaina auala ma na tapunia alatanu, ma sa leai ni nofoaafi po o ni pasi e feoai. O tagata sa faatalitali mo itula i laina uumi e faatau penisini na le taliaina. Na ulu atu leoleo o le malo i se faiga talafeagai i fale taitasi, e faasalaina nisi ae taliaina isi ona o fale e nonofo ai. O lea na matou nonofo ai i le po i ni nofoaga autu mo le faasaoina ma le isi toatele e pei o i tatou, e le mafai ona toe foi i o latou aiga.

Avea ma Soo i le lotolotoi o Faanoanoaga

O le aso na sosoo ai, o le Aso Toonai, na matou amata pei ona masani ai i le suesueina o tusitusiga paia ma le tatalo. O lena aso, na faapitoa lava lo matou manaomia o le fesoasoani a lo tatou Tama Faalelagi. Ina ua uma suesuega i tusitusiga paia, sa ou faatulagaina loa faifeatalai i ni vaega.

O le tasi vaega e o i le falesa e fesoasoani e faamama ona galulue lea ma le peresitene o le paranesi e toe faaleleia fare o tagata lotu. Sa asiati atu se tasi o vaega i leoleo o le aai ina ia iloa ai pe sa saogalemu le ulu atu i falemautotogi o faifeautalai. O le isi vaega na siaki pe o feoai nofoaafi ma pasi. E toatele isi sa tutu i laina e maua mai ai le vai a o isi na saili mo ni meaai. I se tasi soa na maua se tofiga faapitoa: saili se falaoa mo le faamanatuga i le aso Sa. Sa ou galue i le aso atoa e taumafai e faafesootai faifeautalai uma i le misiona.

O lena aso na matou lagonaina ai le taitaiga a lo tatou Tama Faalelagi i mea uma na matou faia. Na feiloai faifeautalai na tutu i le laina mo le vai i ni alii se toalua na la faasoa atu i ai le talalelei. Sa faasoa atu e faifeautalai a la molimau i le alofa o le Atua ma aumaia nei alii e toalua i la matou sauniga molimau i le afiafi, ma le lotu i le aso na sosoo ai.

Na vave aoaoina e tuafafine o e na sailia ni meaai mo i matou sa taialaina e le Atua o la tulagavae. Ina ua le mafai ona maua se mea i faleoloa, na latou maua ni meaai i nofoga latou te lei mafaufauina, e pei o lalo i auala tuufua i se



O LE FAAMOEMOEAGA O TOFOTOFOGA

"O lo tatou Tama Faalelagi, o le o loo tuuina mai ia i tatou le tele o mea e fiafia ai, ua la silafia foi tatou te aoao ma tuputupu ae ma malosi atili ao tatou fetaiai ma manumalo mai tofotofoga ia e tatau ona tatou pasia. ... O ia faigata e faatagaina ai i tatou ia sua mo le lelei sili atu, ia toe fausia o tatou olaga i le ala ua aoao ai i tatou e lo tatou Tama Faalelagi, ma ia avea ma se tagata e ese mai le tagata sa tatou avea ai - ia lelei atu nai lo le mea sa tatou i ai, sili atu ona malamalamana nai lo le mea sa tatou i ai, sili atu ona tigaalofa nai lo le mea sa tatou i ai, faatasi ai ma ni molimau malolosi atu nai lo a tatou molimau sa i ai muamua."

Peresitene Thomas S. Monson, "Ou Te Le Tuua Lava Oe, Ou Te Le Tuulafoai Lava la te Oe," *Liahona*, Nov. 2013, 87.

faleoloa e tasi le potu. Na tuuina mai ia i matou "meaai e tatau ma le aso" (Mataio 6:11).

I le faaiuga o le aso na matou toe lipoti atu i lo tatou Tama Faalelagi. E lei leiloa lava la matou taulaiga. Sa avea pea i matou "[ma] soo o Iesu Keriso," o e na "ua Ia valaauina e talai atu lana afioga i totonu o ona tagata, ina ia mafai ona latou maua le ola tumau-faavavau." (3 Nifae 5:13).

O Le Malosi o le Tama, Mana, ma le Filemu

I lena afiafi sa matou lagonaina se manaomia tele atu mo le malosi ma le mana o lo tatou Tama Faalelagi. Sa matou manaomia Lona Agaga e faatasi ma i matou. O lea na fai ai la matou sauniga molimau i le falesa. Na faafetai atu faifeautalai i le Alii mo le tuuina mai o a matou meaai e tatau ma le aso, ma sa latou iloaina sa taitaia, taialaina, faatonutonuina, ma puipuia i matou. Sa latou iloaina e toatele isi sa matuai le faamanuiaina ma le a le toe vaai i se isi laoso. E moni lava sa matou "puapuagatia i mea uma, a e le faaatuatuvaleina; [sa] fememeai, ae le matua fememeai; . . . ua lafoina i lalo, a e le fano" (2 Korinto 4:8–9).

Na molimau mai uma faifeautalai i le filemu na latou lagonaina. Na latou molimau mai na puipuia i latou e le Atua ma faatoofilemuina o latou agaga. Sa lamatia i latou i le otu ae sa le fefefe. Latou te lei mauaina ni vai, meaai, po o le mafanafana na manaomia latou te ola ai mo se taimi umi, ae sa tausia i latou i le vai ola; safafaga i latou i le afioga a le Atua; sa faamafanafanaina i latou e le Agaga. I totonu o le matou vaega ititi o faifeautalai, e leai se tasi sa fefe. Na lagona e faifeautalai taitoatas i le mana faamalosiau o le Atua i le po lena ma lagona le latalata atili atu i le Atua nai lo se isi lava taimi muamua.

A o faaiuiu lena aso, sa matou faafetai ua matou feola. Sa matou faafetai atu i le Alii mo le fesoasoani na Ia tuuina mai ia i matou i ni auala manino lava. Sa matou faia lea ni tofitofiga mo a tatou sauniga tapuai i le aso na sosoo ai ma tuua le falesa e auai i le tele o isi tagata ua leai ni aiga mo se taimi le tumau i le maota autu mo le faasaoina.

O Le Falaoa o le Faamanatuga

Ae na faapitoa lava le le fiafia o alii faifeautalai e toalua. Na talosagaina i laua ina ia aumai le falaoa mo le



E pei o le faasaoina o matou ola e lei lava lea, na faamautinoa e lo tatou Tama Faalelagi faapea o le a mafai ona matou “manatua pea” Lona Alo.

faamanatuga i le aso na sosoo ai ae na le faataunuina le la galuega atofaina.

Ina ua matou taunu i le nofoaga autu mo le faasaoina i le afiafi o le aso Toonai, na toe faafeiloaia i matou e tagata faigaluega o le aai. Sa latou faamalie mai sa latou tuuina mai ia i matou ni nai meaai laiti (20 masi) e aai ai i le aso ua tuanai ona ataata lea a o latou tuuina mai ia i matou le vaega o meaai o le aso na sosoo ai: se fagu vai ma le valu fasi falaoa.

Na tilotilo mai ia te au au alii faifeatalai e pei o loo faapea mai, “E faapefea ona mafai ona faamanuiaina e le Alii i tatou i se isi auala?”

O le Atua, o le e silafia le pa’ū o se manuiti, sa toe aapa atu, e peiseai o le faasaoina o matou ola e lei lava. Na faamautinoa e le Tama Faalelagi o lea matou mafai ona “manatua pea” Lona Alo (MF&F 20:77). Sa sili atu lo matou latalata atu i lo matou Faaola nai lo se isi lava taimi i o matou olaga.

Sa tuuina atu e faifeatalai se tatalo faapitoa i lena po. Na latou faapauu ifo i o latou tulivae e faafetai atu i lo tatou Tama Faalelagi mo se isi vavega i se faasologa o vavega faapitoa. Sa latou malamalama i le mea e faamuamua ua tuuina mai e le Atua i la tatou feagaiga e manatua pea Iesu Keriso, ma sa latou faafetai mo le alofa mutimutivale ma agalelei o se Atua alofa o le e faatagaina i tatou e tagofia le faamanatuga i vaiaso taitasi.

O nei faifeatalai ua molimau nei, ma le talitonuga maoae sili atu nai lo se isi lava taimi muamua, e finagalo le Atua ia i tatou ia manatua pea Lona Alo, o Iesu Keriso. ■

O le mafuie i le 2011 i Tōhoku na tupu i le 70 kilomita (tusa ma le 45 maila) mai le Peninsula o Oshika ma na lesitaina i se malosi e 9.0, o se tasi o mafuie e lima e sili ona malolosi na fuaina talu mai le faamaumauga fou tusitusia na amata i le 1900.¹

O faifeatalai Sendai uma sa faafesootaia po o saogalemu i totonusi ni aso talu le mafuie.

FAAMATALAGA

1. “Managing post-disaster debris: the Japan experience” (United Nations Environment Programme, Iuni 2012), 5, unep.org/disastersandconflicts.



Saunia e Elder
Tad R. Callister

O Le Au
Peresitene o
Fitugafulu



○ Le Tulaga Faatonuina o le

OLA MAMA

a le Alii

I ni nai tausaga ua mavae o lo'u tama, o se loia, sa galue i se faamasinoga. Mo le lagolagoina o lona tulaga, na ia ta'ua ai se faamasinoga e tasi—o se faamasinoga i le Faamasinoga Maualuga a Kalefonia na faia i le tele o tausaga ua mavae. Na ta'ua e le na agaia o ia se aofaiga o faaiuga a le faamasinoga maualalo e sili ona lata mai.

Sa fai mai le faamasino i lo'u tama, "Lau Susuga Callister, e le o i ai sau faamasinoga e sili ona lata mai nai lo lenei?"

Na tilotilo atu lo'u tama i le faamasino ma tali atu, "Lau Afioga e, e mafai ona ou faamanatu atu ia te oe e faapea, pe a fetalai le faamasinoga maualuga i se mea, e manaomia le na o le faatasi ona talanoa i ai. Sa luelue le ulu o le faamasino i le faamaoniga. Sa faamanatu atu ia te ia o le faamasinoga maualuga e faaleaogaina faaiuga uma o le faamasinoga maualalo, po o le a lava le tele po o le lata mai e mafai ona i ai.

E faapena foi ma le Atua lo tatou Tama—e manaomia ona ia saunoa i le na o le faatasi i le mataupu o le ola mama, ma o lena tautinoga e tasi e

faaleaogaina ai manatu uma o faamasinoga maualalo, pe tuuina mai e tagata faapitoa o faiai, faufautua, tagata fai polokiki, uo, matua, po o le au faiupu o le aso.

E toetoe lava a le talitonuina e mafaufau faapea ua tuuina e le Atua i Lana fanau le mana e sili ona taua ma paia ia te Ia—o le mana e foaoa ai le ola. Talu ai na tuuina mai e le Atua ia i tatou lenei mana, o Ia, ma e na o Ia lava e toatas, e i ai le aia tatau e faatulaga ai pe faapefeta ona tatau ona faaaoga.

E faafeagai mai le tele o lagona lautele, e leai se mea leaga pe faatapulaaina e uiga i tulaga faatonuina a le Atua. Nai lo lena, e lelei, faagaeetia, ma faamaloloina ai. Latou te fausia ni sootaga o le faatuatuina, e faaleleia atili ai lagona lelei faaletagata, latou

**O la tatou filifiliga e usitai
pe le usitai i le tulaga
faatonuina a le Atua o le
ola mama o le a fuafuaina
lo tatou fiafia i le olaga.**

te atiina ae ai se mafaufau mamā, ma latou te valaaulia le Agaga o le Alii e faamanuia ai olaga o le tagata lava ia ma olaga faaipoipo. O i latou o ni tulaga faatonuina ua faamonia mo faaipoipoga fiafia ma nuu malolosi.

O le a, la, le tulaga faatonuina a le Alii mo le faaaogaina o le mana paia o le foaoaina o fanau—Lana tagavai o le ola mama? O le mea moni, o tulaga faatonuina a le Alii o le ola mama e le na o se lisi o aua ma fai ae o se mataupu faavae, lea e mafai ona faamatalaina faapenei: O le mana e foafoa ai fanau e ao ona faatinoina i le sootaga faale-faaipoipoga mo mafuaaga autu e lua: (1) ia fusifusia ai ma faamalolosia ai sootaga i le va o taito-lua ma le (2) ina ia aumaia ai agaga i le lalolagi. O nei faaaogaina ua i ai le faamoniaga ma le faamaoniga a le Alii.

I le isi itu, o le mana e foafoa ai fanau e le tatau ona faatinoina i fafo atu o le sootaga o le tane ma le ava. O lea la, so se manatu maua'i po o se faatinoga ofu atu e faaosofia ai po o le taunu ai i le faaalia o le mana e foafoa ai fanau i fafo atu o le sootaga faale-faaipoipoga e le talia-inia e le Alii.

Ou te sii maia nei nisi o tulaga faatonuina a le Alii o le ola mama ina ia faaitiitia ai soo se malamalama sese pe faauiga lua.

FAITAAGA MA LE MULILUA

Sa faasa e le Alii le faitaaga ma le mulilua e ui lava i lagona o le lalolagi i nei amioga. O nei faatinoga ua i ai le faaaogaina sili o le mana e foafoa ai fanau i se tasi o le isi itupa tatou te leo faaipoipo faaletulafono. O le faitaaga lena pe afai e lei

faaipoipo se toatasi; o le mulilua pe afai o le toatasi po o tagata uma e toalua ua faaipoipo.

Na fai mai le Aposetolo o Paulo, “*O le finagalo foi lenei o le Atua, . . . ina ia faamamao outou ma le faitaaga*” (1 Tesalonica 4:3; faaopoopo le faamamafa). Sa fai mai foi o ia, “Tou te le Iloa ea o le amioletonu e le fai mo latou tofi le malo o le Atua? Aua ne’i faaseseina outou: *o e faitaaga . . . ma e mulilulua . . . e le fai ma o latou tofi le malo o le Atua*” (1 Korineto 6:9–10; faaopoopo le faamamafa).

O nisi taimi e le iloa e tagata le matautia o nei soligatulafono pe, i nisi tulaga, e faatuatanai ese. O Korianetona na foliga mai e le iloa le matautia o le mea ina ia faia le agasala ma le fafine talitane o Isabela. Sa tuu ai e Alema, lona tama, lona tulaga matautia: “Ua e le iloa ea, lo'u atalii e, o nei mea o ni mea inosia i le silafaga a le Alii?” Alema 39:5). Na talanoa foi Iosefa i lenei mea leaga tele ina ua faaososooina o ia e le ava a Potifar: “Pe faapefea ona ou faia lenei mea leaga tele, ma agasala ai i le Atua?” Kenese 39:9).

TAGOTAGO LE TALAFEAGAI

O le tagotago le talafeagai e faaosoina ai le lagona o le mana foafoa. O lea la, i le tulaga ae lei faaipoipo, e le tusa ai ma le tulaga faatonuina o le ola mama a le Atua le tago i vaega patino po o le paia o le tino o se isi, e tusa pe o faia ni lavalava pe leai foi.¹

SAUAINA- FAALETAGATA

E ta’usalaina e le Alii le sauaina-faaletagata. O le sauaina-faaletagata



**O tulaga faatonuina
o le ola mama a le Atua
e fausia ai sootaga o le
faatuatuaina, faaleleia atili
taua faaletagata, atiina ae ai
se lotofuatiaifo manino, ma
valaaulia le Agaga o le Alii e
faamanuia olaga o le tagata
lava ia ma faaipoipo.**

o le faatinoga o le faaosofia o le mana e foafoaina ai fanau o le tino o le tagata lava ia. Na saunoa mai Peresitene Boyd K. Packer, Peresitene o le Korama a Aposetolo e Toasefululua:

"Aua nei tausalaina i le tagofia po o le taalo i lenei mana paia o le foafoaga. . . .

". . . E le fiafia i ai le Alii, pe e le lelei foi ia te oe. E te le lagona ai le agavaa po o le mama."²

SOOTAGA O LE ITUPA E TASI

O nisi e taumafai e faatalitonu i tatou o le tulaga o le Ekalesia i sootaga faaletino o le itupa e tasi o se aiaiga faavae e le tumau ma e le o se mataupu e faavavau. O lena ituaiga o talitonuga e le tusa ai ma tusitusiga paia, faatasi ai ma upu a perfeta o aso nei, ma le ata o le faaolataga, o loo aoaoina uma maai le manaomia o le faaipoipoga e faavavau i le va o se alii ma se tamaitai o se tulaga i le faaeaga. O se sootaga i le itupa e tasi e le tusa ai ma le mamanu a le Atua e faavavau o tane ma ava e le gata ina i ai fanau i le olaga nei ae i ai foi le faatoateleina e faavavau i lo latou tulaga faaeaina.

Tatou te iloa o tagata taitoatasi o se atalii po o se afafine o le Atua, ma e tatau ai le taulimaina faapea. Tatou te tauivi uma ma le le atoatoa, o nisi e le o la tatou filifiliga. Ae tatou te talitonu foi i le Togiola le i'u e i ai le malosiaga i lenei olaga po o le olaga a sau e faaeeina mai ia i tatou le mana uma e tatau ai e liliu ai o tatou vaivaiga ma lē atoatoa i ni malosiaga. Na folafola mai e le Alii ia i tatou, "Afaí latou te faalotomaualalaloia i latou lava i ou luma, ma faatuatua mai ia te au, ona ou faia lea o mea vaivai ia avea ma mea malolosi ia te i latou." (Eteru 12:27).

O i latou e i ai naunauga o le itupa e tasi ua i ai se tiute e (1) aloese mai le sootaga le mama ma le (2) faia mea uma i lo latou malosi ia avanoa ai i latou lava i mana faamainaina, ma le faaatoatoaina o le Togiola. Mo se taimi le tumau, e ui i lea, o i latou e i ai faanaunauga o le itupa e tasi ae le faatinoina ua agavaa e umia ia tofiga o le Ekalesia ma maua se pepa faataga o le malumalu.³

AVE O LE FILI

Ou te faasoa atu nei ni faailoga matautia e muamua atu i nisi o agasala sa ou ta'ua. I nisi tulaga, o Satani e pei o se

fee e taumafai e pueina i tatou. Pe afaí e le aoga le ave e tasi, o le a ia taumafai le isi ma le isi seja oo ina ia maua se ave e mau lana pue. O nisi nei o ave a le tiapolo ua mama-nuina e faaosofia ai i tatou e solia le tulaga faatonuina a le Atua o le ola mama.

Ponokalafi

E finagalo le Atua i Ana fanau ia le matamata i ni atatifaga po o le TV, o i soo se uepisaite, po o le matamata i

soo se mekasini e faaponokalafi i soo se itu. O le ponokalafi o soo se ata po o faamatalaga e faafafia ai tuinanauga o le tagata. O se mea *inosia* i le Agaga o le Alii.

E leai se tasi e mafai ona faapea mai e tau faasese e aafiafa o ponokalafi, ma le talitonu o loo i ai se mea faapea ua na o se tepa mama. O se gata oona, inosia, ma le le faamagaloina lena o le a osofaia i le taimi lava e te faia ai lau vaai muamua ma o le a faaauau ona osofaia i le faaaogaina o se vaega atoa o le tui oona faaleagaga i vaai taitasi mulimuli ane.

Afaí o e tigaina i lenei gasegase, e tatau ona e faia mea uma i lou malosi e manumalo ai. Atonu e manaomia ai le tautau atu, tatalo malosi, anapogi, faatofuina i tusitusiga paia, sui le taimi o le paie, i ni taimi aoga, tuuina atu o tapulaa maoti i le faaaogaina o le Initonetia, fautuina faapolofesa, ma isi taumafaiga, ae e mafai ona e manumalo ai. I nisi taimi o le a avea ai le finafinai o se vaega taua tele—e leai se fualaau po o se metotia faafautuaga e foia uma ai vaisu.

Laei Letauagafau

O o tatou ofu e aafia ai e le gata i o tatou mafaufauga ma amioga ae faapena foi mafaufauga ma amioga a isi. E faapena foi, na fautuina e Paulo le Aposetolo "fafine [e] teuteu ia i latou i ofu e onomea" (1 Timoteo 2:9).

O le auala e fai ai ofu o se tamaitai e i ai se aafiafa malosi i mafaufaugia ma lagona o alii. Afaí e maualalo tele pe ua maualuga tele po o le fufusi tele, e mafai ona uunaia ai mafaufaugia le lelei, e oo lava i le mafaufaugia o se alii talavou o loo tauivi ina ia mama.⁴

E mafai e alii ma tamaitai ona foliga lalelei ma matagofie laei, ae e mafai foi ona latou tauagafau. E faapitoa lava le mafai e tamaitai ona laei tauagafau ma i le faagasologa ua

**O ni manatu malamalam
po o le faatinoga ma le
manatu i ai e faaosofia
ai pe taunu ai i le
faatinoina o le mana
foafoa i fafo atu o le
sootaga o le faaipoipoga
e le taliaina e le Alii.**

saofaga i lo latou lava ttau faaletagata ma i le mama aiai o alii. I le faaiuga, o le tele o tamaitai latou te maua le ituaiga alii o loo fai agai i ai o latou ofu.

Mafaufauga le Mama

Na ttau faapea, “E mafai ona e matamata i manulele o felelei ane; ae aua lava nei faatagaina i latou e fausia se faamoega i luga o lou ulu.” E leai se mea sese i le matauina o le tamaitai talavou po o le alii talavou aulelei a o la savavalu ane—o se mea masani. Ae afai e liua na mafaufauga i le manao, ona fauina loa lea o le faamoega.

E le mafai ona tatou aloese mai le vaaia o laupapa o faasalalauga uma e le talafeagai po o se tagata o loo laei le tauagafau, ae mafai ona tatou tulieseina le mafaufauga le lelei i le taimi lava e oso mai ai. O le agasala e le o i totonu o se vaaiga faafuasei o se mea le lelei; o le agasala o le mafaufau lea i le mafaufauga i le taimi lava e sau ai. Ua ta’u mai e tusitusiga paia ia i tatou, “Aua e pei ona manatu o ia i lona loto, ua faapea lava o ia” (Faataoto 23:7).

O le mea moni, o o tatou mafaufauga e avea ma fatu o a tatou amioga. O loo i totonu ia i tatou le mana eai o tatou olaga ma o tatou mafaufauga. O mafaufauga lelei ma le leaga e le mafai ona i ai faatasi i o tatou mafaufau e pei lava ona le mafai e le malamalamama ma le pogisa ona i ai i le taimi e tasi ma le nofoaga lava lea e tasi. I nisi taimi e tatau ona tatou filifili po o le fea o le avea ma a tatou malo faaaloalogia.

Afai tatou te mananao ai, e mafai ona tatou tuli ese mafaufauga leaga uma ma vave ona sui tulaga ai se pese po o se solo po o se mau e faagaeetia ai. E pei lava ona solaese le pouliuli i le oo mai o le malamalamama, e faapena foi ona solaese le tiapolo i le oo mai o le lelei.

Nofoaga Tuufua ma Uo Taufaaosooso

I ni taimi ma nofoaga faapitoa, e tusa lava po o le a lo tatou malosi, e faaititia lo tatou tetee atu. O nisi o alii ma tamaitai e sili ona lelei i tulaga e sili ona leaga ua pauu. Sa tupu i le Tupu o Tavita a o ia vaavaai atu i a Patisepa i le po, i le taimi muamua mai se mea mamao e foliga mai e saogalemu (tagai i le 2 Samuelu 11:2–4). E leai se tasi o i tatou e tatau ona mafaufau ua tatou malolosi tele pe ua masani e tetee atu e le taitai toilalo. O nofoaga tuufua, po

uumi, ma uo e le ola mama o loo i ai se malosiaga faamaneta e tosaina atu ai i tatou i puleaga a Satani.

Alofaga

E lua alofaga faifai pea e faaaoga e lagolago ai le solitulafono o le ola mama. O le muamua o le “Na ou alofa ia te ia.” O Satani o le faafoliga maoae. Na te taumafai e mili ese le tuinanau faapea o le alofa. O loo i ai se suega faigofie e iloa ai le eseesega. O le alofa e uunaia e le loto pulea, o le usiusitai i tulafono o le ola mama a le Atua, faaaloalo mo isi, ma le le manatu faapito. I le isi itu, o le tuinanau e uunaia e le le usiusitai, faamalieina faaletagata, ma le leai o se amio pulea.

O le alofaga lona lua o le “E leai lava se tasi o le a iloa.” Ua uma ona faatea ese e le Alii lena tala fatu i le tele o taimi. Sa Ia tautino mai, “o e e fouvale o le a tuia i le faanoanoa tele; ona o le a e alagaina a latou amioletonu i luga o tumutumu o pale, *ma o le a faaalia a latou galuega lilo*” (MF&F 1:3; faaopoopo le faamamafa).

E leai se fanua ua pogisa tele po o se tulimanu e matua tuufua lava o le a leai lava se tasi o le a iloa i se isi lava taimi. O le a silafia e le Atua, ma o le a e iloa pe a e solia Lana tulafono o le ola mama.

SALAMO

Afai ua tatou faia ni mea sese o le ola mama i o tatou olaga, e mafai ona tatou salamo ona o le Togiola a Iesu Keriso. O le laasaga muamua ma le autu i le ola ai i se olaga mama mo le lumanai o le salamo i solitulafono ua mavae, e faafesuiai se faavae o le oneone i se faavae o le papa. E masani ona amata i le ta’uta’u atu.

O le salamo, e ui i lea, e le na o se mataupu e faataau i le taimi po o le lafoaia o se agasala po o le faia o se ta’uta’u atu. O le mea e aupito sili, o le salamo o se suiga faamaoni o le loto, se naunau malosi e filifili e ola i se olaga mama—e le ona o le e tatau ai, ae ona tatou te mananao e fai.

Na faamanino mai e le Atua e le mafai ona tatou solia Ona tulaga faatonuina e aunoa ma le mafatia i taunuuga, ae ona o Ia e agaalofa ma agalelei e le mafuatiaina, Na te tuuina mai ia i tatou lenei faamoemoe mamalu:

**O le tuinanau e faaosofia
e le le usiusitai, faamalieina
faaletagata, ma le leai o
se amio pulea.**

"Ona o A'u o le Alii e lē mafai ona Ou vaai i luga o le agasala ma sina tikeri itiiti o le faatagaina;

"E ui i lea, o ia o lē ua salamo ma faia poloaiga a le Alii o le a faamagaloina" (MF&F 1:31–32; faaopoopo le faamamafa).

I agaga faamaoni uma o e e suia o latou loto ma lafoai a latou agasala, ua Ia folafola mai, "E ui lava ina pei o ofu mumu a outou agasala, e sisina ia e pei o le kiona" (Isaia 1:18).

E ui i lea, e masani foi ona sili atu ona lelei e tumau le mama nai lo le agasala ma salamo mulimuli ane. Aisea e faapea ai? Ona oni taunuuga faapitoa o le agasala atonu e mafai ona tumau e ui lava ina ua uma ona salamo, e pei o se faama'i po o se tamaititi na fanau i fafo atu o le faaipoipoga po o le tauleagaina o lo tatou tulaga. O la tatou sini i le olaga e le na o le ia mama, ae ina ia atoatoa foi. E faatelevaveina le sailiga mo le atoatoa pe a tatou mama, ae faatuai pe a tatou le mama.

Na aoao mai Alema, "E lei avea lava le amioleaga ma fiafia" (Alema 41: 10). E le mafai ona tatou solia tulafono a le Atua o le ola mama e aunoa ma le faasalaga ae maua le fiafia ona o le Atua, o le na foaoaina i tatou, na tuuina i o tatou agaga se tapasa o le ola mama e taua o lo tatou lotofuatiaifo. Soo se taimi lava tatou te solia ai tulaga faatonuina o le ola mama a le Atua, e galue le lotofuatiaifo—e faalavelave mai ia i tatou, e faaosofia ai lagona o le nofosalma le faanoanoa, ma e galue o se molimau atu i le moni o lena tulaga faatonuina.

E mafai ona tatou taumafai e le amanaia ma e mafai ona tatou

taumafai e faaleaogaina, ae e le mafai ona tatou sosola ese mai ai. O tulaga faatonuina a le Atua o le ola mama e le mafai ona faaleaogaina; e le mafai ona faavaivaia pe fetuutuunai; e mafai ona na o le usitaia pe le usita'ia. E iu lava ina tatou teena pe taliaina. O la tatou filifiliga o le a aafia tele ai lo tatou fiafia i le olaga.

FAAMANUIAGA O SE OLAGA O LE OLA MAMA

O faamanuiaga o le ola i se olaga mama ma tauagafau e matagofie. O se olaga faapena o le aumaia ai le lotofuatiaifo faaletagata ma le taua faaletagata. O le a taunu ai i se lotofuatiaifo manino. O le a agavaa ai i tatou mo se toalua e mama a'ia'i ma o le a faaalia ai le mana e foafoa ai fanau i le sootaga o le faaipoipoga e sili atu le suamalie ma le tauia aua sa tatou faapololoina mo le taimi ua faamaonia e le Alii lava Ia.

Aua e alofa tele le Alii ia i tatou ma e finagalo ina ia tatou fiafia, ua Ia foogaina mai Lona faamoemoega mo Ana fanau i nei aso e gata ai: "Aua o le a Ou faatu mai mo a'u se nuu mamā, o e e auauna mai ia te a'u i le amiontonu" (MF&F 100:16).

Tau ina ia avea i tatou taitasi ma se vaega o lena tupulaga mama ma taliaina atoatoa le tulaga faatonuina o le ola mama. ■

Mai se saunoaga na tuuina atu i le faigalotu a le Iunivesite o Polka Iaga-Idaho i le aso 22 o Ianuari, 2013. Mo le anotus atoa i le gagana Peretania, alu i le web.byui.edu/devotionalsandspeeches.

FAAMATALAGA

1. Tagai Richard G. Scott, "O Le Mana o le Amiontonu," *Liahona*, Jan. 1999, 81.
2. Boyd K. Packer, *To Young Men Only* (1976), 4, 5.
3. Tagai *Tusitalaulima 2: Taitaiina o le Ekalesia* (2010), 21.4.6.
4. Tagai Dallin H. Oaks, "O Ponokalafi, *Liahona*, Me 2005, 90.



UA OU ILOA NEI O LOO I AI SE ATUA

Oni nai tausaga ua mavae sa ou auauna atu ai o se tagata faigaluega i le Malumalu o Santiago Chile. I se taimi o se tasi sifi afiafi sa amata ona ou iloa ai le faigata ona manava, o lea sa ou talosagaina ai ma le musuā e vave alu.

A o ou savali atu i le tulaga o le nofoaafi, sa ou tatalo o le nofoaafi ou te manaomia o le a i ai iina ina ia ou vave alu i le fale Sa ou manatu sa tali mai la'u tatalo ina ua ou vaai i le nofoaafi e tu i le tulaga. Ae ina ua ou latalata atu i ai, sa ou vaaia le aufai-galuega o le nofoaafi e o faatope atu e fesoasoani i se pasese o loo oso le fatu. Sa tuia e upu o lau viiga e sili ona ou fiafia i ai lo'u mafaufau: "Ua ou faia ea se lelei i le aso?"¹ Na vave lava ona uunaia au e fesoasoani.

Sa ou faanatinati atu i le nofoaga na ave i ai e le aufai-galuega le alii talavou e faatali ai mo le taavale a le falemai, ma sa latou faatagaina au e nofo ai. Sa ou tatalo ia iloa le mea e fai ma augani atu i le Tama Faalelagi

ina ia faasaoina le ola o le alii talavou. Ou te lei manao e tuua na o ia ma le fefe, o lea sa ou uuina ai lona lima ma taumafai e fesoasoani ia te ia e tumau ai i le toofilemu. Na ou faamautinoa atu ia te ia o loo ia te ia se olaga umi i luma ma e i ai se faamoemoega a le Atua mo ia. Sa ou maua le numera o le telefoni a lona aiga, valaau ia i latou, ma tau atu ia i latou o le latou atalii ua avatu nei i le falemai ma e le o tuulafoaia.

Ina ua taunuu atu fomai, sa ou mulimuli ia te i latou i le taavale a le falemai. Sa ou lagonaina e tatau ona ou nofo faatasi ma le alii talavou seja oo ina taunuu atu lona aiga. O le mea na ou te'i ai, na filifili fomai e tatau ona matou o ma i latou, o lea na ou uuina ai le lima o le alii talavou i le alatoa i le falemai.

E lei leva ona matou taunu, sa latou ave o ia i le potu mo faalavelave faafuasei, ma sa ou alu i fafo e sue lona aiga. Ina ua latou o mai, na maligi loi-mata o lona tina, fusi atu au i ona lima,

ma fai mai sa matuai fiafia o ia o loo i ai pea ni tagata lelei i le lalolagi.

O le vaiaso na sosoo ai sa ou maua ai valaau mai le telefoni mai le alii talavou. Na ia fai mai sa fai mai fomai o le tumau i le toofilemu sa ttau tele i lena taimi a o lei oo i le falemai.

Seia oo i lena aso, sa le talitonu o ia i le Atua. Sa ou le magagana ina ua ia tagi mai, "Na e laveaia lo'u ola, ma e le uma lo'u faafetai ia te oe! Ua ou iloa nei o loo i ai se Atua."

Ina ua ou tuua le malumalu i le amataga o lena aso, sa taitaia au e le Agaga i le nofoaga sa'o i le taimi sa'o. Ou te lagona le faafetai i lo tatou Tama Faalelagi mo le taitaiina o au ma le tuuina mai ia te au o le lototele e fai e pei ona fai mai ai le viiga ma le le misia o le avanoa, e tusa lava pe pau le mea e mafai ona ou faia o le uuina o le lima o se tagata ese. ■

Carla Sofia Gavidia, Ontario, Kanata

FAAMATALAGA

1. "Ua ou Faia ea se Lelei?" *Viiga*, nu. 136.

Outtelei manao e tuua le alii talavou na o ia o loo fefe, o lea sa ou uuina ai lona lima ma taumafai e fesoasoani ia te ia e tumau ai i le toofilemu.



O AU LE TAGATA E LE TAGOLIMA

Ini nai tausaga ua mavae, na sau ai se taavale malepelepe i le paka o matou falelotu. O le taavale a se tama nofoua o se fanau e toafa. Sa sau o ia e fesili mai mo se fesoasoani. Na maua e le matou uarota se fale mo i latou, ma na amata e le tama ona aumai lona aiga i le lotu.

O nisi taimi na mama ai lavalava o le fanau ae o nisi taimi sa palapala, ae sa veuveua lava i taimi uma o latou lauulu. Matou te lei iloaina le leaga tele o le filia faatasi ma le taaiai o lauulu. I vайасо taitasi e aumai ai e le peresitene o le Peraimeri ni fagu e faamatala ai lauulu ma pulumu. La te galulue ma se faiaoga e selu lauulu o tamaiti a o lei amataina le Peraimeri.

Sa avea au o se fesoasoani i le au peresitene o le Peraimeri, ma sa ou faamemelo i le tomai o nei tamaitai e toalua e taliaina nei fanau palapala. Sa ou matuai le mafaia lava ona pa'i atu i o latou lauulu, ma sa ou ofo pe faapefea ona faia e nei uso. Ou te faamamaina lo'u mafaufau i le tauina ia te au lava ia faapea e mafai ona ou fesoasoani e ala i le vaavaaia o isi tamaiti a o galue nei tamaitai.

O le uii o lenei aiga e tolu tausaga le matua. Sa mafai ona ia tautala manino, ae sa ia taumafai ina ia faia ni leo musika leotetele pe a matou pepese. O lenei mea na faaitaina ai au.

Ona o fanau tai tolu tausaga le matutua e puupuu le taimi e filemu ai, sa amata ona ou siiina lenei teineitiiti laitiiti i luga o lo'u vae e fesoasoani ai ia te ia e faalogo. E atata mai o ia ia te au i le agaga faafetai, ma sa amata ona ou lagonaina le olioli ma alofa sa i ai i le Tama Faalelagi mo lenei tamaitiiti palapala—Lona afafine. Mulimuli ane, sa ou le

amaiaina le palapala ma uumauina se pulumu e faamatala ai lona lauulu ua taataai faatasi. Sa ou filifili foi faapea o lana taumafaiga e usu le pese o se leo fiafia.

I ni nai masina mulimuli ane, na tu i luga le tama o tamaiti i se sauniga molimau ma faafetai mai ia i matou mo le fesoasoani atu i lana fanau. O le

vайасо na sosoo ai, ua leai se aiga.

Ou te faafetai mo le avanoa na ou maua e auauna atu ai i na tamaiti. Ina ua latou taunu mai, sa ou lagonaina sa latou matua le tagolima lava, ae sa ou iloa ai o a'u o le tagata o loo manaomia i latou e fesoasoani ia te au e suia. ■

Diane Hatch, Arisona, ISA

O nisi taimi na mama ai lavalava o le fanau ma o nisi taimi sa latou palapala, ae sa veuveua lava i taimi uma o latou lauulu.



O LE MEAALOFA O LE ASO FANAU A LAU EPIKOPO

Io'u aso fanau i se tasi taeao o le Aso Sa, sa ma sauni mo le lotu ma lo'u toalua ae tatagi le telefoni. Sa ou tali atu, ae fai mai le epikopo "Ou te iloa o le asō o lou aso fanau, ae e mafai ona ta feiloai i lo'u ofisa i le 30 minute? Ou te fia talanoa ia te oe."

I le fialoa, sa ou faanatinati atu i le lotu.

I lona ofisa, fai mai le epikopo ia te au, «Sister Cruz, o loo i ai sau meaalofa o le aso fanau mo oe. Ua valaauna oe e le Alii e avea ma peresitene o Tamaitai Talavou. Pe e te taliaina lenei valaauga? Sa ou lagona le lofituina, ae na ou taliaina le valaauga. Sa lagolagoina ma vaetofia au i lena aso.

Ina ua ou foi atu i le fale ina ua tuua le lotu, sa ou nofo i luga o lo'u moega. O le mamafatu o le tiutetauave na taia au. Sa ou tagi ma lagona le le agavaa mo le galuega. Oka se tiute-tauave e taitai na tamaitai talavou! Sa ou papatiso ina ua 22 ou tausaga ma e lei auai lava i ni gaoioiga a Tamaitai Talavou muamua. E mafai faapefea ona avea au ma peresitene o Tamaitai Talavou?

Sa ou faia le mea e tasi na ou iloa e tatau ona faia—na ou tootuli ma ole atu i le Tama Faalelagi mo le taitaiga i lenei valaauga fou. I lena taimi, sa ou maua ai se aafiaga o le a le galo lava ia te au. A o ou vaai faalema-faufau i tamaitai talavou taitasi, sa ou

malamalama o i latou taitasi o se afafine o le Tama Faalelagi. Sa manaomia e i latou taitasi se peresitene e alofa ia te ia, ma mafai ona fesoasoani ia te ia e malamalama i le alofa o le Atua ia te ia. Sa ou vaai i lo'u mafaufau i igoa o tamaitai talavou uma lava ua le toaaga mai (ou te lei feiloai lava i ai), ma sa ou malamalama o i latou foi o afafine o le Tama Faalelagi ma na manaomia lo'u manatu atu. Sa ou lagonaina le malosi o i latou taitoatasi.

Sa le faigofie masina na sosoo ai. Sa ou galue malosi e e faamasani i tamaitai talavou taitasi ma malamalama i ona manaoga. Faatasi ai ma tamaitai talavou e toaaga mai, na fesoasoani le matou au peresitene ia i latou sa le toaaga mai e toe toaaga mai. Sa ou vaaia le aao o le Alii o loo galuega i le tele o auala.

Ina ua faamaloloina au mai lo'u valaauga, sa ou popole atonu sa mafai lava ona sili atu mea ou te faia. Ina ua taunuu atu i le fale, sa ou tootuli ma ole atu i le Tama Faalelagi pe na taliaina la'u auaunaga. Sa ou maua se faalogona matagofie ua faafifainoa o Ia.

Sa ou mafaufau i tua i lena aso fanau lea na mafai ai ona ou le taliaina le valaauga ona o isi ou tiute-tauave uma lava. Ae o au le tagata semanu e tele mea ou te le maua i le le taliaina o le valaauga. Semanu ou te le mauaina le avanoa e aoao ai le lotomaualalo, maua le malamalama, atiina ae le onosai, ma avea ma se meafaigaluega i aao o le Alii. Ae o le mea e sili semanu ou te le mauaina le faatuatuaga o le Alii na Ia tuuina mai ia te au, ma semanu ou te le aoaoina o le avanoa e auauna atu o se meaalofa. ■

Mariana Cruz, Rio de Janeiro, Pasila



E MANAOOMIA E IA LE ALOFA

Le o au o se talavou lauiloa ma sa faaalu sina taimi laitiiti e auauna atu i isi. I le taimi lea na valaaulia au e lo'u tina ma te o mai ia e asiasi i le uso o lou tinamatua i le fale e tausi ai tagata matutua.

O lo'u tausoga ma lana tama teine e Stephanie sa faatasi ma i maua i lenei asiasiga. O Stephanie sa fitu po o le valu tausaga le matua. A o matou savavali atu i totonu o le fale e tausi ai tagata matutua, sa ia talotalo atu i tagata uma sa ia vaaia. Sa latou fiafia e peiseai sa ia tufaina atu le la susulu ma nuanua. O au i le isi itu, sa aloese mata mai o latou mata.

Ina ua matou ulu atu i le potu na faaaaoga e le uso o le tina o lou tina ma le isi tina matua, sa ou faia le mea sili e mou ese atu i le pito i tua. A o Stephanie, e oso i luga o le moega a le uso o le tina o lou tina matua ma amata ona faafafia o ia i ana tala.

Sa ou matauina se mea e uiga i lenei potu. I le itu o le uso o le uso o lo'u tinamatua na i ai ni faailoga o le alofa ma le aiga. O ata ma ata vali gao o loo tautau i luga o le puipui, ma fugalaau teuteuina i se tulaga. O le isi itu o le potu sa mama atoatoa ma leai se mea na i ai. Sa leai ni faailoga o ni tagata asiasi mai; leai ni kata po o ni ata sa tautau i luga o le puipui.

O le uo a le uso o lou tina matua la te potu na noso na o ia i le nofoafaataavalevale ma e lei amanaiaina lo matou i ai iina. Sa usuusuina e ia se fati e aunoa ma ni upu ma tata i ona tamai-lima lona nofoafaataavalevale, lena na ou le maua ai se faalogona lelei.

Sa mau Stephanie i le ogalima o lona tina ma fesili atu, "Tina, o le a le mea o loo tupu i lena tamaitai?" Sa punou i lalo le tina o Stephanie ma musumusu atu, "E manaomia e ia le alofa." Ou te

lei saunia mo le mea na tupu.

E aunoa ma le faatuai, na tamoe atu Stephanie ma oso i luga o vae o le tamaitai. Ona ia amata lea ona ta'u atu ia te ia ni tala ma fai atu soo se ituaiga o fesili. E lei tali mai le tamaitai. Nai lo lena, na tafe ifo loimata i ona fofoga a o tago mai opo atu Stephanie. Mo ni nai minute na sosoo ai, sa nofonofo ai Stephanie i ona vae, milimili lona lauulu ma kisi i lona alafau.

Ou te lei molimaufina lava lea ituaiga alofa o le le manatu faapito muamua, ma sa ou taumafai e nana o'u loimata. Mulimuli ane, a o matou tietie atu mai le fale e tausi ai tagata matutua, sa ou maofa pe faapeflea e Stephanie laitiiti ona mafai ona matuai le manatu faapito ma le tumu i le alofa ma le agalelei atu i se tagata ese.

Na iu lava ina ou toe liliu lo'u olaga


ma auauna atu faamisiona. A o ou auauna atu, sa tusi mai e Stephanie ia te au ni tusi malie na aofia ai ni ata tusi e pei lava o na sa i le potu o le uso o lo'u tina matua i le fale e tausi ai tagata matutua.

Ae ou te lei foi atu i le fale, sa ou maua ai le tala faavauvau faapea o se ma'i na maliu ai Stephanie. O loo ou tagi pea na vave tele ona mate lana lamepa, ae tumau lou faafetai mo lana faataitaiga. Sa ia aoaoina au po o le a moni lava le auaunaga.

E le tatau lava ona tatou mafaupea po o le pe tatau ona tatou auauna atu. Afai o o tatou loto o loo i le nofoaga sa'o, ona avea ai lea o le auauna atu o se vaega o lo tatou faasinomaga, ae le na o mea lava tatou te faia. ■

Jay Mcfarland, luta, ISA

Sa mau Stephanie i le ogalima o lona tina ma fesili atu, "Tina, o le a le mea o loo tupu i lena tamaitai?"



Valaaulia Le Manuia

Saunia e Richard M. Romney

Mekasini a le Ekalesia

Ole faasoa atu o le talalelei e masani ona faigofie e pei o le tuuina atu o se valaaulia, tuuina atu o se fesili, po o le auai i se talanoaga. A o saunia o tatou loto e faasoa atu le talalelei, o le a taitaia i tatou e le Alii ia i latou o e ua saunia e faalogo i ai.

“Ua saunia e le [Alii] auala mo i tatou e faasoa atu ai le talalelei i le anoanoai o ala, ma o le a la fesoasoani mai ia i tatou i la tatou galuega pe afai o le a tatou galulue i le faatuatua e faataunuu Lana galuega,” na saunoa Peresitene Thomas S. Monson



Sa ou vaiai Harley o loo amoina la'u uila ua gaoia. “Ou te fia fesili atu po o fea na e aumaia ai lena uila,” sa ou fai atu ai.

– Niki Barton

Na o le talosaga atu lava i isi pe latou te fiafia i le talalelei, e mafai ai ona e auai i le faanatinatiina o le galuega o le faaolataga.

i le konafesi aoao ia Oketopa.¹ O nisi nei o faataitaiga.

Toe Faafoe mai le Uila

Ina ua siitia atu Niki Barton ma lona faletua, o Morgan, i Arisona, ISA, le nofoaga e mafai ai e Niki ona auai i le aoga faaloia, sa amata ona la tatalo mo avanoa faafaifeatalai. “Sa ma ole atu i le Tama Faalelagi e fesoasoani ia i maua ina ia sili atu ona mataala i uunaiga a le Agaga Paia, ma ia lototoa e faatino,” o le tala lea a Niki.

I se tasi Aso Toonai, na manaomia ai e Morgan le la taavale mo le galuega,

o lea sa tietie ai Niki i lana uila vilivae i le lotoa. Ae peitai, ina ua oo i le taimi e toe foi atu ai i le fale, ua leai se uila.

“O le gaoi uila o se tulaga taatele lea ma na fesili ai leoleo pe i ai se mea e ono fesoasoani e faailoa mai ai [uila gaoia]. Na ou manatuaina sa kelu e Morgan se faailoga i luga o le au na faapea mai, ‘Ou te Alofa ia te Oe.’”

Na toe tatalo tasi Niki. “Na ou ole atu ina ia ou aoaoina se mea mai le mea na tupu,” o lana tala lea. Ona ia oso lea i luga o le nofoaafi ina ia mafai ona ia faalatalata atili atu i le fale ao le'i valaaau atu i lona toalua e sau e avatu o ia.

“O le isi nofoaga e tu ai le nofoaafi, sa ou vaaia ai se alii lapoa ma se pulou o loo u i tua o oso i luga o le nofoaafi, o amoina la'u uila! Sa ou vaaia le faailoga ‘Ou te Alofa ia te Oe’ i luga o le au, o lea na ou iloa ai o au



e ana [le uila],” o le tala lea a Niki. Sa ia popoina le tauau o le alii.

“Sa ou fai atu, ‘Ou te fia fesili atu po o fea na e aumaia ai lena uila.’ Sa ia tali mai, ‘Mai se faatautui i le magaala.’” Na faamalamalama atu e Niki ua gaoia lana uila. Na tali mai le alii talavou e le o ia o se gaoi, ma e mafai ona toe avatu le uila a Niki.

“Na ou faafetai atu ia te ia ma fai atu i ai o le a ou fai i leoleo e valaau atu ia te ia ina ia mafai ona suesue le ‘faatautui’”, o le tala lea a Niki. “Na ia tauina mai ia te au o lona igoa o Harley ma tuu mai lana numera o le telefoni. Sa ou fai atu ia te ia o le a ma afaaafa i le tau lea sa ia totogiina, talu ai ona ua faaseseina uma i maua, ma ua ou fiafia e aluese mai le nofoaafi ma lau uila ua toe faafoi mai.”

Ae ua na o le amataga lena mea.

“Ona o le fialoa, sa ou valaauna Harley i le taeao na sosoo ai. Sa ia fai mai o loo suesue e leoleo. Ona ia fesili mai pe ma te mananao ma lo'u toalua e fai se mea i se taimi mulimuli ane o le aso. Sa ou iloaina sa ia tau-mafai e faaauo mai.

“Talu ai ona o le Aso Sa, sa ou fai atu ia te ia ma te o i le lotu ae ma te fiafia matou te faatasi ma ia i se isi taimi. Ao ou tuuina i lalo le telefoni, na ou iloaina o se avanoa faafafeautalai mama ma manino lenei mea. Sa ou valaaau atu ia te ia ma fesili atu pe fia manao matou te o i le lotu. Sa ioe o ia! Sa ia auai i sauniga uma ma tau mai ia te au mulimuli ane sa ia lagonaina o loo talanoa tuusao atu lava ia failauga ma faiaoga ia te ia.

“O Harley sa i ai aiga i atunu i fafo ma sa siitia ese atu i se taimi e lei leva ona matou feiloai,” o le tala lea a Niki. “Ae na avea o ia ma a maua uo, maua



le faaaloalo mo le Ekalesia, ma sa faamautinoaina o ia o loo silafia o ia e lona Tama Faalelagi.”

Talanoa i le Tagata e I Ai le Tomai Faapitoa

“I se tasi aso, ina ua uma ona faalogo i se savali o le konafesi, sa ou maua se uunaiga e tatau ona ou talanoa atu i le tagata e i ai le tomai faapitoa i vai faafomai i le faleoloa,” o le tala lea a Hannah Rawhouser, e sau foi mai Arisona. “Na fai mai se leo o i totonus ia te au, ‘O ia o se tagata lelei. E tatau ona e valaaulia o ia i se gaoi-oiga a le Ekalesia.’”

O le isi taimi sa i ai Hana i le auala e sau sao ai i totonus le taavale, sa ia vaavaaia o ia, ae sa le'i i ai. Na faaauau pea, le uunaiga.



“E te lotu?” o lau fesili lea. Na fai mai Greg ioe. Sa ou tuuina atu ia te ia la'u kata. “Valaaau mai ia te au,” sa ou fai atu ai.

– Hannah Rawhouser



**"O le a se mea e te talitonu i ai?"
na fesili mai ai Norman ia te au.**

**"O Iesu Keriso," sa ou tali
atu ma le mitamita.
—Robert G. Ellis Jr.**

"O ni nai vaiaso mulimuli ane, sa ou toe oo ane ai, ma ua i ai o ia iina. Faatasi ai ma le faamoemoe o le a puupuu lo'u taimi, sa ou agai sao atu loa i le mataupu. 'E te lotu?' o lau fesili lea. Sa ia tu ma le faateia ona fai mai lea ioe. Sa ou tuuina atu ia te ia lau kata pisinisi. 'Valaau mai ia te au i se taimi,' sa ou fai atu i ai ma aluese mai. 'Ia, sa fai lau vaega,' o lou mafaufau lea. 'O le a le toe i ai nei ni ou lagona e faalavelave soo mai.'"

I lona ofo tele, sa ia valaau mai i le aso na sosoo ai ma faailoa mai o ia o Greg Eiselin. "Sa ia fai mai mulimuli ane, talu ai o i maua uma o ni talavou ma e nofofua, sa ia manatu o loo ou talosagaina o ia mo se tafaoga faamansani," o lana tala lea. "Ae sa iu ina ma talanoa e uiga i mataupu faalelotu mo le tolu itula, ma sa amata ona ia aoao

e uiga i le Ekalesia." I le taimi nei o loo auauna atu ia Elder Eiselin faafai-faualai faamisiona i Monatana, ISA.

Fai atu i le Tagata e Faafoeina le Lifi

I le avea ai ma se tagata e 26 tau-saga le matua, na galue Robert G. Ellis Jr. o se alii leoleo i le ofisa o le Senate i Uosigitone, D.C., ISA.

"Sa ou faaaluina le tele o taimi e mafaufau loloto i mea sa ou aoaoina e uiga ia Iesu," o lana tala lea. "E lei auai lou tama ma lou tina i soo se ekalesia, ae sa la faatagaina au ou te alu, ma sa ou fafia e auai i le tele o tapuaiga." I le avea ai ma se talavou matua faatoa faaipoipo, sa ia lagonaina e tatau ona papatisoina o ia—ae o le fea o ekalesia?

"Na atuatuvalo lou agaga. Sa ou manao ia maua se ekalesia e faamaoni i aoaoga a Keriso. E fai mai tagata o lotu uma o le Ekalesia a le Alii, ae sa le'i faatuai lo latou fai mai o isi tapuaiga na sese. Sa ou tatalo, 'ou te fia papatiso, ae ou te le iloa po o le fea ekalesia e auai.'"

O le manatuaina o le fetalaga a Iesu Keriso, "Ole atu, ona foaiina mai ai lea ia te outou" (Mataio 7:7), na ole atu ai pea Robert. I se tasi aso a o faigaluega o ia, na toe lagona ai foi e Robert le atuatuvalo, ma oo mai loi-mata i ona mata.

"Sa ou lagonaina le fefe ma sa le iloa pe o o'u manatu na sa'o pe sese. Ona oo mai lea o se lagona toofilemu ia te au. E aunoa ma le matuai iloaina pe aisea na ou faia ai, sa ou savali atu i se tagata o faafoeina le lifi ma fesili atu, 'O le a le ekalesia e te auai ai?'"

O le tagata e faafoeina le lifi o Norman Maxfield, o se faifeautalai

ua maea lana misiona o loo auai i le Iunivesite o Georgetown.

“Sa ia tilotilo mai i luga mai nisi tusi. Sa ou iloaina sa faateia o ia. Sa ia fai mai, ‘O au o se Mamona. Aisea?’

“Sa ou fai atu, ‘Ou te fia papatiso, ae ou te le iloa po o le fea ekalesia e auai.’

“Sa ia fesili mai, ‘O le a se mea e te talitonu i ai?’

“‘Iesu Keriso,’ o le tali sa ou tuuina atu ma le mitamita.

“Na ia fesili mai, ‘E mafai ona ou faamatalaina atu e uiga i la’u ekalesia, o Le Ekalesia a Iesu Keriso o le Au Paia o Aso e Gata Ai?’ A o ia faamatalaina mai ia te au o le Ekalesia a Keriso na toefuataiina mai i le lalolagi, sa ou iloa ua taliina au tatalo. Sa matafogie le lagona i totonu ia te au.”

O le 1977 lena. I le taimi nei ua avea Brother ma Sister Ellis ma tagata o le Ekalesia i Virginia, ISA.

Faalagolago i le Alii

Na saunoa mai Elder Dallin H. Oaks o le Korama a Aposetolo e Toasefululu faapea “pe a tatou tutu e avea ma ‘molimau a le Atua i taimi uma ma i mea uma’ (Mosaea 18:9), o le a tatalaina e le Alii auala mo i tatou e saili ma le talafeagai fesootaiga ma i latou o e o loo saili i ai. O le a oo mai lenei mea pe a tatou saili le taitaiga ma pe a tatou galulue ma le faamaoni ma le alofa faaKeriso mo isi.”²

E ioe uma lava ia Niki, Hana, Greg, Robert, ma Norman o mea sa ia fai atu ai e moni. ■

FAAMATALAGA

- Thomas S. Monson, “Susu Maia i le Konafesi,” *Liahona*, Nov. 2013, 4.
- Dallin H. Oaks, “Faasoa Atu le Talalelei”, *Liahona*, Jan. 2002, 9.
- Russell M. Nelson, “Fesili i Faifeautalai! E Mafai ona Latou Fesoasoani Atu ia te Oe!” *Liahona*, Nov. 2012, 18–21.

O FAUTUAGA E SEFULU MO LE FAASOAINA ATU

E tele auala e valaaulia ai tagata e aoao e uiga i le talalelei. O fautuaga nei e 10 e te amatalia ai.

- Faia se talanoaga.*** A o outou faamasani, o se mea masani le tau atu i tagata o oe o se tagata o le Ekalesia. O faamatalaga faigofie e pei o le, “O au o se tagata o le Au Paia o Aso e Gata Ai, ae i le toatele o tagata e iloaina i matou o ni Mamona,” e mafai ona tatalaina le faitotoa.
- Talanoa a o malaga.*** Asiasi i uso a tagata o malaga i luga o le pasi po o le vaalele po o aiga e te feiloai i ai i nofoaga o tafaoga. O se tasi tagata sa ia faia se tulaga o le fesili atu i avetaavale laupasese e uiga i o latou aiga ona talanoa lea i afiafi faaleaiga.
- Faasino i uo e Mormon.org.*** O lenei uepisaite o se nofoaga sili mo i latou e le masani i le Ekalesia ina ia faamasani atili i ai.
- Ia valaaulia au uo ina ia talanoa ma faifeautalai faamisiona i le initonet i pe faafesagai.*** I le Mormon.org, e mafai ona faia e tagata ni talanoaga ma faifeautalai. Ma ioe e mafai ona e faailoa atu pea tagata i faifeautalai faamisiona i la outou eria.
- Faaaoga ia ala o faasala-lauga faaagafesootai.*** Na tuuina mai e le Ekalesia ni avanoa e fafia po o le faasoa atu o anotusi i le initonet, e aofia ai ni tulaga faaleaganuu, upusii, ma vitio. E mafai foi e Hashtags (se upu po o le vaega o upu

faailoga i le #) ona mulimuli ai tagata i talanoaga i luga o le uepi e faatatau i le Ekalesia.

- Faasoa atu ia vitio.*** la faamasani i vitio i le Mormon.org ma biblevideos.lds.org. Matamata i ai ma uo pe faasoa atu sootaga. Ia ta’ua foi Savali FaaMamona, lea e ofoina atu ia tali musuia i fesili o le olaga.
- Faasoa atu ia kata ma pepa o i ai se savali.*** O kata fepasia’i a faifeautalai ma pepa o i ai se savali e faatagaina oe e faasoa atu ni manatu musuia (tagai i kata i le itulau e 71 o le *Liahona*, a Oketopa 2013 mo se faataitaiga).
- Fesili i faifeautalai.*** la valaaulia au uo e faiatou le “Fesili i Faifeautalai! E Mafai ona Latou Fesoasoani Atu ia te Oe!” saunia e Elder Russell M. Nelson o le Korama a Aposetolo e Toasefululu.³
- Auai i se faletatala a le malumalu.*** Tau atu i tagata se avanoa ofoofogia e auai atu ai i se faletatala a o lumanai le faapaiaga o se malumalu. Ofo atu e o faatasi ma i latou.
- Aapa atu ia i latou o e ua toe foi mai.*** O faiaoga o aiga ma faiaoga asiasi ua i ai se avanoa sili e avea ai ma ni faifeautalai i tagata ua le toaaga mai, o e o iloa foi nisi e ono gauai mai i le talalelei.



Saunia e Elder
Richard G. Scott
O Le Korama
a Apostolo e
Toasefululuā

FAAMALOLOINA

O MAILA MATUIA O LE SAUNOA

E mafai ona tuua oe ua mailaila ona o le faatautala, ae o na ma'ila e le manaomia ona tumau.

O u te tautala atu mai le taele o lou loto ia te outou taitoatasī ua faamailaina e le agasala mataga o le saunoa.

Sei vagana ua faamaloloina e le Alii, le sau faalemafau-fau, faaletino, po o faafeuiai, e mafai ona e oo ai ini iuga matuia ma tumau. I le avea ai o oe ma se ua saunoa i ai se tasi, sa e oo i nisi o na tulaga. O na tulaga e aofia ai le fefe, faanoanoa, tausalaina, ita ia te oe lava ia, lepetia lou manatu lelei ia te oe lava, ma e aloese ai mai masani faaletagata. Pe a oo ina fai ma avega le faau-ua pea o le saunoa o se tasi ia te oe, o le a tutupu mai ni lagona malolosi o le fouvaled, ita, ma le inoino.

O ia lagona e masani lava ona faasagatau ifo ia te oe lava, isi tagata, i le olaga lava ia, faapea foi ma le Tama Faalagi. O taumafaiga atuatuvale e tetee atu i na tulaga o le a iu i le faaaoga sese o fualau oona, ola le mama, lafoai le aiga, ma tulaga matuia o le pule i le ola. Sei vagana ua faa'-oina, o ia lagona o le a taitaiina atu i ni olaga, o le le toe i ai o se faamoemoe, oni ulugaliifemisaai, ma le suaia mai le avea ma tagata sa saunoa i ai, i le avea ma tagata saunoa. O se tasi o iuga leaga o lea mea, o le le toe faalagolagoina ai o isi lea o le a avea ma papupuni o le faamalologa.

Ina ia maua le fesoasoani, e ao ina e malamalamā ai i nisi o mea e uiga i le tulafono e faavavau. O le saunoa ia te oe e mafua i le osofai ma le le tonu e se isi o lou saolotoga. Talu ai o fanau uma a le Tama o i le Lagi e olioli i le filifiliga saoloto, ae mafai lava ona i ai nisi o i latou e filifili ma le loto e solia poloaiga ma tuimomomo oe. O na amioga latou te taofiofa lou saolotoga i se vaitaimi. I le faamasinoga

tonu, ma ia taui atu ma sui, ua saunia e le Alii se ala mo oe e faatoilalo ai iuga leaga o amioga e faia e isi tagata ia te oe. O le faamalologa e maua e ala i le faaaoga o upumoni e faavavau faatasi ma le fesoasoani mai o le perisitua.

Ia e silafia o filifiliga leaga e faia e isi e le mafai ona lepetia atoatoa ai lou saolotoga sei vagana ua e loto i ai. Atonu o a latou amioga e mafai ona oo ai tiga, atuatuvalo, ma mafatiaga faale-tino, peitai e le mafai ona latou lepetia le tulaga e faavavau o lenei olaga saasa ma faigata i lenei lalolagi. E ao ona e malamalamo o *loo ia te oe le saolotoga e filifili ai e faatoilalo iuga leaga o le saunoa*. E mafai e ou uiga ona pulea se suiga mo le lelei i lou olaga. E mafai ona e maua ai le fesoasoani ua faamoemoeina e le Alii ia e maua. E leai se tasi e mafai ona aveesea ou avanoa silisili pe afai e te malamalamo ma ola i tulafono e faavavau. O tulafono a lou Tama Faalelagi ma le Togiola a le Alii e mafai ai ona lē faoa mai ia te oe avanoa e oo mai i fanau a le Atua.

Atonu e oo ia te oe se lagona o le taufaamatau ona o le e pule po o pulea oe. Atonu e te lagona lou saisaitia ma e leai se mea ua e iloa e mafai ona e sola ese ai. Faamolemole ia e talitonu e *le finagalo lou Tama Faalelagi ia saisaitia oe i ni aafiaga le tonu, e ala i le taufaamatau o le taui ma sui, po o le fefe i ni uiga e toe faaali mai e le tagata o le aiga o saunoa ia te oe*. Ia e faatuatua o le a taitaiina oe e le Alii i se faaiuga. Ia ole atu ma le faatuatua, aua le masalosalo. (Tagai i le Iakopo 1:6; Enosa 1:15; Moronae 7:26; MF&F 8:10; 18:18.)

Ou te matua tautino atu pe a e mafatia i ni amioga sauia, tau faasese, po o le mataifale o se tasi, e le pau ia te

oe le leaga ma e le tatau ona ia te oe se lagona tausalaina. Atonu o le a tuua oe ua e ma’ila’ila i le faatautala o lena tagata ia te oe, peitai o na ma’ila’ila o le a le tumau. I le fuafuaga e faavavau, i le taimi e tatau ai a le Alii, o le a faasa’oina ai na manua pe a e faia lau vaega. Ia o le mea lea e mafai ona e faia i le taimi nei.

Saili le Fesoasoani

Afai ua sauaina oe i le taimi nei po o se taimi foi ua tuanai, saili nei loa se fesoasoani. Atonu o le a e le faatuatuaaina isi ma lagona e leai se fesoasoani faatuatuaaina o maua i se mea. Ia mata i lou Tama Faalelagi ma Lona Alo pele, lou Faaola. Taumafai ia e malamalamo i a La’ua poloaiga ma mulimuli i ai. O le a la taitaiina oe i isi o le a faamalosiauina ma uunaia oe. O loo avanoa mo oe se taitai perisitua, e masani lava o lena taitai o se epikopo, o nisi taimi o se tasi o le au peresitene o le siteki. E mafai ona latou fausia se alalaupapa i le malamalamo sili atu ma le faamalologa. Na aoao mai Iosefa Samita: “E le mafai e se tagata ona faia se mea mo ia lava vagana ua taitaiina o ia e le Atua i le ala sa’o; ma o le perisitua la e mo lena faamoemoega” (*Aoaoga a Peresitene o le Ekalesia: Iosefa Samita* [2007], 109).

Ia e talanoa i lou epikopo po o le peresitene o le paranesi ma le lototele. O lona valaauga e mafai ai ona avea o ia ma auupega a le Alii mo oe. E mafai ona ia tuuina atu se faavae faalemataupu faavae e taitaiina atu ai oe i le faamalologa. O loo ia te ia malamalamo ma le faatinoga o le tulafono e faavavau o le a e maua ai se faamalologa o e manaomia. Ua ia te ia le aia tatau e musuia ai e le Alii mo

oe. E mafai ona ia faaaoga le perisitua e faamanuia ai oe.

E mafai e lau epikopo ona fesoasoani ia e iloa uo faatuatuaaina e lagolagoina oe. O le a ia fesoasoani ia te oe ia e toe maua le manatu talitonu ia te oe lava ma le manatu lelei ia te oe lava, e amata ai le faagasologa o le toe faafouina. Pe a matuia ona saunoa se tasi ia te oe, e mafai ona fesoasoani o ia te oe ia e iloa se puipuiga talafeagai ma se fesoasoani faaleatua e o gatasia aaoaoga a le Faaola.

O Mataupu Faavae o le Faamalologa

O nisi nei o mataupu faavae o le faamalologa o le a e malamalamo atoatoa i ai:

Iloa o oe o se tasi o fanau pele a lou Tama Faalelagi. E alofa atoatoa o ia ia te oe ma mafai ona fesoasoani ia te oe i auala e le mafai e matua faalelalolagi, lou toalua, po o sau uo faamaoni ona fesoasoani atu ai. Na tuuina mai e lona Alo Lona soifua ina ia mafai e ala i le faatuatua ia te ia ma le usiusitai i Ana aoaoga, ona mafai ona faamaloloina oe. O ia o le faamalolo sili o mai.

Ia e faalagolago i le alofa ma le agalelei o lou uso matua, o Iesu Keriso, e ala i le mafaufau loloto i tusitusiga paia. E pei o sa Nifae, o le a fetalai atu ia te oe, “Ua ou agaalofa tele ia te outou; ua tumu lou loto i le alofa mutimutivale. . . . Aua ua ou iloa ua lava lo outou faatuatua ou te faamaloloina ai outou.” (3 Nephi 17:7–8).

O le faamalologa e sili ona amata i lau tatalo ma le naunautai e ole atu i lou Tama o i le Lagi mo se fesoasoani. O le faaaoga o lou saolotoga e mafai



ona e maua ai se fesoasoani faalelagi. A e faatagaina lena fesoasoani faalelagi i lou loto, o le a faamaluluina lou loto i le alofa o le Faaola ma motusia ai le taamilosaga o le sauaina lea e mafai ona liua ai le tagata na sauaina e avea ma tagata sau. O faigata, e tusa lava pe mafua i amioga le taupulea na faia ma le loto i ai o isi tagata, e mafai ona avea ma puna e tuputupu ae ai pe a iloiloina lena tulaga mai se vaiga mamao o mataupu faavae e faavavau (tagai i le MF&F 122:7).

I le avea ai ma se na sauaina, aua le maimauina au tau-mafaiga e taui ma sui i le na saua ia te oe. Ia e uai atu i lou tiute e fai le mea e te mafai i lou malosi e faasa'o ai lena mea. Ia tuu le taulimaina o le tagata sa saua i a te oe i taitai o alalafaga ma Ekalesia. Po o le a lava mea latou te faia, o le a oo ina faafesagai le tagata tausalaina ma le Faamasingo e sili ona atoatoa. I le iuga, o lea faasalaina le tagata saunoa e lei salamo e le Atua amiotonu. O e saua i tagata taumamaina ma taumafai e tauamitonuina o latou lava olaga amioleaga, e ala i le faasese o isi e mulimuli i o latou ala leaga, o le a faamasinoina. O tagata faapena na lapa-taiina e le Matai: "Ai se na te faatausuai i se tasi o i latou nei e faatauvaa o e faatuatua ia te au, e lelei i lea tagata pe ana nonoa se maaolo tele i lona ua, ma faagotoina o ia i le moana loloto" (Mataio 18:6).

Ia e malamalamo o lena faamalologa e mafai ona umi se taimi e alu ai. O le faamaloloina e oo mai i laasaga taitasi. A e faavavevaveina pe a faaalia le loto faafetai i le Alii mo tulaga taitasi o le a faaleleia.

Faamagalo

I le taimi faaumiumi o le toe malosi mai se taotoga faigata, e faamoemoeina e le gasegase se faamalologa atoatoa i le onosai, ma lona faalagolago i le tausiga a isi. E le faapea o taimi uma e malamalamo ai o ia i le taua o togafitiga ua faamatala mai, ae o lona usiusitai o le a vave maua ai le faamalologa. E faapena foi lou tauivi ina ia faamaloloina ma'ilaila o le saua. O le loto faamagalo, mo se faataitaiga, e mafai ona faigata ona malamalamo i ai, ae sili atu ona faigata ona faamagalo atu. *Amata i lou le faamasino atu.* E te le iloa mea atonu na mafatia ai tagata saua i le avea ma tagata manunua taumamaina. E tatau lava pea ona tatalaina mo i latou le ala i le salamo. Tuu le taulimaina o tagata saua i isi. A o e lagonaina le faaitiitia

o ou tiga, o le a faigofie ai ona faamagalo atu.

E le mafai ona e soloiesea mea ua uma ona faia, a e mafai ona e faamagalo atu (tagai i le MF&F 64: 10). O le faamagalo e faamalolo ai manua leaga ma matuia, au na te faatagaina le alofa o le Atua na te faamamaina lou loto ma le mafaufau le oona o le ita. E faamamaina ai lou loto mai le manao e taui atu ma sui. E maua ai avanoa mo le faamamaina, faamaloloina, ma le toefuataiina mai o le alofa o le Alii.

Na apoapoi mai le Matai, “Alolofa i o outou a fili, faamanuia atu ia i latou o e e fetuu mai ia te outou, fai mea lelei ia i latou o e e inoino mai ia te outou, ma tatalo mo i latou *o e latou te faaaoga outou ma le inoino ma sauina outou*” (3 Nifae 12:44; faaopoopo le faamamafa).

O le ita ma le inoino e matautia. E tele le malaia e maua ai. E tolopoina e na uiga le mapusaga ma le faamalologa sa e fia maua. O lou mafaufau pea ma lou misialofa ia te oe lava, e mafai ona liua ai le tagata sa saunoa i ai e avea ma tagata saunoa. Ia tuu atu i le Atua e fai ma faamasino—e le sili atu ona e faia e pei ona faia e Ia.

O le fautua atu e faagalo le saunoa o se tasi ia te oe, e le fesoasoani lena mea. E tatau ona e malamalama i mataupu faavae na e aumaia le faamalologa. O le faamaloloina e mafai ona amata i se epikopo magafagafa po o se peresitene o le siteki po o se faufautua faapolofesa atamai. Afai na gau lou vae, e te le filifili e faaleleia e oe lava ia. O faatautala po o le sauina matuia, e mafai foi ona manua mai se fesoasoani faapolofesa. E tele auala e amata ai le faamalologa, ae ia e manatua o se fofo atoa lava e maua

mai i le Faaola, le Alii o Iesu Keriso, lo tatou Matai ma le Togiola. Ia faatutua, faatasi ai ma galuega o le a mafai ai e Lana Togiola atoatoa, faavavau, ma le le iu ona faamalolo lou mafatia mai taunuuga o le faatautala po o le sauina.

E ui lava ina foliga mai i le taimi nei e te le mafaia, e oo mai le taimi o le faamalologa e mafai ona e maua mai i le Faaola, o le a mafai ai e oe ona faamagalo moni le tagata na faia le faatautala. A oo ina mafai ona e faamaloloina le sauaga, o le a e mapu mai le tiga ma le loto tiga lea e manao ai Satani i lou olaga, e ala lea i le uunaia o oe ina ia e inoino i le tagata na faia le faatautala O le taunuuga, o le a e olioli i se filemu e sili atu. E ui lava o se vaega taua o le faamalologa, afai o le mafaufau i le faamagalo e atili ai ona e tiga, ia faapafala ese le vaega lena seja e maua nisi aafiaga o le mana faamalolo o le Faaola i lou lava olaga.

Lapataiga

Ou te lapataia oe e aua e te auai i togafitiga le tatau e lua na e faatele ai lou mafatia nai lo le lelei. O ia mea: o le suesue vailiili o mea taitasi sa tutupu ia te oe i le taimi ua tuanai, ae maise lava le talanoaina i se faalapotopotoga o na tulaga: ma le tuuai i le tagata saunoa o faigata uma o lou olaga.

E faapea foi la le toe faaleleia o tulaga ua faaleagaina e le saunoa, e faia na o ouluua ma faia faalilolilo ma se taitai perisitua faalagolagoina, ma afai e tatau ai na te fautuaina atu se fautua agavaa. E tatau ona matua talanoaina lelei le tulaga na mafua ai le saunoa, ina ia mafai e oe ona maua fautuaga tatau ma mafai ona puipuia

ai le tagata saunoa mai le faateteleina o lona sauia. Ia, o le fesoasoani a le Alii, ia e tanumia mea ua tuanai.

Ou te molimau atu ma le lotomaualalo o mea ua ou ta'u atu ia te outou e moni. E faaautu i mataupu faavae ia sa ou vaai o faaaoga e le Alii e tuu atu ai le atoatoa o le olaga ia i latou o e ua mailaila i le saunoa i i ai ma le amioleaga.

Afai e te lagona e na o se filo tuaiti lava o totoe o le faamoemoe, ia e talitonu mai ia te au, e le o se filo. E mafai ona avea lena mea ma se sootaga le motusia ma le Alii, lea e faasaoina ai lou ola. O le a ia faamaloloina pe a e tuueseia lou fefe ae faalagolago ia te Ia e ala i le taumafai e ola i Ana aoaoga.

Ia ole atu nei i le Alii e fesoasoani ia te oe (tagai i le Mamona 9:27; Moronae 7:26, 33). Filifili nei e talanoa i lau epikopo. Aua e te vaai i mea uma ua e oo i ai i le olaga i ni tioata ua nenefu i mailaila o le saunoa. E tele naua mea o le olaga e matagofie. Tatala faamalama o lou loto ma faaulufale atu i ai le alofa o le Faaola. Pe a toe foi mai mafaufauga mataga o aafiaga o le saunoa sa e oo i ai i le taimi ua tuanai, ia e manatua lona alofa ma lona mana faamalolo. O lou faanoanoa o le a liua i le filemu ma le mautinoa. O le a e tapunia se tusi mataga a e susueina ni tusi o le fiafia. ■

Ina ia aoao atili e uiga i le faamalologa e mafai ona maua mai le Togiola, tagai Elder Richard G. Scott, “Ina Ia Faamaloloina,” i le konafesi aoao ia Aperila 1994 i conference.lds.org.

Mai le saunoaga a Elder Scott i le konafesi aoao ia Aperila 1992 ma Aperila 2008; ua laugatasia mataitusi tetele ma faailoga.



O LOTO MAMA ma TINO MAMA

Outou le autalavou ua ola ae i teritori a le fili,” o le tala lea a Peresitene Boyd K. Packer, Peresitene o le Korama a Aposetolo e Toasefululua.¹ E moni lava, o tulaga faatonuina o le ola mama o le au Paia o Aso e Gata Ai ua osofaia! Pe ua outou sauni e tau faasaga i soo se manatu le mama po o le palapala e ono tuu e Satani, le Initoneti, ma le lalolagi i lou ulu po o le loto?

la saunia outou Lava

I le tele o taeao a o lei taina le 5:00, e laina vaega o talavou agavaa i le pogisa i tafatafa o le faitotoa o le Malumalu o Sate Leki, ua saunia e ulu atu i le potu mo papatisoga. Latou

te laa mai i le pogisa o le lalolagi i le malamalamo o le malumalu. A uma ona fai ofu papae, latou te faasolo atu loa ma le filemu i le vai papatiso matagofie, lea e papatisoina ai i latou mo e ua maliliu. A o latou ea a'e mai le vai mama, toe faafouina ai vai o le vai papatiso, o nei talavou e faamalosia, o le iloaina o latou auai i se galuuga e faavavau mo isi.

Toe faafoi atu i le pogisa e alu i ai, nanati i le aoga—ae e le tutusa, aua latou te tuua faaauppegaina i le mana ma le mamalu (tagai i le MF&F 109: 22–23). O le faataunuina o le malamalamo ma le mama a'ia'i o le malumalu i o latou loto, latou te saunia ai e faasagatau atu i le pouliuli o lenei “teritori o le fili” ma ia tumau i le ola

Ua poloai mai le Alii, “la saunia outou lava, … ioe, ia faamamā o outou loto … ina ia mafai ona Ou faamamaina outou” (MF&F 88:74).

mama. O lenei vaiga e le tulaga ese i le Malumalu o Sate Leki—e tupu soo a o tuua e le autalavou e ala i le lalolagi atoa le pogisa o le teritori a le fili ma filifili e ola agavaa mo, ma ulu atu i totonu o le malamalamo o le malumalu.

Mo se faataitaiga, o se tuafafine ma se uso mai Colorado, ISA, na papatisoina taitasi mo le silia ma le 50 o o la tuua i lenei tausaga ua tuanai atu ma ua lagonaina le mama a'ia'i o le malumalu. Fai mai le uso, “ou te maua se lagona lelei, ma le faaleagaga pe a ou i ai i totonu o le malumalu. Mulimuli ane, pe a ou feagai ma faosoosoga, ou te manatua lena lagona ma e fesoasoani ia te au. I se taumafaiga e ola agavaa e auai atu ai i le malumalu,



**Saunia e
Neill F. Marriott**
Fesoasoani Lua i le
Au Peresitene Aoao
o Tamaitai Talavou

sa tusia e le tuafafine se lisi i lana api o talaaga o mea *o le a* ia faia *ma o le a* le faia pe a feagai ma faaososoga. Sa ia puipuia ona mataupu faavae, ma sa oo lava ina ia faasoa atu le lisi i ona matua ma uo ina ia mafai ona latou fesoasoani ia te ia. O nei tagata talavou e toalua ua fatuina se ofutau o le ola mama mamana mo o la loto, mafaufau, ma tino.

Faamama Lou Loto

Faatasi ai ma faatinoga mama, o i ai ni ou manaoga mama?

O Tavita, o le fai salamo, na tatalo i le Salamo 139:23–24: “Le Atua e, ia e sueuse mai ia te a’u, ma ia e silafia lo’u loto: tofotofo mai ia te au, ma ia e silafia ou manatunatu: ma ia e silafia po o ia te au se ala e tiga ai.” E faata-tau i nei fuaiupu, na fautua mai Peresitene Lorenzo Snow (1814–1901): “Ou te fautuaina ina ia faaaogaina e [tagata taitasi] lenei tatalo a Tavita.” . . . E toatele e lē gafatia le oo mai i lenei tulaga o le lelei atoatoa ona latou faia mea i le faalilolilo . . . ona . . . e faa-esea i latou mai le Silisili Ese.”²

O le talosaga atu i le Tama Faalelagi e fatu se loto mama ia te oe o se faatinoga o le faatuatua. O loo ia te ia mana uma; liliu soo atu ia te Ia ma tatalo atu ma le lotomaualalo mo Lana fesoasoani e tausia ia mama ou lagona—e oo lava i le mama i feusuaigna.

“Savavali i la le Agaga, ona le faia lea e outou o le tuinanau o le tino” (Kalatia 5:16). Oka se mana o le a e maua pe a e savali i le Agaga! I aso Saitasi a o e tagofia le faamanatuga, e te molimauina ua e naunau e manatua pea Iesu Keriso (tagai i le MF&F 20: 77, 79). O le manatuaina o le Faaola e mafai ona e maua ai le mana faale-agaga e liliuese ai mai le le mama.

Ia Mama i luma o le Atua

Aisea e avea ai le mama i feusuaigna o se poloaiga? Aua na tuuina mai e le Tama Faalelagi mana o le foafoga i totonu o le faaipoipoga mo na o faamoemoega faaleatua lava. Na saunoa mai Elder David A. Bednar o le Korama a Apostolo e Toasefululu, “O o tatou lagona e uiga i ai ma le faaaogaina o lena mana faalelagi, o le a fuafua ai se fuataga tele o lo tatou fiafia i le olaga nei ma lo tatou tau-nuuga i le faavavau.”³

O lagona vavalalata taufeusuaigna e maua mai ai le alofa, lagona alofa o le lotogatasi i le tane ma le ava. Ae ui i lea, ua lapatai mai Elder Richard G. Scott o le Korama a Apostolo e Toasefululu, “Ae peitai o na uiga feusuaigna e le faatagaina e le Alii ona faaaogaina i fafo atu o tautinoga tumau o le faaipoipoga aua e faaleagaina ai Ona faamoemoega. . . . E afua ai ni tiga ogaoga faalelagona ma le faaleagaga. E ui lava o i latou e auai latou te le

iloaina o loo tupu i le taimi nei, o le a latou iloa mulimuli ane. O le le mama i feusuaigna e faia ai se pa pupuni i le uunaiga a le Agaga Paia.”⁴

Ua le tuuina mai le alofa molitino o feusuaigna e faamalie ai le tuinanau, lauiloa, po o le fia iloa. O na faaaogaina manatu faapito o lenei meaalofa ua tuuina mai e le Atua o le a oo mai ai *pea* le le fiafia ma faatapulaa ai le tuputupu ae faaleagaga.

A o e saunia oe lava ma faamama lou loto, e mafai e le Alii ona faia ma fesoasoani e faatumau lou mama. Afai e te lagona le tausalaina po o le maasiasi i totonu, saili atu i le mana o le Togiola. Ua na o le taulaga togiola a Iesu Keriso e mafai ai ona faamamaina i tatou. Salamo ma tatalo ma le faamoni mo se faamagaloga. Alu i lou epikopo po o le peresitene o le paranesi pe a manaomia. Pe mafai ona avea oe ma tagata mama ma tumau i le mama i se lalolagi lē mama? Ioe, e te mafaia! E te iloa le upumoni ma maua le lagolago a le Agaga Paia, matua, taitai, ma le perofeta soifua. A o e vaai atu ia Iesu Keriso, e te mafaia ma o le a tumau i le mama i Ona luma. ■

FAAMATALAGA

1. Boyd K. Packer, “Fautuaga i le Autalavou,” *Liahona*, Nov. 2011, 16.
2. *Aoaoga a Peresitene o le Ekalesia: Lorenzo Snow* (2012), 129.
3. David A. Bednar, “Matou Te Talitonu i le Nofomama,” *Liahona*, Me 2013, 42.
4. Richard G. Scott, “O Le Faia o Filifiliga Sa’o,” *Ensign*, Jan. 1995, 44.

MANATU AUTU E UIGA I LE MAMA I FEUSUA'IGA

"Aloese mai tulaga e valaaulia ai le tele o faaosoosoga. . . . Aua nei auai i soo se ituaigna o ponokalafi. E mafai ona fesoasoani atu le Agaga ia te oe ia iloa le taimi ua e i ai i se tulaga lamatia. . . .

"Afai e faaosoosoina oe e fai soo se agasala faalefeusuiga, ia e sailia se fesoasoani mai ou matua ma le epikopo. Tatalo i lou Tama o i le Lagi, o le a fesoasoani ia te oe e tetee i le faaosoosoga ma faatoilaloina mafaufauga ma lagona le talafeagai. Afai ua e faia se agasala faalefeusuai, ia talanoa nei i lou epikopo."

Mo Le Malosi o le Auta-lavou (tamaitusi, 2011), 36–37.



TUMAU I LE MATAALA

Taofia le igoa

Etele ni ou faanoanoaga e uiga i le fatusaga ua mavae o lo'u olaga. Sa ouola ae i le Ekalesia, ma le tele o tagata o le aiga ma uo na faia ni faataitaiga lelei mo au. E ui lava i nei faamanuiaga, sa le lava lou mataala, lea na mafua ai se faasologa o faafitauli i lo'u olaga.

Sa amata ina ua 13 ou tausaga, ma na avea faasalalauga ma vaisu. Sa ou matamata e le aunoa i le TV ma na amio e pei o le a ou oti e aunoa ma taaloga vitio. O lau vaisu o faasalalauga na taitai atu ai i se isi faafitauli: ou te lei maua ni uo lelei ua sa le lava au taumafaiga e faauo atu i tamaiti o la'u korama. I se taumafaiga e saili ni uo, sa ou sue i nofoaga sese ma avea ma se tasi o se vaega e talatalanoa i le initonet. I lenei vaega o nisi o tagata e faasalalauna ponokalafi. Ona o le vaivai na oo mai ona o isi o'u faafitauli, sa faigofie ona maileia au i ponokalafi.

Sa ou taumafai e faasaoina lau amio e ala i le faia o alofaga: e leo faatiga ai se tasi; e le matua sese tele naua. Sa ou inoino e matamata i ponokalafi mai le taimi muamua sa ou vaai i ai, ae na ou mau i le mailei. Sa ou manao e avea ma se tagata lelei o le Ekalesia, ae sa ou faia ni faasologa o mea sese, ma sa le faasa'oina i latou i le ala sa'o lea mo se taimi umi.

Sa manaomia le tasi ma le afa tausaga mo au e vaai ai lo'u epikopo. Sa ia fesoasoani mai ia te au e manumalo i le manao e mata-mata i ponokarafi. I le aluga o taimi sa amata foi ona faia ni au uo ma tagata i la'u uarota, siteki, ma le vasega seminare. Ua 17 nei ou tausaga, ma e le'i leva ona mafai ona ou lagonaina le saoloto. Sa na o nai masina talu ai na ou faatoilaloina ai la'u vaisu i faasalalauga, tatalo ma le faamaoni i aso taitasi, ma faitau soo i tusitusiga paia.

Aua nei avea soo se tasi o nei faafitauli e mauaa i lou loto. Ou te molimau atu e faamagaloina e le Alii i latou o e ua agasala. Ae o le a e maua se olaga o le faaitiitia o le tiga pe afai e te le salamo e pei ona ou faia. Ou te aioi atu ia te oe e faasaoina oe lava mai le tele o le tiga e mafaia e ala i le aoaoina o taunuuga o le agasala i se auala o le a e fefe ai ma aloese mai ai. Ou te fai atu lenei mea ona o le agasala e fasiotia le agaga, ma afai e te agasala, o le a e lagonaina le tiga. E ita tele le tiapolo i ai tatou, e saili ia tatou faanoanoa, ma e i ai lona mana e faatosinaina i tatou pe afai tatou te faatagaina o ia. Ae ou te molimau atu e mafai ona tatou maua le alofa tunoa, alofa mama, agalelei, ma le saogalemu i le Togiola a Iesu Keriso. ■



Saunia e
Peresitene
Thomas S.
Monson

PE FAAPEFEA ONA **FILIFILI NI UO LELEI**

se suesuega na faia i ni uarota ma siteki na filifilia o le Ekalesia, tatou te aoaoina ai se mea moni e sili ona ttau. O tagata na faaipoipo a latou uo i le malumalu e masani lava ona faaipoipo i le malumalu, ae o tagata e lei faaipoipo a latou uo i le malumalu e masani lava e le faaipoipo i le malumalu. O faatosinaga a uo a se tagata e foliga mai o se mea e sili ona malosi—nai lo uunaiga faamatua, aoaoga i le



potuaoga, po o le latalata foi i se malumalu.

E matele lava ina avea i tatou e faapei o i latou o loo tatou viia. E pei lava ona i ai i le tala lauiloa a Nathaniel Hawthorne “The Great Stone Face”, tatou te faataitaia amioga, uiga faaalia, e oo lava i aga a i latou tatou te faamemelo i ai—ma e masani lava o a tatou uo. **Feoeoeai ma i latou o e, e pei o oe, ua fuafuaina e le mo le fiafia puupuu,** sini e le taua, po o faamoemoega papau **ae mo** na mea e sili ona ttau—e oo lava i **faamoemoega faavavau.**

O loo tusia i luga o se puipui i sasae o le Ekalesia a Stanford University Memorial le upumoni: “O mea uma e le faavavau [e] puupuu tele, [ma] o mea uma e le i’u [e] laiti tele.”¹

I tala atu o lau lio o uo i le lalolagi, ou te uunaia oe e **avea o se uo a lou Tama Faalelagi.** E tu o ia ma sauni e tali mai le tatalo o lou loto. I le avea ai ma le Tamā o lou agaga ma na foafolina oe i Lona lava faatusa, ma le iloina o le iuga mai le

amataga, **O Lona poto o le a lē sese ma o Lona fautuaga e moni lava pea.** Ia avea o ia o se uo.

O loo i ai se isi uo taua e tatau ona e maua, ma o le **epikopo lea o lau uarota.** Ua valaauna o ia e le Atua e ala i le valoaga ma le faaee atu o lima o i latou o e e i ai le pule. O ia e **agavaa mo le fesoasoani faalelagi** i le tuuina atu ia te oe o le fautuaga ma taitaiga. Ia avea o ia o se uo.

Filifili au uo ma le faaeteete. ■

Mai se saunoaga na tuuina atu i le faigalotu a le Junesvite o Polika Iaga i le aso 6 o Novema, 2005.

FAAMATALAGA

1. Tagai <http://www.stanford.edu/group/religiouslife/cgi-bin/wordpress/memorial-church/history/memorial-church-inscriptions/>

NA FAAPEFEA ONA E FAIA LENEI MEA?

Sa avea pea lo’u Tama Faalelagi ma a’u uo sili ona lelei e ma tuuina mai ia te au le faamafanafanaga ma le taitaiga i aso uma. O a’u uo i le lalolagi ua fesoasoani ia ou maua se molimau malosi atu ma se naunautaiga loloto ia galue ia sili atu le maelega i le Ekalesia. Ma na tuuina mai e le epikopo o la’u uarota ia te au se malamalamama poto o le Ekalesia lea ua fesoasoani ou te tuputupu ae ai o se tagata o le ekalesia. E ala i le filifilia o uo e siitia ai, ua ou mafai ai ona sili atu ona mulimuli i le ala sa’o ma le vaapiapi, lena o le a aveina au i se aso e toe vaai i lo’u Tama o i le Lagi.

Savannah A., Montana, ISA



LESONA O LE
ASO SA
.....
O Le Autu o Ienei Masina:
O Le Togiola
a Iesu Keriso

ALOFA TUNOA MA LE TOGIOLA A IESU KERISO

*E mafai ona tatou maua le malosi e faia
ai le mea e sili atu nai lo le mea tatou te iloa.*

Saunia e Joshua J. Perkey

Mekasini a le Ekalesia


I le taumafanafana o le 2012, faatoa faauu Palakiko C. mai le aoga maua-luga i Hawaii, ISA, ma sa tulimatai atu i le auai i le Iunivesite o Polika Iaga ma auauna atu i se misiona. Ua uma ona faia e Palakiko le tele o mea e saunia ai mo lana misiona—sa faatasi atu o ia i faifeautalai i le aso atoa mo aso e tolu, ma sa masani ona alu o ia faatasi ma i latou e asiasi ma aoao atu le talalelei i aiga.

I se tasi afiafi sa amata e Palakiko ma faifeautalai le aoaoina atu o se aiga e i ai nisi e lolotu faatasi ma se

fanau e toalima, e tai 8 i le 14 tausaga, e le'i papatisoina.

“Na matou asiasia i latou mo le ono vaiaso,” o le tala lea a Palakiko. “I vaiaso taitasi, sa ou vaai i lo latou faatua-tua ua faateleina a o matou aoaoina i latou i mataupu faavae faale-aoaoga faavae o le a fesoasoani ia i latou e maua ai le ola faavavau.”

E lei umi ae talia uma e le fanau e toalima le valaaulia ina ia papatisoina ma fesili atu i a Palakiko pe mafai ona ia faatinoina le papatisoga. Sa malie o ia ma le naunautai. O le papatiso o i



latou o le a avea ma se avanoa ma se faamamaluga. Ae mo Palakiko, sa i ai se luitau sili atu ona faigata: sa latou fesili atu foi ia te ia e tuuina atu se lauga e uiga i le Agaga Paia i le sau-niga o le papatisoga.

Sa sili atu le popole o Palakiko nai lo sina fefe laitiiti. "Pe faapefea ona ou tuuina atu se lauga i se aso o le a latou manatua ina mo le vaega o totoe o lo latou olaga? na ia fesili mai. "O le a se tala o le a ou fai atu?"

E ui lava i lona popole, na iloa e Palakiko e tatau ona ia faia, ma na amata ona ia tapena mo lana lauga i le aso lava lena.

"Na ou faia mea uma i lo'u malosi ina ia mautinoa o mea uma o le a lelei," o lana tala lea. Sa ia tatalo, fai tau tusitusiga paia mo le taitaiga ma le faamafanafanaga, ma faataitai le tatalo o le papatisoga i lona mafaufau. I le aso o le papatisoga, sa lelei le faiga o papatisoga. Ma a o ia tuuina atu lana lauga ma taulai atu i le tauiviga ia maua le Agaga, sa ia lagonaina le taialaina i le mea e fai atu.

"E leai se isi lava taimi i lo'u olaga na sili ona ou lagonaina ai le Agaga nai lo le taimi o lena lauga," o le tala lea a Palakiko. "Ou te fiafia sa mafai ona avea au ma se meafaigaluega i aao o le Alii"

Sa mafai ona fai e Palakiko le mea e tatau ona ia faia aua sa faamalosia o ia e le alofa tunoa, po o le mana gafatia, o le Togiola a le Faaola.

O Le a le Mana Gafatia o Iesu Keriso?

Aua tatou te agasala uma, tatou te manaomia ina ia aao ma faaaoga ia mataupu faavae o le salamo, o se vaega autu o le talalelei a Iesu Keriso. A aunoa ma le taulaga a le Faaola, e

leai se tasi o i tatou e mafai ona faatoilalo ina le agasala ma toe foi atu i le afioaga o lo tatou Tama.

O le fesoasoani ia i tatou e faatoilalo le agasala o le tasi lea o vaega o le alofa tunoa o le Faaola. Ae o loo i ai le isi. O le Alofa Tunoa ua faauigaina o le "fesoasoani faalelagi po o le malosi . . . e tuuina mai e ala i le alofa mutimutivale ma le alofa o le Atua."¹ O le mana gafatia o le Togiola ua faamalosia ai i tatou "e fai ma ia lelei ma ia galulue i tua atu o o tatou lava manao taitoatasi ma le gafatia masani."² Ua faamalamalama mai e avea ai ma Elder David A. Bednar o le Korama a Apostolo e Toasefululu, "O le upu *alofa tunoa* e masani ona faaaoga i tusitusiga paia e faamatala mai ai, o se mana e faamalosia po o se mana e mafai ai."³

Sa faamanuiaina Palakiko e ala i le alofa tunoa o le Faaola ina ia ausia ai se mea sa ia lagonaina le le agavaa e faia e ia lava. O lena lava mana e mafai ona fesoasoani ia i tatou uma i ni auala laiti ma le silisili foi.

E Faapefea ona Mafai Ona tatou Maua le Alofa Tunoa o le Faaola?

A tatou manaomia se taitaiga po o le lagolagosua po o le malosi, e mafai ona fesoasoani le Atua ia i tatou. Ae e faalagolago ia i tatou foi. E tatau ona tatou sailia Lana fesoasoani ma ia agavaa i ai.

E pei ona saunoa mai Elder Richard G. Scott o le Korama a Apostolo e Toasefululu, "A tatou usitai i poloaiga a le Alii ma auauna atu i Ana fanau ma le le manatu faapito, o le taunuuga masani lava o le mana mai le Atua—o le mana e fai ai mea e tele atu nai lo o mea e mafai ona tatou faia

na o i tatou lava. O o tatou manatu, a tatou taleni, o tatou tomai o le a faa-lauateleina ona ua tatou maua le malosi ma le mana mai le Alii"⁴

E mafai ona vaia lenei mamanu i le olaga o Jasmine B. o Uosigitone, ISA, lea na mauaina le fesoasoani i le onosaia o se faama'i. A o lei maua i le faama'i, o ia o se tamaitai talavou malosi o le e maoae lana taumafaiga i afeleti o le aoga maualuga ma e fiafia e alapo mo le seminare.

Ona amata lea ona ia lagonaina le mai. Na vave ona lusi ana pauna e 15, ma e tusa lava po o le a le tele o le taimi e moe ai, sa faasolo ina faigata atili ona nofo i luga mo le seminare. Sa le mafai ona ia tamoe e pei ona ia masani ai ma sa fiaai, fiafinu, ma vaivai i taimi uma.

Sa mavae le masina ona ia amata lea ona tatalo mo se fesoasoani. "Sa umi tele ona ou faatali," lana tala mai, "aua o le mafaufau i le tatalo mo se fesoasoani o se faatinoga o le taliaina, le ioeina e moni lava o loo i ai se o faaletonu ia te au. Sa matuai ou fefe lava."

Ae ona sa ia faamaulalo ina ia lava e saili le fesoasoani a le Alii, na amata ona oo mai tali. Sa alu o ia e vaai se fomai, lea na iloaina ua ia atiina ae le mai suka ituaiga 1, o lona uiga ua le mafai e lona tino ona gaosia le inisulini lea e maua mai ai le suka. O le mai suka e i ai se taunuuga mo le olaga atoa ma e tatau ona taulima ina ma le faaeteete. E ui lava sa atiina ae e fomai se fuafuaga e fesoasoani ia te ia e pulea ai lona tulaga, sa amata ona popole o ia o le a ia le mafai ona faaaauau pea le tamoe.

"Ou te lei taofia le tatalo a o ou taumafai e malamalama i lo'u olaga



fou ma ia pulea ai lo'u ma'i," o lana tala lea. "Sa ou tatalo mo le malosi ma le malamalamā ma ia ou mafai ona talia lenei tofotofoga. Semanu ou te le mafai ona onosaia na aso ma vайaso faigata e aunoa ma le tatalo."

Sa vave ona faasolo manua Jasmine. I totonu o le lua vайaso talu ona iloa lona mai, sa ia toe foi atu e koleni i le malae tutuu, ma mulimuli ane i lena tausaga sa faamanuiaina o ia i tauvaga a le setete. "Ou te talitonu ua faamanuiaina au e le Tama Faalelagi i se tino malosi ma le soifua maloloina aua sa ou taumafai e tumau mausali i le talalelei," o lana tala lea. "O le ma'i suka e le o le iuga lea o le lalolagi. Faatasi ai ma Lana fesoasoani, sa ou iloa e mafai ona ou manumalo mai lenei mea."

E ala mai i le alofa tunoa o le Atua ma lona faalagolago ia te Ia, sa mafai e Jasmine ona taulimaina lona ma'i ma maua faamanuiaga matagofie i lona olaga.

E Avanoa mo Tagata Uma le Alofa Tunoa

O lenei lava mana faamalosi, le alofa tunoa o Keriso, o loo avanoa

mo i tatou uma. Soo se taimi lava e te lagona ai le tuuatoatasi po o le lofituina po o le lotovaivai, ia manatua o loo faavanoaina e le Alii o Iesu Keriso Lona alofa tunoa ia te oe.

E pei ona faamalamalama mai e Elder Craig A. Cardon o le Fitugafulu, "Pe a tatou faatinoina le faatuatua i le Alii o Iesu Keriso, o le mana gafatia o Lana Togiola e *faamalosia ai* i tatou i lo tatou taimi o le manaomia ai le fesoasoani [tagai Iakopo 4:7], ma Lona mana togiola e *faapaiaina* i tatou a o tatou [tuu] ese le tagata o le lalolagi" [Mosaea 3:19]. E aumaia e lenei mea le faamoemoe i tagata uma, ae maise lava i latou o e lagona lena vaivaiga faaletagata e sili atu nai lo le naunau-taiga o le Faaola e fesoasoani ma ia faaolaina."⁵ ■

FAAMATALAGA

1. Taiala i Tusitusiga Paia, "Alofa Tunoa," scriptures.lds.org.
2. David A. Bednar, "O Le Togiola ma le Malaga i le Olaga Faitino," *Liahona*, Apr. 2012, 15.
3. David A. Bednar, "I Le Malosiaga o le Alii," *Liahona*, Nov. 2004, 76.
4. Richard G. Scott, "Mo Le Filemu i le Aiga," *Liahona*, Me 2013, 30.
5. Craig A. Cardon, "E Finagalo Le Faaola e Faamagalo Atu," *Liahona*, Me 2013, 15.

AUAI I LE TALANOAGA

O Mea E Te Ono Faia

- Mafaufau loloto i taimi na tuuina atu ai e le Atua ia te oe le alofa tunoa ma faamaumau nei aafiaga i lau api o talaaga.
- Faatu ni sini e faalauteleina ou tomai ma faaalu se taimi ia iloa ai le alofa tunoa o le Faaola a o e taumafai ia ausia au sini.
- Faasoa atu lau molimau ma aafiaga i isi i le fale, i le aoga, i le lotu, po o luga o faasalalauga faaagafesootai.



E MAFAI ONA E AVEA MA **SE FESOOASOANI MAOAE**

O taimi uma lava e te faia ai se faataitaiga lelei, fesoasoani i se tagata o le aiga,
pe faaali atu le agalelei, ua e faia se eseesega tele i le fausiaina o lou aiga

(tagai i le *Mo le Malosi o le Autalavou* [2011], 14).



Pe faafia ona
ma tafafao ma se
tasi a o lei avea ma
"tafaoga faamasani
tumau"?

E mafai ona
ou faalogo i se pese pe
matamata se ata tifaga
e i ai se vaega leaga
pe afai e faaalia i le
aoga ma e faapea mai
le faiaoga, "e le matua
leaga tele"?

Pe lelei le
ofuina o lavalava
e le tauagafau o
se vaega o se au
taalo?

PE LELEI PE A...? E MAFAI ONA OU...?

O le mea lenei e mafai ona e faia e iloa ai pe
faapefea ona faatatau tulaga faatonuina i le
Mo le Malosi o le Autalavou i lou tulaga.

Saunia e Heidi McConkie

Brooke P. o Kalefonia, ISA, e mafai ona lagonaina
le femoumouai o lana tautinoga—e sili atu ona
faigofie le milo faatasi ma lana au. Na faamalosia
o ia e isi teine ina ia ofu e pei o i latou mo koleniga ma
taalogia.

Ua uma ona filifili Brooke, e manao o ia ina ia tauagafau,
ae na te lei iloaina lona uiga mo le taalo ai i lana taaloga.
Pe le afaina le ofu e pei o lana au taalo i le na o le taimi
lava o taaloga?

"Sa ou filifili e faia se saililiiga," o le tala lea a Brooke.
"Sa ou vaavaai i *Mo le Malosi o le Autalavou*, i tusitusiga
paia, lauga o le Ekalesia—mea uma sa mafai ona ou maua.
E leai se mea na foliga mai e faamatala ai lo'u tulaga tonu
ma tuuina mai ia te au se fautuaga patino lava. Ae na ou
iloaina e silafia au e le Tama Faalelagi ma sa Ia iloa po o le
a le mea e tauagafau."

O lea na toe gaoioi ai Brooke. "Sa ou filifili loa e tootuli
i ou tulivae ma tatalo," o lana tala lea. A o ia tatalo, sa ia
faaali atu lona manao e usiusitai i poloaiga ona fesili atu lea
pe o le a le afaina mo ia le ofu e pei o lana au mo a latou
koleniga ma taaloga.

Ina ua uma lana tatalo, na lagona e Brooke le faagaeetia
faapea e le tatau ona ia suia ana filifiliqa o lavalava e faa-
malie ai lana tupulaga. E ui lava sa le taliaina lana filifiliqa,
sa maua e Brooke le lototele ma le filemu i le iloaina o lana
filifiliqa sa faafiafaina ai le Tama Faalelagi.

O Lau Tala

Atonu e te le'i mauaina oe lava i le faafitauli patino o Brooke, ae atonu na e feagai ma se faafitauli faigata faa-pena. O loo e faia le mea sili e ola i se tulaga faatonuina faaletalalelei—le tauagafau, o le faaaogaina o gagana e faagaeetia, matamata i faafiafiaga aoga, o le usitaia o le Upu o le Poto, . . .

Ona BAM! Ua faafaigata e se tasi lou olaga, ma faafua-sei lava “ona i ai le faafeagai i mea uma” (2 Nifae 2:11) e sili atu nai lo se fuaитau e masani ona ta'ua mai tusitusiga paia. O au uo—pe atonu foi o tagata o lou lava aiga—ua faatauanau oe e ofu pe tautala po o le amio e ese mai le mea ua e lagonaina e sa'o. E te manao e faia ni filifiliga lelei o le talalelei, ae atonu ua amata ona e lagona le fememea'i: *O le a le uiga o le ola ai i tulaga faatonuina i lou olaga?* E pei lava o Brooke, e mafai ona e iloa au lava tali i lenei fesili e ala i le suesue, tatalo, ma faaaliga faaletagata lava ia.

Au Fesili

O lou olaga i aso uma e tumu i fesili: *O le a le ofu o le a ou faia i le aoga? O le a lau meaai mo le malologa? O ai o le a ma tafafao faatasi?* O nisi fesili e i ai lava tali faigofie. *Pe tatau ona ou lamuina lenei fasi pulu sa ou maua i luga o le auala savali?* Leai. Atonu e te le tau mafaufau faalua e uiga i lena mea. E ui lava, o nisi o au fesili, ae maise lava e uiga i tulaga faatonuina, e mafai ona fai si faigata ona tali: *Po o a musika e talafeagai e faalogo i ai? E faapefea ona ou tausia le aso Sapati ia paia?* O le mea e lelei ai, e le manaomia lou taumafai e maua uma tali na o oe lava. Ua faataatitia mai e o tatou perofeta soifua tulaga faatonuina o le talalelei, ma e mafai ona e suesue i a latou aoaoga i le *Mo le Malosi o le Autalavou.*

A uma ona e suesueina tulaga faatonuina, atonu o le a e leiloa tonu pe faapefea ona faaaoga i tulaga uma lava, ma o se mea masani lena. O loo lelei lava oe pe

afai e i ai nisi fesili e uiga i se tulaga faatonuina patino mo lou tulaga e lei taliina.

Na o lou mafaufau lava i le tala o le Tusi a Mamona lea na poloaiina ai e le Alii Nifae e fau se vaa. E lei vave ona iloa e Nifae pe faapefea ona usitai i le poloaiga a le Alii, ae sa ia filifili e faataitai pea. Ma na te le'i faatali e saili le fesoasoani; na ia fesili, “O fea ou te alu i ai e mafai ona ou maua mai ai le 'oa e faaliusuavai, ina ia mafai ona ou faia mai ai ni meafaigaluega e fau ai le vaa?” (1 Nifae 17:9). Na ia amata i le mafaufauina po o le a le laasaga muamua o le a i ai—fai meafaigaluega—ona fesili atu lea i le Alii e fesoasoani ia te ia iloa le auala e faia ai lena mea. Na tali mai e le Alii fesili a Nifae (ma mai lea laasaga i lea laasaga na mafai ai ona ia faauma le vaa), ma pe a e taumafai e usitai i poloaiga, e mafai ona Ia taliina foi au fesili.

O Au Tali

A i ai ni au fesili e uiga i le auala e ola ai i se tulaga faatonuina patino po o le usitai i se poloaiga faapitoa, alu muamua i tusitusiga paia, *Mo le Malosi o le Autalavou, Faamaoni i le Faa-tuatuua*, fautuaga a perofeta, ma le tatalo.

E mafai ona e sue mau talafeagai o loo lisiina i tamaitusi po o lauga o konafesi aoao—e mafai foi ona e faalautele atu ia aofia ai mau faaopoopo i lau sailiga. A o e saili le malamalama e ala i le suesueina o le talalelei, o le Agaga

E mafai ona e iloa lau lava tali i fesili e ala i le suesue, tatalo, ma faaaliga faaletagata lava ia.



Paia o le a “faamalamalama ai [lo’u] malamalamaaga”
(Alema 32:28).

E mafai ona e liliu atu foi i tagata o le aiga, uo, ma taitai o le Ekalesia mo se fesoasoani. E mafai ona latou taialaina oe i punaoa aoga, tuuina atu le lagolago ma le faamalosiau, ma e mafai foi ona faasoa mai ni aafiaga patino e uiga i mataupu talitutusa ma pe na faapefea ona latou manumalo i o latou luitau.

O nisi taimi e tusa lava pe ua uma na tatalo, toe fai-tauina *Mo le Malosi o le Autalavou*, suesueina tusitusiga paia, ma saili mo fautuaga, atonu o loo e lagonaina o loo e feseseai i se puao o le le mautonu e faatatau i ni tulaga faatonuina faapitoa. E ui lava na e mauaina ni fautuaga lelei, o le faaaogaina i ou tulaga e mafai i nisi taimi ona foliga mai e pei o le taumafai e sue se auala e ala i le faaaogaina o le faafanua o le lalolagi nai lo se faafanua o le auala. I nisi taimi atonu e tatau ona e faia se faaiuga vave e aunoa ma le tau suesueina ma le manatu mamafa i se taimi umi.

I tulaga uma, ia manatua o le tatalo o se punaoa mamana. E le o se auala mulmuli lea; o le tatalo o se nofoga sili e amata ai lau sailiga mo le malamalama ma se meafaigaluega aoga i le gasologa o le ala. E silafia lelei e Tama faalelagi lou tagata patino—au meaalofa, ou luitau, ou malosiaga, ma au tauiviga. O lea afai e te le iloa pe faapefea ona e iloa le ala sili e mulimuli ai i tulaga faatonuina o le Ekalesia i se tulaga patino, aua e te popolevale. Na te silafia! E faigofie lava ona pau atu i le mailei o le taumafai ia faafetaui le talalelei i lou olaga; ae nai lo lena, e mafai ona Ia faaali ia te oe le auala e faafetaui ai lou olaga i le talalelei. Pe a e tatalo i le faatuatua, o le a Ia aoao oe, ma tuuina atu tali mo na o oe lava “i le minute tonu lava” (MF&F 100:6) e te manaomia ai. O lena avanoa mo faaaliga faaletagata lava ia o se tasi o faamanuiaga maoae ua ia i tatou ona sa tatou papatiso, ma mauaina le meaalofa o le Agaga Paia.

O Lau Faataitaiga

A o e ola i tulaga faatonuina a le Atua, e mafai ona avea oe o se malamalama i isi o loo siomia oe. E mafai ona e uunaia i latou e tausi i poloaiga. Ma afai latou te le mautonu pe *faapefea* ona usitai, e mafai ona e aoaoina

i latou i lenei mamanu mo le sailia o tali i a latou fesili patino.

A o e taumafai e fai se faataitaiga lelei, aua le ofo tele pe afai o nisi taimi o isi—e oo lava ia i latou o loo taumafai e ola i le talalelei—aua e te faia i taimi uma le filifiliga lava lea e tasi e te faia. Afai e te lagona le le fiafia, tau lava ia manatua o se tasi, atonu o Tina po o Tama, e toe manao-mia ona aoao atu ia te oe tali i fesili e sili autu—e pei o *Pe tatau ona ou lamuina lenei fasi pulu sa ou maua i luga o le auala savali?* O lea ia taumafai e onosai ia te oe lava ia ma isi a o tatou galulue e tau mafaufau tali i fesili e faigata teisi, le ituaiga lea e le manaomia ai se tali ioe po o le leai. *Efaapefea ona ou ola i lenei tulaga faatonuina i lo’u olaga?* Ia manatua o i tatou uma o tagata lē atoatoa o loo aoao mai lea aso i lea aso e ola i se talalelei atoatoa ma galulue agai i le faaatoatoaina o i tatou lava. O se faagasologa e faifai pea.

Ma e mafai ona e faia se matafaioi ola i lena faagasologa! Ia sailia ma le mataalia tali i au fesili patino ma uunaia isi ia faia foi faapea. A o e faia lena mea, manatua pea e tusa lava po o a filifiliga a isi, e mafai ona e filifili e tausi polo-aiga a le Tama Faalelagi. ■

O Heidi McConkie e nofo i Delaware, ISA.



TUUSAO I LE MATAUPU

**Ua ta'u mai e tusitusiga
paia ia i tatou ina
ia atoatoa.
E faapefea ona
mafai ona ou faia
lena mea?**

Ole a le mea o loo manaomia e le Faaola mai ia i tatou ina ua Ia fetalai, “Ia atoatoa e pei lava o a’u, po o lo outou Tamā o le o i le lagi e atoatoa”? (3 Nifae 12:48).

I tusitusiga paia, o le *atoatoa* o lona uiga “atoa, atoatoa, ma le faatupuina atoatoa; amiontonu atoatoa. . . O sooo moni o Keriso e mafai ona faaatoatoaina e ala i lona alofa tunoa ma lana togiola.”¹

Na aoao mai Elder Russell M. Nelson o le Korama a Apostetolo e Toasefululua faapea o le atoatoa i lenei olaga “mafai ona ausia a o tatou taumafai e faatino ia tiute uma [ma] tausia tulafono uma. . . Afai tatou te faia le mea sili tatou te mafaia, o le Alii o le a faamanuiaina i tatou e tusa ma a tatou amioga ma manaoga o o tatou loto.”²

O lenei, e *lei* fetalai mai le Faaola faapea o le atoatoa o lona uiga o le le faia lava o ni mea sese. Sa Ia *lei* fetalai mai foi faapea o le faia o se mea sese o lona uiga o lena atoatoa e le toe maua mai. E *mafai* ona tatou salamo.

E tusa ai ma le finagalo o Peresitene Lorenzo Snow (1814–1901), o le ki i le atoatoa i lenei olaga o le “ia sili atu le aso nai lo le tulaga na e i ai ananafi. . . Ia faaaauau le taumafai ia sili atu mai lea aso i lea aso.”³ ■


FAAMATALAGA

1. Taiala i Tusitusiga Paia, “Atoatoa,” scriptures.lds.org.
2. Russell M. Nelson, “Atoatoaga o loo Faatalitali,” *Liahona*, Jan. 1996, 103.
3. *Aoaoga a Peresitene o le Ekalesia: Lorenzo Snow* (2012), 111.

**E i ai sau uo e talitonu o loo i ai se
faamalamalamaga faasaienitisi mo
mea uma—lagona faaleagaga, tali i tatalo,
vavega, ma isi mea faapena. O le a se mea e mafai
ona ou ta'u atu i lenei uo?**

I se tasi itu, e sa’o lau uo—o mea uma lava atonu ua i ai ni faamatalaga e mafai ona tuuina atu i ni faaupuga faasaienitisi (e ui lava tatou te leo mauaina uma nei). O le gafatia o le saienisi e faamatalaina se mea e le afaina ai mea tau lotu. E tusa lava pe e te taliaina na faamalamalamaga faasaienitisi o se aafiaga faaleagaga po o se vavega, o le saienisi e na o na *faamatalaina* lava le mea na tupu; o le saienisi e leai sana faamatalaga e uiga i lona autu moni,

lonu uiga, po o le faamoemoega. O le matafaiioi lena a le lotu. E silafia mea uma e lo Tatou Tama oi le Lagi ma faaali mai ia i tatou mea tatou te manaomia ina ia mafai ai ona toe foi atu ia te Ia ma atiina ae le faatutua, faamoemoe, alofa mama, ma isi uiga faaleatua uma. E pei lava ona le faaumatia e faamatalaga faalelotu o le ofoofogia o le natura le saienisi, o le faafeagai e moni foi—o faamatalaga faasaienitisi o aafiaga faalelotu e le faaleagaina ai mataupu faalelotu. ■



UO I LUGA OLE INITONETI

Sa tau mai e le uo a lo'u aiga o Aleksander ia te au e uiga i lona tei teine o Lule.* E toeitiiti tutusa o ma matutua, ma sa manao lau uo ia ou faamasani ia te ia. Ou te le'i manatu tele i ai, ae o ni nai vaiaso mulimuli ane, sa ia faaopoopo au o se uo i le Facebook.

Talofa, Stephanie! O au o Lule, le tei o Aleksander. Na ia fai mai o i taua e tai tutusa le matutua.

Ei, Lule. Ou te manatua le faalogo e uiga ia te oe. Na fai mai Aleksander e te noto i Alepania. Ta'i manaia!

E malie—ia te au, o le ola ai i Amerika e foliga manaia! Hahaha. O le a lau mea e fai i le faaiuga o lenei vaiaso?

E i ai sau taaloga pasiketipolo i le taeao o le aso Toonai, ona ou alu lea i le malumalu o le Au Paia o Aso e Gata Ai. O le Aso Sa ou te alu ai i le lotu. A o a au mea e fai?

E le tele lava. Sa ou vaai i se ata o le Malumalu o Sate Leki i le Initonet. E matagofie! Sa fai mai le uso o lo'u tama o oe o se Mamona, e pei o ia. Sa ma o faatasi ma ia i le lotu faatasi mo ni nai taimi. Na ou matuai fiafia lava i ai! Ou te fiafia e alu i vaiaso taitasi, ae e masani lava ona i ai ni au mea e fai faatasi ma lo'u aiga i aso Sa.





UA FAAAUAU PEA LE TALA . . .

Oloo aoaoina pea e Stephanie ia Lule e uiga i le talalelei e ala i le auina atu ia te ia o faamatalaga ma le taliina o ana fesili. Fai mai Stephanie afai na te tusia faamatalaga i Aso Sa, “e sili atu le taua o le lesona ia te au.” Ma e ala i le taliina o fesili a Lule, ua faia ai e Stephanie ni talanoaga anoa e uiga i le talalelei ma ona matua. O lenei aafiaga ua aoaoina ai foi Stephanie i le galuega faafaifeautalai. “Ou te mafai lava ona avea ma se faifeautalai e ui lava ou te laitiit,” o lana tala lea.

* Ua sua igoa.

Faamolemole talanoa i ou matua po o se tagata o vaaia oe a o lei fesootai i tagata ese i le Facebook.



AUA NEI MISIA LE VALAAU MAI LE TELEFONI

I konafesi aoao taitasi, e i ai lava se savali faapitoa mo na o oe. Aua Nei Misia!

Saunia e David Dickson

Mekasini a le Ekalesia

Vaai faalemafaufau faapea o loo e faatalitalia se valaau e matuai taua lava mai le telefoni. Faafoliga, mo se faataitaiga, sa e talosaga i le taseni o kolisi ma o lau filifiliga i le pito i luga e finagalo e valaauna mai ia te oe i le po o le Aso Tofi ia e iloa ai pe ua taliaina oe. Ae o loo i ai sina faafitauli: o loo i ai se lisu umi o tagata e valaau i ai ma o le a otometi lava ona latou teena oe pe afai e te le avanoa e talanoa e uiga i faamatalaga.

Afai o le kolisi e mamaao tele e le mafai ona e vaai faalemafaufau i ai,

nai lo lena vaai i se isi mea na o le a e faatalitali i ai ma le naunautai. Atonu ua valaau mai se tagata e tau atu ia te oe pe ua taliaina oe i se au taalo, vasega siva, po o le aoga musika—soo se mea e sili lona taua ia te oe.

O le taimi nei, o le fesili lenei: pe o le a e faatalatalata atu i lau telefoni mo lena valaau o loo faatalitalia?

O avanoa e faapea, afai e taua tele ia te oe, e te le manao ia mamaao mai lena telefoni! E te le manao e misi le valaau.

E faapena foi, o masina ta'i ono uma e i ai se savali e sili ona taua mo lou lava olaga o loo faatalitali mai mo

oe lava ia. Ae o loo i ai se faafitauli laitiiti: e tatau ona muamua e malaga mai mo le mauaina o le savali.

O Le Matalasi o Faaaliga

O le konafesi aoao o se taimi e siitia ai, musuia, ma faamalosia ai faaleagaga. O se avanoa taua foi e sue ai tali i fesili a le tagata lava ia.

Na aoao mai Elder Jeffrey R. Holland o le Korama a Aposetolo e Toasefululuia, “O se konafesi aoao o lenei Ekalesia o se taimi maoae moni lava—o se folafolaga faalauaitele faapea ua matala le lagi, ma o le taitaiga faalelagi e moni i le aso e pei foi o le aiga o Isaraelu anamua, o le Atua lo tatou Tama Faalelagi e alofa ia i tatou ma e fetalai mai Lona finagalo e ala mai i se perofeta soifua.”¹

Afai e i ai ni au fesili sa e tatalo ai, o le konafesi aoao o le taimi e mafai ai ona e maua tali i na fesili. E tusa lava pe e leai ni fesili faapitoa i lou loto, e te le iloa lava po o le fea le savali po o savali mai le konafesi aoao o le a fetau tonu lava ma le mea e manaomia ona e faalogo i ai. E masani lava, o le musumusuga e sili ona taua tatou te maua, e fesoasoani ia i tatou e iloa le auala e sili atu ai ona auauna i isi.

O le lauga i le konafesi aoao *e uiga i le* konafesi aoao, na saunoa ai Peresitene Thomas S. Monson:

“Tatou te feiloai i le ta’i ono masina e fefaamalosia’i ai o le tasi i le isi, e ofo atu ai le faamalosiauga, e tuuina atu ai le faamafanafanaga, e faamalosia ai le faatuatua. Ua tatou i ai iinei e aoao. Atonu e i ai nisi o outou o loo sailia ni tali i fesili ma luitau o loo outou feagai i o outou olaga. O nisi o loo tauivi ma le le fiafia po o le oti. E

mafai ona faamalamalamaina i tatou taitoatas ma faagaeetia a o lagonaina le Agaga o le Alii”²

O savali e tuuina mai i le konafesi aoao e pei o tusitusiga paia ia i tatou i o tatou aso. Pei ona fetalai mai le Alii, “Pe i lo’u lava leo po o i le leo o a’au auauna, ua tutusa lava” (MF&F 1:38).

Afai e saunia oe lava faaleagaga mo le konafesi, aemaise lava pe afai e te silasila totoa i savali, e te mafaia ma o le a maua faatonuga ma musumusuga patino ia te oe—tusa lava pe o a ou tulaga.

Saunia e Musuia

E fesoasoani pea le faaaluina o se taimi a o lei amataina le konafesi e saunia ai mo le mauaina o faaaliga. Na fautua mai le Alii ia i tatou e saili i faaaliga: “Afai e te ole mai, o le a e maua faaaliga e faaopoopo i luga o lea faaaliga, lea malamalama e faaopoopo i luga o lea malamalama, ina ia mafai ona e iloa mealilo ma o mea filemu o mea ia e maua ai le olioli, o mea ia e maua ai le ola e faavavau” (MF&F 42:61).

E ui e mafai ona maua faaaliga faaletagata lava ia o soo se nofoaga, soo se taimi, e le tatau ona avea lena mea moni e taofia ai i tatou mai le suesueina ma le totoa o konafesi aoao. Ua na o konafesi aoao e mafai ai ona tatou faalogo i perofeta, aposetolo, ma isi taitai o le Ekalesia i ni vaega matua tetele.

I le konafesi aoao ia Oketopa 2013, sa aoaoina ai e Elder Robert D. Hales, o le Korama a Aposetolo e Toasefululuia: “I le autalavou o le Ekalesia, ou te folafola atu afai o

le a outou faalogo, o le a outou lagonaina le faateleina o le Agaga i totonu o outou. O le a tau atu e le Alii ia te outou mea e finagalo o Ia ia outou faia i o outou olaga.”³

E Taua Sauniga Uma

Toe foi atu i lena valaau taua mai le telefoni. A e iloaina o lena ituaiga o valaau o le a oo mai, atonu e te le se ese lava mai lau telefoni sei vagana ai ua matua talafeagai lelei. I le konafesi aoao, la, pe talafeagai le misia o se sauniga po o le lua aua e sili ia te oe le faia o isi mea mo se vaega o le faaiuga o le vайасо? Ae faapefea pe afai e te filifili e alu e sopo i le taeao o le Aso Toonai—ae misia “na o” lena sauniga muamua—ae peitai o le sauniga tonu lena e sili ona e manaomia e faalogo i ai?

Pe o loo e nofo i se vaega o le lalolagi lea e mafai ona e matamata ai i se faasalauga tuusao o le konafesi aoao po o lou manaomia ona faatali mo sina taimi a o lei oo atu i lou eria, e masani lava ona aoga le taimi ma le taumafaiga ia tagai totoa i lauga taitasi i le taimi lava e avanoa ai ia te oe.

Mafaufau e filifili i le asō faapea o le a e alu atu ua saunia e faalogo ma le naunau e faalogo i lauga taitasi, ma tagai totoa mo le uunaiga e aupito sili ona e manaomia e faalogo i ai.

E ui i lea, e te le iloa lava le taimi e tatagi ai le telefoni. ■

FAAMATALAGA

- Jeffrey R. Holland, “O Mataupu Tau i le Filemu o le Malo,” *Ensign*, Jan. 1997, 99.
- Thomas S. Monson, “A o Tatou toe Potopoto Ai,” *Liahona*, Me 2012, 4.
- Robert D. Hales, “Konafesi Aoao: Faamalosia o le Faatuatua ma le Molimau,” *Liahona*, Nov. 2012, 6.

°FAALOGO

Mai se Tasi ia te au Au?



**Saunia e Lucas F, 10 tausaga, Pasila,
ma Susan Barrett**

"Ou te tootuli e tatalo i aso uma.

"Ou te talanoa i le Tama Faalelagi.

*E faafofoga ma tali mai pe a ou
tatalo i le faatuatua" ("I Pray in
Faith," Children's Songbook, 14).*

Sa ou popole. Sa fai mai ia te au lou faiaoga o le Peraimeri e fai sau lauga i le vaiaso na sosoo ai i le taimi o fetufaaiga. "E mafai ona e fai atu lau molimau e uiga i le tatalo," sa ia fai mai ai. Faatoa uma ona matou talanoa e uiga i le tatalo i le matou vasega.

Sa ou tatalo i le tele o taimi. Sa masani ona fai au lava tatalo, ma sa ou tatalo soo i le taimi o tatalo faaleaiga. Sa ou tatalo foi mo faamanuiaga i luga o meaai i le tele o taimi, ma sa ou tatalo muamua i le Peraimeri. Ae o lenei ua ou le mautinoa sa i ai sau *molimau* i le tatalo po o ou malamalama pe faapefea ona fesoasoani le tatalo ia te a'u. "Pe faalogo moni mai se tasi ia te au pe a ou tatalo?" Na ou mafaufau ai.

Sa ou alu i le umukuka, lea na saunia ai e lo'u tina le taumafataga o le afiafi.

"Mama," sa ou fai atu ai, "e faapefea ona mafai ona ou molimau i le tatalo pe a ou le mautinoa o loo *i ai* sau molimau i ai?"

Sa opo atu au e lo'u tina. "Aisea e te le tuuina mai ai se lesona e uiga i le tatalo i le afiafi faaleaiga taeao, ma tatou talanoa faatasi ai e uiga i ai," o lana tala lea.

Sa fesoasoani lo'u tina ia te au e sue tala ma lauga o konafesi e uiga i le tatalo. Ona ou amata lea ona saunia mo le afiafi faaleaiga ma la'u lauga i le Peraimeri.

Ina ua ou tuuina atu le lesona i le

Sa tatalo Lucas mo le tele o taimi, ae pe o i ai sana molimau o le tatalo?



E FAAPEFEA ONA OU TATALO?

Pe a tatou tatalo, tatou te talanoa atu i le Tama Faalelagi, o lea tatou te amata ai i le faapea mai, "Lo matou Tama Faalelagi." Tatou te faafetai ia te la mo o tatou faamanuiaiga. Ona tatou ole atu lea ia te la mo mea tatou te manaomia. Tatou te faaiu lava i taimi uma i le faapea atu, "I le suafa o lesu Keriso, amene."

E mafai ona tatou tatalo i soo se taimi, i soo se mea, e uiga i soo se mea lava. Tatou te le tau tootutuli po o le i ai i le lotu. E mafai ona tatou tatalo e uiga i se mea e itiiti pe tele.

E mafai ona tatou tatalo leotele po o le leoa, na o i tatou pe faatasi ma isi tagata.

Tatou te faaaogaina upu faapitoa o loo faaalia ai le faaaloalo mo le Tama Faalelagi. Tatou te fai atu *ia te oe* ma e nai lo o *oe*, ma *lou ma lou* nai lo o *lou ma mo oe*.

Tatou te talanoa i taimi uma ma le migao, faaalia le faaaloalo i le Tama Faalelagi.



"Ou te tuuina atu la'u molimau patino ma tautino atu ia te outou o loo soifua le Atua, e faafofoga mai o la i tatalo a loto e faamaulalo"

Peresitene Thomas S. Monson, "Seia Tatou Toe Feiloai," *Liahona*, Me 2013, 114.


aso Gafua, na tau mai e lo'u tina ma lou tama ia te au le ala na fesoasoani ai le tatalo ia i laua. Sa ou tuuina atu foi lau lauga i le Peraimeri i le Aso. Sa na sosoo ai, ae ou te lei lagona tele se eseesega. Sa ou mafaufau pea pe sa i ai sau molimau i le tatalo. Sa ou tatalo ma le faamaoni e uiga i o'u masalosaloga, ae lei oo mai le tali i le taimi lava lena.

I se tasi aso na sau ai lo'u tama i le fale ina ua uma ona sailia se galuega i le aso atoa ae lei faamanuiaina. Sa faanoanoa tele o ia sa leai sana galuega mo le tele o vaiaso. Sa ou tamoe atu ia te ia ma fusi ia te ia, e pei ona masani ai.

"Aua le faanoanoa, Papa," sa ou fai atu ai. Ona faafuasei lea ona ou lagonaina se mea i lo'u loto. "E tatau ona ta tatalo," sa ou fai atu ai.

"I le taimi nei?" le fesili a lo'u tama.

"Ioe, i le taimi nei," sa ou fai atu ai. "Ou te talitonu o le a faalogo mai le Tama Faalelagi ia taua"



Sa ma tootutuli faatasi ma tatalo, ma fai atu i le Tama Faalelagi e faafanafana ia i matou.

Ina ua uma le tatalo sa matou faitauina tusitusiga paia, e pei ona matou faia i po taitasi, ona nonofo faatasi lea ma talanoa. Sa ou matauina le faifaimalie lava o le suia o lo matou faanoanoa i le fiafia sa masani ona i ai i lo matou aiga. Sa ou lagonaina le ese—pei lava sa matou saogalemu ma malupupiuia, ma sa ou iloa o le a lelei mea uma. Sa o se faalogo matagofie.

Sa matauina foi e tina. "E mafai ona e lagonaina, Lucas? o lana fesili mai ma le filemu. "O le Agaga Paia o loo faamafanafanaina i tatou, e fesoasoani ia i tatou ia iloa e le o tuulafoaia i tatou"

"Ioe, o loo ou lagonaina," sa ou fai atu ai. Sa ou iloaina e faafogaina e le Tama Faalelagi la matou tatalo.

O se po o le a le gallo lava ia te au. O lenei ua i ai la'u lava molimau e uiga i le mana o le tatalo. ■

13

1

6

“Faaaoga o outou mafaufau atamamai

e suesue ma aoao ai Mataupu
Faavae o le Faatuatua ma aoaoga
faavae o loo aoao mai ai.”

Elder L. Tom Perry o le Korama a Aposetolo e Toasefululu
Mai le konafesi aoao ia Oketopa 2013

2

8

3

4

12

10

9

5

11

7



O LA TATOU ITULAU

TAMAITI



Ou te fiafia i le talalelei ma le avea ai ma tagata o le Eklesia. O le pese e sili ona ou fiafia i ai o le "Ou te Fia Vaai i le Malumalu" (*Tusipese a tamaiti*, 99). Ou te matua fiafia lava e iloa o lo'u aiga e faavavau.

Atonina T., 10 tausaga, Samoa



Yery R., 12 tausaga, Ekuatoa



O lo'u tino o se malumalu. Ou te ofu talafeagai e faaali atu ai lo'u alofa ma le faaaloalo i lo'u tino ma ou te alofa i le Tama Faalelagi ma lesu Keriso.

Lorienne P., 6 tausaga, Filipaina



Ou te tulimatai atu e matamata i le isi konafesi aoao.

Rina H., 10 tausaga, Japoni



*Ittary V., 5 tausaga, mai Mekisiko, o matua usiusitai lava. E alofa o ia i lona aiga ma e fiafia e tusi o latou ata. O le lana pese Peraimeri e sili ona fiafia i ai o le "Ou te Fia Vaai i le Malumalu" (*Tusipese a Tamaiti*, 99). E fiafia o ia e vaai i fugalaau i le malumalu. Pe a tatalo o ia, e masani ona ia tau atu i le Tama Faalelagi le tele o lona alofa mo ia. E fiafia o ia i le Peraimeri ma taumafai e avea ma se faataitaiga lelei i lona uso laitiiti, o Ailime.*





O UO MAI LE SALAFA O LE LALOLAGI

Mai se faatalanoaga ma Amie Jane Leavitt

*Mhoroi, shamwari!**

Feiloai ia Tendai, o
loo nofo i le atunu o
Zimbabwe. O Zimbabwe
e i le itu i saute o Afe-
rika. E tele manu i Afe-
rika, e pei o puaasami,
elefane, Cape pafalo,
liona, ma sirafi. Ae e le
vaai Tendai i nei manu i
tafatafa o lona fale talu
ai o loo nofo o ia latalata
i Harare, le aai sili ona
tele o Zimbabwe. Ae, e
fiafia Tendai e fiafia o nei
manu matagofie e ola i
lona atunu. ■

**Mhoroi, shamwari! i le faaShona.*



O Au o **TENDAI** mai Zimbabwe

*O lau tala faatusipaia e sili
ona ou fiafia i ai o lea na
poloaiina ai Nifae e fau se
vaa. Ou te faamoemoe e
mafai i taimi uma ona ou
maua le lototele e fai le
mea sa'o, e pei o Nifae.*


*O lau vaega e sili
ona ou fiafia i ai
i le Peraimeri o le
faia o le poloka-
lama a le Peraim-
eri. Ou te fiafia
e faasoa atu la'u
molimau ia lesu
Keriso.*



A uma au meaaoga, ou te fesoasoani atu i lo'u tuafafine matua i ana lesona. E i ai ni ona luitau o loo fafaigata ai ia te ia ona aoao. Ou te fiafia foi e fesoasoani i nisi tamaiti i la'u aoga e i ai luitau. O nisi tamaiti e toe i nei fanau, ae ou te le faia lava.

I se tasi aso sa taaaalo ai nisi o au uo i lo matou fanua. Sa fai se upu leaga e se tasi o i latou. Sa talie isi tamaiti, ae e le'o au. Sa ou fai atu ia te i latou e le malie ma e le tatau ona matou faia ni upu leaga.

E taua tele ia te au lo'u aiga. E i ai sou tuafafine matua ma se tuafafine masaga. Matou se nonofa ma ou tuafafine faatasi ma lo matou tina ma lo matou tinamatua, po o Gogo. O le ala lena e te taua ai "tinamatua" i la matou lava gagana o le faaShona.




OU TE FIA VAAI I LE MALUMALU

E tatau ona malaga lo'u aiga i le 13 itula i se taavale e o ai i le malumalu i Johannesburg, Aferika i Saute.

SAUNI E O!

Ua teu i le ato a Tendai nisi o ana mea e fiafia i ai. O fea o nei mea o le a e teuina i lau ato?



Mudiwa mai Zimbabwe

Ua saunia Mudiwa mo le lotu, ae e mafai foi ona e tuu o ia i ofu aoga po o lona toniga o le siva. Atonu e te manao e faapipii le ata lenei i luga o se pepa malo a o lei valiina ma oti ese. Fai atu i se tagata matua e fesoasoani ia te oe. ■





**Saunia e
Linda K. Burton**
Peresitene Aoao
o le Aualofa

Na Ou Lagonaina le Agaga

"A ua fetalai atu Iesu, Ina tuu mai ia o tama iti e o mai ia te au, aua le vaoia i latou, aua e faapei o i latou nei o e o i le malo o le lagi." (Mataio 19:14).

Ou te manatua ni mea faigofie se lua na tutupu a o ou laitiiti. E faaalia e mea taitasi pe faapefea ona faagaeetia e le Agaga loto i ni auala faapitoa e tusa lava po o le a lo tatou matua.

O le aafiaga muamua na tupu ina ua ma'i lo'u tuagane. Na valaauiina e lou tama se tama mai le matou uarota e sau i lo tatou aiga ma fesoasoani e tuuina atu se faamanuiaga faaleperisitua. A o faapotopoto lo matou aiga a o lei amataina le faamanuiaga, sa fautua mai le tama e tatau ona o ese i matou le fanau, nei matou faalavelave i le agaga o le faamanuiaga. Na tali filemu atu lou tama e taua mo tamaiti taitoatasina ona i ai i le taimi o le faamanuiaga ona sa manaomia ai lo latou faatutua mama. E oo lava i lena tausaga talavou, sa ou lagonaina e le gata i le mafutaga a le Agaga, ae na ou lagona foi le tele o le alofa o lo'u tama mo lana fanau. O le alofa o lo'u tama na fesoasoani ia te au e

talitonu ai ma malamalama i le alofa o le Tama Faalelagi mo au.

I ni nai tausaga mulimuli ane, sa auai ai lo matou aiga i le sauniga faamanatuga. O lo'u tina o se tagata talenia i musika. Ae ui i lea, na ia tuuina mai i ou uso ma au le avanoa e usu ai le pese ae le o ia. Ou te manatuaina lelei lava le pese sa musuia o ia ina ia matou usuina:

*Ou te mafaufau i lena tala
manaia,
A o i ai Iesu i lalo nei,
Na Ia valaaau tamaiti o
ni Ana mamoe;
Ou te fia faatasi ma Ia.
(“Ou Te Mafaufau i Lena
Tala Manaia,” *Tusipepe a
Tamaiti*, 34)*

A o matou usuina ma ou uso le pese, sa ou lagona le mafanafana ma le fiafia i totonu. Na faamalosia la'u molimau a o fesoasoani mai le Agaga Paia ou te lagona faapea e alofa le Tama Faalelagi ma Iesu Keriso ia te au.

Ou te faafetai mo le faamanuiaga o le Agaga Paia ma le alofa o o'u matua ma lo'u Tama oi le Lagi. ■



O Iesu Kerisoo Lo Tatou Faaola

Sa taoto i lona moega se teineitiiti se 12-tausaga le matua, na matuai faateteleina lona mai. Na vaavaai atu ona matua ma le leai o se faamoe-moe. E leai se mea la te mafaia e laveai ai o ia.

Ona la manatua lea o tala ofo-ofogia na la faalogo i ai e uiga i se tagata e nofo ma i latou e igoa ia Iesu. Na fai mai tagata e mafai ona Ia faamalolo i e mamai ma faapupula tagata tauaso. Atonu e mafai ona Ia faasaoina le ola o le la tama teine!

Na tamoe le tama o le teineitiiti, o Iairo, e saili ia Iesu. Na ia aioi atu i a Iesu e faamalolo i lona afafine. Ona oo mai lea o se avefeau ma se tala matautia. Ua tuai tele. Ua otu le teine. “Aua e te matau,” na fetalai atu ai Iesu ia Iairo, “tau lava ina e faatutua” (Mareko 5:36).

Ina ua taunuu atu Iesu ma Iairo i le fale o Iairo, sa la o i totonus o le potu sa taoto ai le teineitiiti. Sa uu mai e Iesu le lima o le teineitiiti ma fai atu ia te ia e tulai mai. Ina ua ia tu i luga, sa ofo ona matua. Ua toe faaola mai e Iesu le la tama teine!

O lena aso na faaali atu ai e Iesu le tele o Lona alofa popole mo le teine ma lona aiga e ala i le auauna atu ia te i latou. E faaali mai e Iesu le



PESE MA LE MAU

- “Ou te Tu ma Ofo” (*Viiga*, nu. 107)
- 1 Ioane 4:14

tele o Lona alofa popole mo i tatou i le tele o auala matagofie ma le ofoofogia:

- Sa ia fesoasoani e foafoa le lalolagi matagofie ma ona meaola uma.
- Na ia ofo atu e sau i le lalolagi e avea ma o tatou Faaola, e ui lava na Ia silafia o le a matuai faigata lava.
- Sa ia faaluina Lona soifua i le lalolagi i le faamanuaina, faamaloloina, ma le aoaoina atu o isi.
- Sa Ia soifua i se olaga atoatoa.
- Sa Ia puapuagatia ma le loto i ai mo a tatou agasala i le Faatoaga o Ketesemane ma maliu i luga o le satauro ina ia mafai ona tatou toetutu ma toe foi atu i le lagi. ■

MANATU MO TALANOAGA FAALEAIGA

E mafai ona outou faitau faatasi le tala e uiga i le afafine o Iairo (tagai i le Luka 8: 41–42, 49–56). Ona mafai lea ona e uu i luga le ata o le Faaola i le itulau e sosoo ai ma valaaulia tagata o le aiga e ta'u mai o latou lagona e uiga i nisi o auala matagofie ma ofoofogia ua la faaalia ai Lona alofa mo i tatou. E mafai foi e tagata o le aiga ona feauaua'i e faitau se tasi o fuaiupu o le “Ou te Tu ma Ofo.” A uma fuaiupu taitasi, valaaulia le aiga na usu faatasi i le tali. Ona talanoaina lea pe tusi ni ata o auala e mafai ona faaalia ai e lou aiga le alofa mo le Faaola.



O Se Togalaau e Tumu i Faamanuiaga

Saunia e Linda Pratt

E faavae i se tala moni



ŪŪŪ! ŪŪŪ! ŪŪŪ! Sa tu se pi pisi lanu samasama i se fugalaau i talane o Andrea. Sa ia oso i luga ma faanatinati ese atu. E le fafia Andrea i pi. Sa alu atu o ia i se isi vaega o le togalaau e vele vao i talane o se laau tamato lausiusi.



Sa mafanafana le la i le papatua o Andrea. Sa mafai ona ia lagona atu Tina o latalata ane i laina o sana. Na faafuasei lava ona faalogoina e Andrea isi ūūū. *ŪŪŪ! ŪŪŪ! ŪŪŪ!* Sa tamoe o ia e sue Tina.



“Ua tele naua pi, Tina! na ia fai mai ai. “Ou te fia galue i le togalaau e aunoa ma ni pi”



“Tatou te manaomia pi ina ia ola ai la tatou togalaau,” o le tala lea a Tina. “Na foafaina e Iesu pi ina ia feaveaia fatu o laau ina ia mafai ona tatou maua a tatou meaai e fiafia i ai.”






“A aunoa ma pi o le a leai sa tatou faatoaga?” O le fesili lea a Andrea. Sa ia mafaufau e uiga i ana laau uma e fiafia i ai. E fiafia o ia i fugalaau mananaia. E fiafia o ia e ai sitolōperi ma tamato. O le a faanoanoa o ia e ola i se lalolagi e aunoa ma na mea.

“Ou te fiafia na faia e Iesu laau,” o le tala lea a Andrea. “Ua ou fiafia sa Ia faia foi pil!” ■



Sue Fualaau Aina ma Fualaau Faisua



E fiafia Andrea e galue i le togalaau, ma vaai i laau na foafaina e Tama Faalelagi ma Iesu Keriso. E mafai ona e mauaina fualaau e te fiafia i ai?

FAATALITALI I LE VAEGA I LUMA

Saunia e Lori Fuller

Mekasini a le Ekalesia



Se tasi afiafi sa ou aveina o'u tei laiti e toatolu i le malumalu e faia ni papatisoga. A o siakiina e le tagata faigaluega o le malumalu a matou pepa faataga, sa ia iloaina o loo misi le saini a le epikopo i le pepa a lo'u uso. Sa amata ona ou faatumuina le fomu e ave i le tusi talafaamaumau o le malumalu, lea o le a valaau atu i le epikopo. Ona siaki lea o le pepa faataga a lo'u tuagane e le tagata faigaluega o le malumalu ma maua ai e lei faaogaina lava. Sa i ai lau peni, o lea sa ou aveina loa le fomu sa tuuina mai ia i matou ma amata ona faatumuina foi.

Sa ou iloa e le mafai ona o i totonu lou tuagane ma lou uso ona oni mea sese i luga o a la pepa faataga, ae o au e tatau ona vaaia i laua, ma sei iloga ou te fesoasoani ia i laua e faasao nei mea sese, ou te le mafai foi ona alu i totonu. Sa ou lagonaina lo'u le fiafia i le taofia i fafo o le malumalu. Sa matou tuua le potu mo papatisoga ma o i le fogafale i luga i le faitotoa o le malumalu e faamalamalama atu lo matou faafitauli i le laulau i luma. Na fai mai le tusi talafaamaumau o le malumalu e mafai ona ia faaleleia le faafitauli i le na o ni nai minute, o

*Sa ou lagona
le faanoanoa
ina ua taofia
au e faatali-
tali i le vaega
i luma ma
fafo o le malu-
malu ona o ni
nai mea sese
faafailautusi.*

lea sa matou nonofo toafa ai i lalo e faatalitali i le vaega i luma.

A o ou saofai ai iina, na suia lou atuatuvali i le lotovaivai. Sa taofia i matou ona o ni nai mea sese faigofie, ae fai e na sese laiti se eseesege tele o le faatalitali i le vaega i luma ma le ulufale i totonu o le maota o le Alii. O se aso faigata, ma sa ou faamoeome o le malumalu e fesoasoani ou te lagona ai le filemu. O mea sese e lei mafua ia au, ae a o faasolo ina umi ona faatalitali, sa ou lagona ua lata ona ou tagi. Sa ou taumafai ia lelei e ala i le oo mai i le malumalu ma faia se faataitaiga o le auai i le malumalu mo o'u tei laiti. O lea aisea sa taofia ai i matou i fafo ae na ou matua manao lava ia i ai i totonu?

Ona ou iloa lea o se mea: afai sa ou lagona le lotovaivai ona o le taofia i fafo o le malumalu mo ni nai mea sese failautusi, oka sou faanoanoa o le a ou lagonaina pe a taofia i fafo mo a'u lava mea sese—i le le agavaa e ulu atu i le malumalu? A o ou mafaufau i lenei mea, sa faafuasei lava ona ou lagonaina le toafilemu. Sa ou lagonaina na ou aoaoina le lesona e finalago le Atua ou te aoaoina. Sa ou folafola atu ia te Ia o le a ou taumafai pea ina ia agavaa e ulu atu i totonu o le malumalu. Sa ou folafola atu o le a ou le taofia i fafo o le maota o le Alii mo a'u lava mea sese; ou te le manao i au amioga e faatapulaaina au i le na o le vaega i luma.

Mulimuli ane i lena po sa ou maua ai se taimi atofaina ma lo'u epikopo e toe faafou ai la'u pepa faataga o le malumalu. Ae ou te le'i alu atu, sa ou faia se siaki mo soo sau mea sese i a te au lava ia e ono taofia ai au mai le malumalu. Ina ua fesili mai le epikopo pe sa ou agavaa e ulu atu i le maota o le Alii, sa ou matua faafetai lava ua mafai ona ou fai atu ai ioe. ■




ATA NA TUSI E ROBERT T. BARRETT

EZRA TAFT BENSON

O Ezra Taft Benson na tele **feau** na ia faia i le faatoaga a lona aiga. Talu ai e fiafia o ia i le fai faatoaga, sa ia maua se faailoga maualuga atu i le tamaoaiga tau faafaatoaga ma na iu lava ina avea ma failautusi o faatoaga mo le Iunaite Setete i **Uosigitone, D.C.** sa fiafia Peresitene Benson i le **Tusi a Mamona** ma uunaia taga o le Eklesia e suesue i ai o se aiga ma faaletagata lava ia.

O Loo | Ai Foi i Lenei Lomiga

MO TALAVOU MATUTUA



Valaaulia Le Manuia

O talavou matutua e toatolu -o se tamaitiiti aoga faaloia, o se tagata faatau i le faletalavai, ma se tagata e faafoeina le lifi- ua faaali mai ia i tatou le auala na latou faasoa ai le talalelei i le olaga i aso taitasi.

i. 42

MO LE AUTALAVOU

i. 64



Ae faapefea pe afai ou te le alu i ni nai

sauniga o le konafesi aoao ona ou te manao e fai se isi mea i le faaiuga o lena vasio—e le afaina lena, e sa'o? le

AUA NEI MISIA LE VALAAU MAI LE TELEFONI

MO TAMAITI

Na Ou Lagonaina le Agaga

E mafai ona talanoa atu le Agaga Paia
i lou loto — e tusa lava pe o oe o se
tamaitiiti.



i. 73